

BWÀKABUULWIBWÀ, NSHAPÌTÀ

MWINÂYÌ CITÙPÀ II

 Ndi ne disànkà dyàbûngì dyà kusanganyiibwa cyàkàbidi mwab'ewu mu dindà emu. Mvwa ànu munkaci mwà dyela meeji mùshindù ùdì nêjè ewu... Mpindyewu, kàdi bu ne tuvwa mu Colorado, nêjè ewu ûwwa mwà kwikala wa mupeepèle menemene ne wa bukulakula, ne kuulu kùdi mwà kwikala bu ku bipidì makumi ànaayi mwinshì mwà cijèngù, nènku's nudi bafwànyìne kumwela mupùuya ne, *hhuuu*, mùshindù awu, e kumataye pansi bu lupwishi. Ne mufwanyine kwikala nànkú muvù wà mashika mujimà. Kàdi mpindyewu, bu mùdì muneemu emu, mu eci ci... bu mu munkoloji, pankaci pàà bipaapu, mpindyewu bìdi bulelèlè ne citaleela ne bitotàkàna ne bibì, nènku—nènku mbimwènèke ànu bu ne mvwa—mvwa njinga ànu kukwàta njila kuya, ku Arizona, bwà kwindila too ne pààlwà muvù wa bintu bitòloka awu ki pashiishe mêmè kwalukila.

² Mùshindù awu ki utùdì twêtù bwônsò tukwàcika kùdi cimpumpu, twishi ne bikwàbò mpindyewu bìdi ànu pansi apa kàdi nebyùminyine ne mashika ne pashiishe kwengulukabi, ne pashiishe kuuminyina ne pashiishe kwenguluka. Kàdi pàdìbi bìbànda ke twêtù kubikokela ku mweyelu, ne mimimu yìbangá kutusunsuma, mitù ne kayishàadi, ne masaamà ne bisaamà ne tuyaayi tukamònè. Nènku, ekèlekèlé, ekèlekèlé, ncikondo kaayipu's, mmwaba kaayipu's wè.

Kàdi kùdi Buloba dyàmwàmwa dyà musùlu,
Dìdibo babììkila ne ndilenga bwà kashidi,
Nènku netufike ku Mwelelu awu ànu ku
diitabuuja;
Ku umwe ku umwe tudi tukafika ku ciibi aci,
Bwà kusòmbelamù pàmwè ne bàdì kabàyì
bafwa,
Dìngà ditùkù nebàdidishè tungonga twà ngôlò
atu bwèbè wèwè ne bwànyì mêmè.

³ Ki patùdì twalukila Kumbèlu bwà kushààla dîbà adi, kî mmwômò anyì? Ki ditùkù ditùdì bindìle ndyôdì adi.

⁴ Mpindyewu, makèèlèlè dilòòlò awu ncyà bushùwà ne mvwa musankishìibwe kùdi mayiisha malenga awu ne bikwàbò bìmvwà muumvwe byà kùdi bânà bëètù abi. Pat Tyler ùdi penyì, ùdi munda emu mu dindà emu anyì? Pat, kaa, ncìvwa mukumònè to wa bwalu musòmbe ànu mwaba awu kùyì nànscha musokome to. Nènku—nènku ncìvwa—ncìvwa mukumònè musòmbe mwaba awu to. Musangu wà kumpàla

wûmvwaku ne Pat...wa kuumvwa Pat ùyiisha; ngakasàンka ne diyiisha adi, ndi mutwishiùbwe ne twêtù bwônsò twakasàンka.

⁵ Ne pashiùshe mwanèètù mutekète udi mufile bujaadiki bwà kapyà bwà diyiisha kampànda mwab'ewu awu mu bushùwà bwà bwalu aci cyàkumvwika ànu bu cingoma cyà mwambuyi cituucika's. Mwanèètù kampànda, mvwa mutwilangane nendè, ngwa ku Ohio. Ùdi kaaba aka mu dindà emu anyi? Mwab'ewu mwaba kampànda anyi? Mwanèètù Neville wâmbì mùvvwàye utuuta wambakaja ne lukasa lwônsò.

⁶ Pashiùshe Mwanèètù J. T. Parnell. Nènku—nènku ndi ngeela meeji ne bushùwa kî mbakafikaku kùdì Mwanèètù Beeler to. Nènku yêyè, Mwanèètù Parnell ùdi apa anyi? Mwanèètù Parnell, Mwanèètù Beeler? Ncyêna mutwishiùbwe to, mvwa ndyambidila ne umvwa mumònè m'Mwanèètù Beeler.

⁷ Makénkè aa, eci cìdi...Piìbakàbo tabernacle mupyamùpyà, Ndi ntékemena nebàlongolole bintu mùshindù mushììlangànè, mushììlangànaku ndambù. Ewu ke wetù wa kumpàla, wa patùcìvwà tubangilaku's. Nànkú awu twêtù bapeta mupyamùpyà, mònà's, tudi baswè ikaleku mushììlangane ndambù ne ewu; kwenàku mwà kumònà to; ndi muswè bwà tabernacle ikaleku mwibaka mwinameku mùshindù ewu, mu batèèleji's. Udi utàngila buludi mu batèèleji bëèbè amu dîbà dyônsò. Ne pashiùshe nangànangà mu masangisha à dijingulula, udi ànu mwà kunyùnguluka. Nwamònù's, ùbàngata ànu mùshindù ewu, wàtwa kumpàla wàtwa paanyimà. Nènku dîbà adi, nànscha bìkèngela bwà wêwè kubììkidisha bâdì mu kaacisásà kakesè abu, s'mbîmpè be.

⁸ Mwanèètù Littlefield ewu, Billy yêyè kaaba aka, mmumbììkile makèèlélà dilòòlò awu nènku yêyè neàtume macinka à tabernacle ûmvwà mulambule kuntwaku, udi baamaanyimèela...Mwanèètù Wood, bidi bilomba mfranga, ngeela meeji, ndola nkàmà yìtaanu ànu bwà maanyimèela kumuzolaye. Nènku yêyè—yêyè neàtume aci ne mushinga ne bikwàbò byônsò byà bintu byà mudimu ne mabaya à malekà ne mikamba biyaayamu abi. Nènku neàtutùminebi, ne yêyè mwine mmuswè kulwa; nènku mmwambe ne neàye kùdì beena nzùbu yà mabaya abu ne bikwàbò bwà kumònà ní ùdi mwà kubàfikisha ku—ku dipwekesha mushinga ndambù mùvvwàbo benze bwà wendè awu amu. Tabernacle mulenga kumònà wa dikèma, kàyì mupitèpíté bunène to, kàdi's nkazùbu kalenga kaa dikèma.

⁹ Ki mêmè kumwambila, kwamba ne: "Ne—nêmfilè cyôcì aci kùdì balubuludi ne balami panùdì ànu nutuma kùdì Billy nènku—nènku dîbà adi netùbalekelè bamònè mfranga yìdì yìbàkèngela bwà kutwadijabù lwîbaku lwàbò."

¹⁰ Kwambaye ne: "Pànwàtwadija, nêndwe, muvwale cinsàlàbeeta bwà kushààla ànu neenù mu cikondo cyônsò

aci.” Mwanèètù Littlefield mmulùme wa ngâsà wa dikèma, muntu wa ngâsà, wa maalu malenga wa dikèma.

¹¹ Mpindyewu, nukaadi bwônsò badyümywè badilongolola, bwà kutwàdija Cidimu Cipyacipyà mpindyewu anyì? Amen! Kupàtuka ànu buludi mu Cidimu Cipyacipyà. Tudi baswè kucítwàdija mu mùshindù mwîmpè, biikale tukwàcila Mukalenge mudimu. Mbanganyì bàdì babìike mu dìndà emu ne baMusàkidile bwà cidimu cyà kale ne byônsò byà mu cyôci, ne baMulòmbe bwà: “Apwakù mwoyi bìdì bishàale paanyimà”? Nènku, tuvwa benze nànkú ku luseke lwà bulaalu patwàjuuku, nènku pashìushe kulwa ku mèèsà kùtù pa ciibidilu cyoshelu cyà díkù, batu bânyùngùlukila mèèsà ne bàsambila.

¹² Nènku tutu misang yônsò tuteeta bwà kucivwija ciibidilu cyà kusambila bufùku kumpàla kwà twétù kuya kalààla. Ndi ne ciibidilu, aci, kacyà ànu ngakudimuna mucimà. Cyà kubìika mu dìndà, ne kuulututambe kufiìka ne mabungi mapìte bûngì bwà mêmè kwenda, ncyéna—ncyéna mumanyè kunyaayà to. Kàdi bu mêmè ànu mwà kuMulòmba bwà kunkwàtaye ku cyanza ne kundombola mu ditùkù dijimà adi.

¹³ Nènku ndi mvùluka, ànu dyàmwàmwà dyà mùsèèsù ewu, pâncìvwà nsongàlùme wa citende, Billy Paul ùvwa ne bidimu bitwè ku bìsàtù, anyì bìnaayi, ne tuvwa basòmbèle ànu dìnsambwà dyà mùsèèsù ewu. Nènku bufùku kampànda ùvwa ujinga mâyì à kunwà, pààwù miikale mu cikukù, kabalu kàà mâyì kàvwa mu mbekeci. Ki mêmè kwamba... Kaa, mvwa mucyòke be, mvwa mukwàtè mudimu mukolè ditùkù dijima ne muijishe citùpà cyà bufùku. Ki—ki yéyè ne: “Papa, ndi—ndi muswè kunwà mâyì.”

¹⁴ Ki mêmè kwamba ne: “Billy, bwela ànu mu cìkukù amu, àdi pa kaamèèsà kakesè apu.” Mêmè ne...

¹⁵ Kukàtamukayè, kudìvingayè kwísù, ne kutàngilayè kuntwaku, e kwamba ne: “Papa, ndi nciìna bwà kuya.” Nwamònú anyì?

¹⁶ Ki mêmè kwamba ne: “Èè, aci’s... kakwena bwalu to.” Mêmè ne: “Dyele ànu lubilumù’s, munanga wanyì, ùnwa mâyì. Papa’s mmucyòke be.” Ànu ntàntà mukesè cyanàànà, bu ne ku dididiishi dyàdyá.

Ki yéyè—yéyè kwamba ne: “Kàdi ndi ne bwôwà bwà kuya, papa.” Nwamònú anyì?

¹⁷ Èè, mêmè kujuuka ne kakwacikwètù aku. Nènku ki wèla umpya ku cyanza, kàdi’s civwa cintu cîmpè; katùvvà banji kwela bidya bìnaayi anyi bìtaanu to kudibyankulaye ku tâapí mwaba ùvwa Meda mukolòpe mu nzùbu, ne kùvvwa citùpà cyà tâapí wa mukolàkàne, nènku s’nudi bamanyè mùshindù utùbi’s. Nènku kutòndokayè, kadi mvwa mumukwàtè ku cyanza, ne díbà adi kunguuminyinayè bikolè menemene ku cyanza. Ki díbà adi mêmè kwimana ndambù mwaba awu, ki mêmè kudyàmbidila

ne: "Nzambì, ncyà bushùwà." Nwamònu anyì? "Ncyêna muswè kwela cidya nànsha cìmwè Wêwè kùyì munkwàte ku cyanza to, bwalu ncyéna mumanyè ne ndibà kaayi dîngààselemukà to." Nudi numònà anyì? "Kàdi dîbà dyônsò dîndì ànu mwà kumvwa cyanza Cyèbè cinène, ne cyà bukolè aci kacya cyàmpya, ndi mumanye ne Wêwè neündame nànku mu bikondo byà wânyì . . ." Nwamònu anyì?

¹⁸ Pa nànku ndi nteeta kucyenza ciibidilu, cyà—cyà kulama cyanza cyànyì mu Cyèndè. Nènku misangu mikwàbò ntù mwenze bintu bìtù bimweneka bicimbakane ku mmwènenu wanyì mêmè mwine, bintu bìdì bìmwèka bìdì kabiyì bìpetangana ne meeji à buntu; kàdi bu twétù ànu mwà kucilekela kwà tâlalàà, ndi njandula ne ki cintu cìmwèpele cìvwà mwà kwenjiibwa bwà kwikalaci cijaalàme.

¹⁹ Nudi bamanyè's, bintu bìdì kabiyì bimweka bijaalàme ebi, pììkalabì ne Nzambì ngùdi mùkulombolamù, nebììkalè ànu bijaalame mwaba kampànda, nudi numònà's, bwalu Yéyè mmumanyè mwà kulombola. Pa nànku, bu mudibi ne Yéyè ke wetù ngâssà udi mukùmbâne mu byônsò, ne byônsò bitùdì naabi dijinga anyì bitùdì tucyùka bìdi munda Mwèndè, dîbà adi tûteekààyi ku luseke bikwàbò byônsò pa kuumusha Yéyè ne tûkwatè ku cyanza cyà Nzambì cìdì kaciyyì cîshintuluka.

²⁰ Tuvwa ne ciibidilu cyà kwimba musambu kampànda mwab'ewu, ncitu mwanji kuwùmvwa bàwimba kâbìdì to kukaadi ntàntà mule. Mpindiyewu, ncyêna mwà kwimba ne kùdi. . . Ncyêna ngeela meeji ne kùdi beenyi munkaci mwéti emu to. Pa nànku ndi. . . Ki bwà cinyì ntù nteeta tuumisambu tukesè etu, nudi bamanyè's, bwalu ntù ànu muyìnangè. Nènku Gene, wêwè mudìdìngà ànu mulekele eci cipicile mu mukàbà wa mèyi awu ciyè munkaci mwà bantu bwônsò! Mvwa ne ciibidilu cyà kwimba kaamusambu kakesè mwab'ewu:

Cikondo ncyûle ne dishintuluka dyà
cîmpicìmphi,
Cintu nânsha cìmwè pa buloba kacyêna mwà
kushâala kaciyyì cinyungishiibwa to.
Ibâkilà ditèkemena dyèbè pa bintu byà
Cyendèlèlèlè,
Kwâta ku cyanza cyà Nzambì cìdì kaciyyì
cîshintuluka!

Mbanganyì bàà kunùdì bâkaadìku bumvvè musambu awu? Kaa, ndi muwùnangè, kàdi nwénù? Tûteetààyibì citùminyi cyàwù cìmwè:

Kwâta ku cyanza cyà Nzambì cìdì kaciyyì
cîshintuluka!
Kwâta ku cyanza cyà Nzambì cìdì kaciyyì
cîshintuluka!

Ibàkìlà ditèkemena dyèbè pa bintu byà
 Cyendèlèèlè,
 Kwàta ku cyanza cyà Nzambì cìdì kaciyì
 cishintuluka!

Tùteetààyi citùminu kampànda:

Pààjikà lwendu lwètù,
 Ne twêtù bashààle ne lulamatu kùdì Nzambì,
 Cisòmbelu cyèbè cilenga cyà cìbàlakana mu
 Butumbi,
 Ki cyàmòna musùùkà wèbè mwambwìbwè
 awu!

Kwàta ku cyanza cyà Nzambì cìdì kaciyì
 cishintuluka!

Kwàta ku cyanza cyà Nzambì cìdì kaciyì
 cishintuluka!

Ibàkìlà ditèkemena dyèbè pa bintu byà
 Cyendèlèèlè,
 Kwàta ku cyanza cyà Nzambì cìdì kaciyì
 cishintuluka!

²¹ Tujuukilaayi kuulu mpindyewu bwà katancì kakesè cyanàànà bwà disambila, bu nwénù mwà kuswa, patùdì twela címwè cyà ku byanza byètù muulu kùdì Nzambì ne tuwimba cyàkàbìdì apa ne:

Kwàta ku cyanza cyà Nzambì cìdì kaciyì
 cishintuluka!

Kwàta ku cyanza cyà Nzambì cìdì kaciyì
 cishintuluka!

Ibàkìlà ditèkemena dyèbè pa bintu byà
 Cyendèlèèlè,

Kwàta ku cyanza cyà Nzambì cìdì kaciyì
 cishintuluka!

Kwàlakanyi mabanji à pàtupù à pa buloba ebu
 to,

Àdì ànyangukà lükàsà aa,

Ibàkìlà ditèkemena dyèbè pa bintu byà
 Cyendèlèèlè,

Byôbì kabyàdyàkujiminakù to!

²² Taatù wa mu Dyulu, patùdì biimàne kuulu apa, Mukalenge, tudi banangè ànu kwimba misambu yà kale ayi, yiyyaaya ne mu ndondo wa bitùpà byà munda mwà mwoyi wètù ne bipàtula patòòke cyakwidì cyà dinanga dyètù Kûdì, wéwé Nzambì udi ne mwoyi. Nènku patùdi beelè byanza byètù muulu apa, Mukalenge, mu dindà emu, cìvwa ncivùlukilu cikesè cyà ne “Ukwate byanza byètù, Mukalenge.” Ànu mûmvwa ndondà bwà Billy Paul, mûshindù ùvwaye mumpyè ku cyanza cyànyì amu, nùnku’s mmudishinde bu ne ncivwa mumukwàte to. Nènku, Éyi Nzambì, mmisangu bûngì munyì yitùvwà mwà

kwikalà twêtù aba badishìnde bu ne Kùvwa mutùkwàte ku cyanza's! Pândì ngeela meeji muvwaye yéyè, kàyi mamwèndè, wa bwalu muciikale mwânà mukesè wa mu dibòko... ne mùshindù mene... mùvvwabi ne mu nsòmbelu wendè, ne njila yàkalondaye, ùvwa mu fwànyìne kwikalà mushipiibwe kale, kàdi kùvwa Cyanza cinène cìvwà mwà kufika mwaba ùvvà cyànyì mêmè kaciyì mwà kufika nànsha, bwà kumukwàta. Mpindyewu, tudi ne kusakidila kwàbûngì bwà bwalu abu.

²³ Ndi ne disànkà dyàbûngì dyà kumanya, Mukalenge, ne patùdì tuumvwa musùükà wètù munkaci mwà kutàpulukangana ne mubidi ewu, bwà ne kùcidi cyanza citùdì mwà koolola ne kukwàtakù, cyàtulombola dyàmwàmwa dyà musùlu. Tudi tuKusàkidila bwà maalu aa, ditwishiibwa edi, ditwishiibwa dibènèshiibwe ditùdì naadi, Lwongò lwà musùükà, lùdì lutulama bashimate kamÙngùlù patùdì twendela mu lwendo elu anyì twendela mu mazuwa pa mbû munène wa mwoyi apa.

²⁴ Nènku tudi tulòmba, Taatù, bwà ne ànu mwàkamba mwedi wa kasàlà ne: "Mwanètù mubùle ditekemena ne mudiìne ne màzuwà mu mâyi ewu, pa kumònà dishimata dyètù (bajaalamè), pa kumònà nànku, wàkolesha kàbìdì mwoyi, anyì wàpetulula kàbìdì bukitù ne kuteeta cyàkàbìdì"; mumanyè ne Nzambì ubi udikùmbanyina mu byônsò awu, twêtù batànkakane anyì badishìnde, cyanza Cyèndè cinène aci cìdikù bwà kutùkwàcisha. Ngâsà Wendè mmukùmbàne.

²⁵ Mpindyewu tudi tulòmba, Nzambì, bwà twìkalèku, mu dìndà emu, mwà kubanga Cidimu Cipyacipyà mu miyenga, twimba ne tusànka, ne bamanyè ne Nzambì neàtùlombòlè mu lwendo lwônsò lwà mwoyi ne dyàmwàmwa dyà musùlù wà lufù, ùtùbweja mu Buloba bulaya abu. Mèsù ètù mmatàngile dyàmwàmwa dyà nkwaaka mibinduluke yà Yadena mu dìndà emu, kùdì mpàta yà—yà bitefù ne mpàta yà micì ànu mibìshi yisampila, nènku tudi tulòmba, Nzambì, bwà misùükà yètù yibàkuleku cikèènà-kumònà aci ne kayicilekèlèdikù to. Díngà ditùkù pààkèngelabi bwà twêtù kupweka ku musùlu awu kùvvwàye mukòslwèle aku, mu mùshindù wa ne, bu Eliyà wa kale awu, Mùzàbì wa Nzambì newùtuutè musùlù wa lufù ne twêtù netwèndelèpu katuyì ne bwôwà nànsha. Enzàku nànku, Mukalenge.

²⁶ Tùkwàcìshèku patùdì tuseemena ku Dîyì Dyèbè apa. Éyì Mukalenge, ndi ndòmba bwà Nyumà Mwimpè Webè alaabeku Dîyì edi. Neyà bushùwà ne katwèna bakùmbane bwà kudilongesha to, bu mutùdì katuyì mulongeshi to. Tudi bamanyè ne mùshindù wùmwèpelè wutwìkalàku bakùmbàne bwà kuDìmanya ngwà Mulongeshi munène wa cikunda awu ùlwa kwangata kaaba Kèndè—Kèndè kàà cisòmbedi mu myoyi yètù, ne—ne ùkòòkesha meeji ètù mu mùshindù wa ne (ne mmwènenu yètù) mu mùshindù ne netwìkalè... Yéyè

neàtúmvwiјè Mifùndu Minsantu. Tudi beyémene aci kakùyì tuseku to.

²⁷ Nènku anji elààyibi meeji pa bwalu abu, Nzambì, kaa, mùshindù mwine ùdibì bilenga bilayà bwà Taatù udi ne mwoyi wa mùshindù awu, uvwa wa ku... udi dilediibwa diine dyà Cyendèlèlèlè, udi mufwànyine kutuuluka ku bukwabantu bàà cífwàkà ne kutukwacisha, ne uvwa mwà kulwa ne Dìyì Dyèndè ne kuDifidila mukana mwètù ne mu myoyi ne mu maci bwà twàmòna mwà kuDítèèleja ne kwikala ne mwoyi, bwà kutùpikula ku mulawu utùvwà katùyì ne citùvwà benzè bwà dilwa dyàwù to, Taatù, bwalu byàkenjibwa kùdì bukwabantu ne twétù tudi ndelànganyì yà-yà babàkè bàà kumpàla abu. “Nènku tudi balela mu mpékaatù, bafwimba mu bubì.” Kàdi Nzambì mwakane ne wudi ne mwoyi mmumanyè ne katwèna ne citùvwà benzè mu bwalu abu to, kàdi mmwenze njila wa dipàndukila ne mutupe dyésè dyà kulwa. Mùshindù mene utùdi ne disànkà dyà mutùdì balwè ku Nzùbu wa Taatù’s!

²⁸ Tudi tulòmba mpindyewu, bwà Wêwè kubènesha èkèleeziyà wetù ewu, Mwanèètù Neville, mpaasàtà wetù—wetù wa bukitù ewu, musadidi Webè mudipwekèshe awu. Tudi tulòmba bwà balami bètù ne balubulidi bètù, bwà Übàpèèshèku cidimu cyà citàmbe bunène cyà ku bidìbo bapetè. Enzaku nànku, Mukalenge. Ubape matìkù àbùngì à mwoyi. Ubape dikandà, Mukalenge, mbasadidi Bèèbè. Swaku bwà kushààlabò misangu yônsò ànu ne bukitù ku mwaba wà mudimu. Beneshàku beena kwitabuuya, bi—bidimba, bânà Bèèbè bananga bàdì bâlwa mu nzùbu ewu aba. Nzambì, tudi tunana musùùkà wà yônsò wa kùdìbo udi usambuka cibweledi cyà nzùbu ewu. Tudi tuwùnana m’Bwèbè Wêwè, Mukalenge. Tùkwàcìshèku bwà kwikala bambi bàà mùshindù awu bììkalà mwà kutwàla Dìyì ne bupwekele menemene ne mu bulelèlè menemene, ku Nyumà Mwímpè, bwà baamònaku mwà kujinga kwikala bu Wêwè, Mukalenge. Enzaku nànku. Ondopa babèèdì ne beena ntàtu bàdì bâlwa abu. Ne pa buloba bujimà, enzàku nànku mu nzùbù yônsò wa Nzambì.

²⁹ Ndekeelu wa byônsò, paWàjikija, Mukalenge, swàku bwà tubweleku mu biibi Byèbè, tusòmbela ku mèèsà à mwakidilu mulenga à Nzambì, ne tudya ne tushààla ne mwoyi pàmwè mu bikondo bìdì kabiyì bijika abi. Patwàmba kufikila kwine aku, swàku bwà twikale ne bukolè bwà mubidi ne dikànda, musangeelu, disànkà, bukolè ne ngulu, ne mabènesha à Nyumà Mwímpè atulombole. Tudi tulòmba mu Dínà dyà Yesù. Amen. Nudi mwà kusòmbaayi.

³⁰ Ndi ngàànyisha mijiki mîmpè yà mu dindà emu ayi. Ne... Ndi mfuma ku dibwela, pa díbà, nyikilangana ne mulundà wanyì mwímpè, Mwanèètù Skaggs, ne—ne Mwanèètù Gene udi paanyimà pààpa wàwa, ne mukwàbò mwanèètù ku ciibi; too ne mungapecì mwà kuumvwa citùpà cyàwù, kàdi ûvwa umvvika mulenga wà dikèma mu byamù byà mèyì.

³¹ Mmunyì munùdì nusànkila Dibuulula? Ndilenga anyi? Mêmè ndi ngiitabuuja bikolè ànu mùdì mwanàànyì mukesè wa bakàjì, Sarah, udi paanyimà pààpa wàwa, bikaadi bilwe “dibinduluka” bwànyì mêmè, bìdi ànu—bìdi ànu dibinduluka dyangàtangane’s. Nudi bamanye’s, mvwa njinga bwà twîkalakù ànu naabì mpindyewu too ne ku ngondo mwisâtù anyì ngondo mwinâyì, ànu bwà kwasa ntenta munène mutàmbe upita too ne paanyimà apa ne kulwa mwab’ewu mundaamuunya ne kuzola bimfwànyì abi ne dizola dijimà adi, nènku kubibandisha ne kubìpwekesha byenze bu mùdì rìdô yà ku màdìdishi, nudi bamanye’s, bu mûntù misangu yônsò mujingèjìngé cikondo cyà kwikalala ne tabernacle munène mutàmbe mwaba kampànda mwaba ûndì mwà kupwekelela ne kukoka edi dizola kudìpwekesha, kuya naadi too ne kwàka kwà cibùmbà cyà ku cyambilu eku; ne mabuulula ne dyandamuna bìdi Mukalenge mumpèèshe, kàdi kwangata mucì ne kupicilamu ne kupwekesha bikondo ebi. Dìbà adi patùdì tujikija ne aci, tubandisha cikwàbò aci, tupwekesha cikwàbò aci mùshindù ewu ne kubanga ne cyôcì aci, ne kucilongesha too ne kundekeelu. Kaa, aci’s ncifwànyine kwikalala ànu bu dyulu dikesè, kí mmwômò anyì? Kusòmба ànu muvù mujimà wà mashìka awu, kuùpìcisha ne Mukalenge.

³² Bìmpè be bwà kwikalala pàà nkààyeebè Nendè! Nudi bamanye’s, tuvwa ne ciibidilu cyà kwimba musambu ne: “Kùdi bikondo bìndì muswè kwikalala anu pàà nkààyaanyì ne Kilistò Mukalenge wanyì, ndi mwà kuMwambila ntàtù yànyì yônsò nkààyaanyì.” Nwamònù’s, ki mùshindù wa kwenza ngwówò awu. Bàvwa ne ciibidilu cyà kwimba, Roy Davis, ùvwa ne ciibidilu cyà kwimba kaamusambu kakesè ne: *Kupèngama bwà Kusambila ne Yesù*. Byônsò biikale ànu bifunkuna... byônsò byûdì mwà kutàngila bìdi misangu yônsò ànu bikamata buludi mu njila wa Yesù Kilistò, kí mmwômò anyì?

³³ Mpindyewu, mu bikondo byà èkèleelziyà bitùvwà bààkule abi, matùkù mwandamukùlù à ndekeelu mu disangisha... Pashìishe makèèlèlà dilòòlò ngeela meeji ne tudi bafikè ku mvensà mwi² wa nshapità mwi⁴ wa Bwàkabuulwibwà. Ne ndi ngeela meeji ne nwénù bwônsò nuvwa kaaba aka makèèlèlà dilòòlò bwà—bwà kumuumvwa. Nànku awu ndi... pàmwàpa mêmè mufike ku mvensà umwe anyì yìbìdì yèndè mu dindà emu... Anyì ntoo ne penyì pìlkala Mukalenge mwà kulombola, ncyêna mumanyè to. Ndi mupwèke too ne ku mvensà mwi⁶ anyì wa 7 kaaba aka, ànu kaacyena-bwalu kakesè cyanàànà kafündà mwaba wûndì mwà kwalukila mu bitùpà bishìllèshìllàngàne byà Mifundu ne kujoomona bintu abi, ne kúmvwà mulonge makèèlèlà awu.

³⁴ Nènku mpindyewu, tudi tujandula ne, tuvwa bashìile makèèlèlà dilòòlò awu, ngeela meeji, ku mvensà mwi², kubangila ku mwi³, ngeela meeji ne ki mùvwàbi. Nènku tuvwa ànu bashìile pa “Diyì dyà Mpungi.” Aci kí ncyà bushùwà

anyì: “Mwadi wà Dìyì”? Ngänjì ncìbalè cyônsò bwà twêtù kwalukila mpindyewu:

Paanyimà pàà cyôcì eci mêmè kutàngila, ne, mònayi, ciibi cyunzulula mu dyulu: nènku dìyì dyà kumpàla dingàkuumwwa dìvwa dyenze bu dyà mpungi wàkulangana naanyi; uvwa wamba ne: Banda kuneeku, nènku nènkuleeje bintu...bidi ne cyà kwikalaku pashiishe.

Ne dyàkàmwè mvwa mu nyumà: nènku, mònayi, nkwaswa wa butùmbi wàkatèkiiwbwa mu dyulu, ne kampànda musòmbe pa nkwaswa wa butùmbi.

Nènku ewu uvwa musòmbe pa nkwaswa wa butùmbi... ewu uvwa musòmbe awu uvwa mufwànàngane ne... dibwe dyà yaspà ne...dyà sardwànè: nènku kuvwa mwanzankòngòlò munyìngùlukile eku ne eku kwà nkwaswa wa butùmbi, mu cimfwànyì cyà diikala dyà mâyì à matàmbà.

³⁵ Mpindyewu, dileesòna dilenga dyà dikèma edi, kaa, dilenga dyà dikèma’s! Nènku mu dìndà emu, kumpàla menemene kwà mêmè kupweka, mvwa mufike kaaba aka ku mvensà mwi6 eku, mêmè kudyàmbidila ne: “Kaa, ekèlekèle, ncyêna mwà kupita aci to, bwalu cintu kampànda ncyécì mu mvensà mwi6 ewu Cîndi muswè bwà bantu bwônsò bâtèèlejè bîmpè menemene, patwàfikà ku *nyama eyi*.” Mumvwija mashìilèshiìlangàne à nyama eyi mwab’ewu, tupingaja mêsù paanyimà ku cibangidilu, umwe nnyama wa mùshindù kampànda, ne nyama mikwàbò yìnaayi ayi nyà mukwàbò mùshindù. Umwe nnyama, mu cyena Ngelikà, byenzè bu ne “nyama wa cisuku.” Mukwàbò ewu yéyè kénà mukudimuna bîmpè mu Roi Jacques amu to, bwalu kí *nnyama* to, bidi “m’Bifùkìibwà bidi ne mwoyi.” Ne mùvvà Bifùkìibwà abi, civwàbyo, kacìvwa nî mmuntu anyì kacìvwa m’Mwanjèlò to. Pa nànku cidi “m’Bifùkìibwà bidi ne mwoyi,” ne mùvvàbi ne mpàlà yìnaayi ne bìnaayi... Kaa, ekèlekèle, tudi tulwa ne cyôcì aci buludì ku Èvànjeelyò, ne kucyàluja buludì ne kucìshikika leelù ewu cipwàngànè ànu mùdibì kaaba aka emu. Nènku, vùlkàayi ne, *inaayi* ùdi nombà wa pa buloba. Nwamònú anyì? Nènku cidi ànu dileesòna dilenga be mwaba awu, nànku awu ndi—ndi mutwishiìbwé menemene ne katwàkubwelaku mu cyôcì aci to; pàmwàpa netùbwelemu. Kàdi mbilenga byà dikèma be!

³⁶ Dîbà adi, bu Mukalenge mwà kwanyisha, dîbà adi pììkalàbi ne tudi pabwîpi, pàmwàpa mu dyàlumingu dìlwalwà tudi mwà kuteeta cyàkàbidi cyôcì aci; kuteeta, bwà kupweka, kumònà ní tudi mwà kujikija nshapità mwi4 ewu kumpàla kwà twêtù kuumuka. Katwèna banji kumanya menemene mwaba utwàbangila wà kumpàla to.

³⁷ Mpindyewu, tudi tusangana ne *paanyimà*: “Paanyimà pàà maalu aa.” *Paanyimà* mbwena kwamba ne “Paanyimà pàà bikondo byà èkèleeziyà bimanè kujika.”

³⁸ Dibà adi bààkatumina Yone dîyì bwà kubànda kuulu ne: “bànda kuneeku,” mbwena kwamba ne “bàndila too ne apa.” Wàkamuleeja cyônsò cìvwà ne cyà kwenzeka pa buloba bwà—bwà cikondo cyà Èkèleeziyà. Pashiishe paanyimà pàà bikondo byà èkèleeziyà bimanè kujika, tudi tusangana dibà adi ne Yone ûvwa cifwànyikijilu cyà mwena kwitabuuja mulelèlà yônsò ewu wikalabu mwà kutumina dîyì kùdì Kilistò bwà kubànda Muulu. Neyà bushuwà anyi? Mutumina dîyì ne: “Bànda kuulu eku.”

³⁹ Nènku tudi tusangana ne Dîyì dyàkaakula nendè adi dîvwa n’Dîyì dyà mpungi, dijìkuke, disungùlùke, ne dîvwa n’Dîyì dimwèdimwè dyàkaakula nendè panu pa buloba adi. Nwamònù’s, pàvvà Ye ànu munkaci mwà biteekedi byà myêndù mwandamutekète byà ngôlò abi, Ùvwa wàkula ne... anyì wàkula *kuumukilamù*. Kaa, ndi munange aci’s ne: “wàkwila mu biteekedi byà myêndù.” Nwamònù’s, Yéyè ûvwa mu biteekedi byà myêndù, mwikàle wakwila ne Èkèleeziyà Wendè mu byôbì. Pashiishe pàvvwa cikondo cyà èkèleeziyà cijike, Yéyè wàkashiyà buloba ne wàkabànda e kubwela mu Maulu ne Wakabiìkila Bapikula Bèndè Nendè kuulu aku. Kaa, abi kí mbilenga anyi? Ndi—ndi... Kaa, cìdi cyènza ànu ne mwoyi wànyì ùtùmpikè’s.

⁴⁰ Kàdi nwavùlukaayi ne, patùdì tutwàla maalu aa, ndi muswè nangànangà bwà bàcìdì bakùdimwineku mucìmà bu mùdì Mwanèètù wa bakàjì Ina ewu, anyi, ne Ina, èyowà’s we, ne bayendè, ne Rodney ne—ne mukàjèndè, ne Charlie ne bakwàbò abu, bwà kuumvwabo ne maalu aa, ne bààbûngì bàà ku nwénù bansonga bàcìdì babwelelákù mu Mukalenge aba, bàdì kabàyì banji kwenda ntàntà mule mu njila ewu, baMulabule nàka ne bamònè ne Yéyè mmwîmpè ne wa ngâsà. Mpindyewu, mònaayi eci, ne bintu bitùdì twakula ebi, citùdì tuteeta kwenza nkushindamija diitabuuja dyènù, bwà ne pàdì Nzambì wàmaba cintu kampànda cìdi ne cyà kwenzeka. Kacyèna ànu mwà kupangilaku to! Nànscha byôbì ne... Bidi mwà kumweka ànu bu ne bìdi mu ntàntà wa mùliyô mujimà wà kilomèètà... ne kabìyì mwà kwenzekaku to, kàdi Nzambì neàbyendeshe ànu bîmpè ne neàbìfikishè ku dyenzeka. Nènku Yéyè ùtu wenza nànkú bwà kukwela diteeta.

⁴¹ Tàngilààyi cyàkambilà Ye Abraham. “Angata mwanèèbè wa balùme ùbandè lwà ku lusongo lwà kakùnà eku ùmushipe,” paanyimà pàà yéyè mumane kumwindila munda mwà bidimu makumi àbìdì ne bìtaanu. Ki kwamba Yè ne: “Bànda nendè kuneeku ùmushipe.” Kàdi mmunyi...? “Nènkuuvwijè taatù wa bukwàbisàmbà.”

⁴² Nènku Abraham, ne bidimu lukàmà; mukàjèndè, ne makùmì citèèmà; mwiine awu mwanààbù umwèpelè... Piinè

apu Abraham ùkaavwa wìpacila ku bidimu lukàmà ne dikùmi ne bìtaanu. Ki kwambayè ne: “Mmunyì mwikalàye, mmunyì-mmunyì mùdici mwà kwikala? Pìikalàbi ne mêmè ewu, muntu mununu, mununu ànu mündì emu, ne mwindile munda mwà bidimu makumi àbìdì ne bìtaanu... Udi mumpèeshè mulayì pâmvwà ne bidimu makumi mwandamutekète ne bìtaanu, kàdi's ki mêmè ewu ne lukàmà bulubulu. Ne Sarah ùvwa ne makumi àsambòmbò ne bìtaanu, kàdi patùdì twakulangana apa ùkaadi ne makumi citèèmà. Munyì? Paanyimà pàà twêtù bamanè kupeta mwine mwânà ewu... Ne Wêwè kungambilà kale wàwa, kùkaadi bidimu makumi àbìdì ne bìtaanu pâncìvwà ne bidimu makumi mwandamutekète ne bìtaanu apu ne, mvwa ‘ne cyà kupeta mwânà awu’ paanyimà pàà mêmè mumane kusòmba ne Sarah bidimu byônsò ebi, mvwa nkumba ne yéyè ùvwa kàyì mwà kwimita to. Nànku mmunyì dìbà adi's? Kàbìdì, Wêwè kumpèesha dimiinu ne kumuvwija mukùmbànè mwà kwimitaye, ne pashiishe kulwa kutùpèesha mwânà ewu. Ne tudi bamukoleshe mwab'ewu too ne ku bidimu dikumi ne bìtaanu, ne ku mwine mwânà ewu Wêwè wâkamba ne Newikalè mwà ‘Kubènesha bàà Bisàmbà byà bendè ne ditunga dyônsò pa buloba,’ ne kumuvwija taatù mene wa bàà Bisàmbà byà bendè, kumuvwija taatù. Pashiishe mu bikondo bìcìlwälwà, Mukalenge, ne Neùmvwije taatù wa ditunga ne ditunga dyônsò mwinshi mwà maulu ànu ku mwânà ewu. Nènku ku mwânà ewu kùvwa mwà kulwa Mupikudi, ne ku Mupikudi awu uvwa mwà kupikula bukwàbantu bujimà. Neùcyéñzè bìshi, Mukalenge?” Aci kacivwa meeji à Abraham to, kacivwa lukonko lwà Abraham to. Ditungikila! Kaakamba ne: “Newénzè ciine aci bìshi?”

⁴³ “Ki ncintàngile mêmè to. Wêwè ngwâkacyàmba, pa nànku ndi mumanyè ne Dîyì Dyèbè ndyà cyà bushùwà, bu Wêwè mwà kulama Dîyì Dyèbè bwànyì mêmè ne mwikalè mwà kundeeja aci pâmvwà ne bidimu makumi mwandamutekète ne bìtaanu apu; pawàkambiikila ne kwamba ne: ‘Tapuluka ne enza lwendo uye mu buloba bwensi,’ ndi mu buloba ebu kukaadi bidimu makumi àbìdì ne bìtaanu. Muumuke, muntu mununu, musòmbe ne mukàjì ûndì musòmbe nendè kacya ànu pàcivwaye mwânà wa bakajì apu, wa bwalu mwikalè mwakunyàanyì wa bakajì mukwàtatwânyì. Nènku pashiishe ndi musòm-... cikondo cyônsò eci. Ne Wêwè kumpa mwânà ewu Ûvwà mulaye; mêmè kumupeta bu mufùmine ku bafwè. Nènku Wêwè mwambe bwà ‘kumushipa.’ Udi ne bukolè bwà kumujuula kàbìdì ku bafwè.” Kaa, ekèlekèle! Ki mùshindù ngwôwò awu, ki cyôcì aci. Ne Yéyè wâkacyènza.

⁴⁴ Nènku mmwenze ànu utùmikila Nzambi mu kaabujimà, kukokaye nsuki yà Izàkà kuyumusha mu mpàla, kupatula keelè bwà kushipa... mwanèndè mulela, mwanèndè umwèpelè mulela. Nzambi ùvwa uléeja citembelu, mwikalè ùtùleeja. Cyàkenzelà Ye aci ncinyì? Kabivwa bìkèngela bwà kucyènza Yè

to. Kàdi Yéyè wàkacyènza mu mùshindù wà ne wêwè ne mêmè, bwà twamóna mwà kutàngidila pa bintu ebi mu ditükù dyà mídímà dyà dikwacisha bwôwà edi mùdì myoyi yà bantu myûle tèntè ne bubì, bwà twamònaku mwà kumanya ne Nzambì ùtu ûshààla mukwàtè ku mulayì Wèndè. Nànsha byôbi bìmwèka kabìyi bikùmbàne bìshi, nànsha byôbi bifwànyìne kwikalà byà kabìyi mwà kwenzeka bìshi, Nzambì ùcìdi ànu ushààla Nzambì ne Ùtu ûshààla mukwàtè ku mulayì wônsò wùvvwà Ye mufile awu.

⁴⁵ Ki cîndì nteeta kunwàmbila patùdì biimane kaaba aka mu mudimu wa dyondopa ewu. Nwimana apa, nwamba ne: “Ndi nsaama.” Nènku nwénù... Aci kakùyì mpatà to, udi usaama. Kàdi Nzambì ùtu ushààla mukwàtè ku mulayì Wèndè! Pashìshe Yéyè neàtùuluке. Mpindyewu, nwamònou’s, Yéyè wakenza difuta dyà cibawu mwab’ewu bwà Yéyè–bwà Yéyè kukwondopa. Ki cidiYe mwenze. Mpindyewu, cintu cìmwèpelè cìdìYe ukulòmba bwà kwenza nkwitabuuja cyôcì aci, kushààla mukwàtekù ànu mwakenza Abraham amu.

⁴⁶ “Èè, ngàngàbuka mmwambe ne nêngìkale–nêngìkale kàbìdì ne mwoyi ànu ditükù dìmwè cyanàànà.”

⁴⁷ Kabyèna ne bwalu to. Abi mbímpè, s’ki cyônsò cìdì muntu awu mumanyè, s’ki cyà citàmbe bwímpè cìdiye pèndè mumanyè. Mmunyì mùvwa Abraham mwà kupeta mwâñà ewu paanyimà pàà munanè kumulààdika kaaba aka, ne Dîyì dyà Nzambì dimwambile bwà “kuya kashipa nsongààlùme awu”? Mmunyi mwacyénzayè’s? Kî ng’aci cìdì ne bwalu to. Nzambì ngudi mwambe bwà kucyènza ne aci’s ncikòse bwalu. “Nêngúmvwè bímpè bìshi pààbì ngàngàbukà mwâmbe ne ncyêna mwà kuumvwa bímpè?” Ndi... abu kí mbwànyì... kí mbutàngile to; bwalu bùdi nkwangata Dîyì dyà Nzambi. Nènku pàdì ànu aci cikubuulwila ne neúmvwè bímpè, pa díbà adi vùluka–vùluka ànu ne neúmvwè bímpè. Kakwena cintu nànsha cìmwè cìdì mwà kukupangisha to. Ncyà bushuwà. Nwamònou anyì?

⁴⁸ Nànku pààkatùmikila Abraham mu kaabujimà... Yéyè neàcyénzè bìshi? Cikondo cyà ndekeelu, tusunsa tùtaanu twà ndekeelu kulwatù, tusunsa tùsàtù twà ndekeelu, tusunsa tùbìdì twà ndekeelu, kasunsa kàmwè kàà ndekeelu, tusùnsukila makumi àsàtù twà kasunsa twà ndekeelu, kasùnsukila kàà kasunsa kàà ndekeelu, pàkaavwa cyanza cimana kujuula bwà kuumusha mwoyi wà nsongààlùme, Nzambì kwamba ne: “Imànyikà ànu mwaba awu. Imànyikà ànu mwaba awu, wamònou’s. Ndi mmòna ne wêwè udi uNgeeyemena bulelèlè. Mpindyewu, ndi mwenzè cyôcì eci, Abraham, ànu bwà kuleeja Branham Tabernacle mu matükù àcìlwàlwà, nwamònou’s, cìdì munkacì mwà kwenzeka aci, bwà ne bâdi ne cyà kuNgeeyemena. Kabèènaku ne cyà kuNgeela mpatà nànsha kakesè to. Ngeeyèmenaaayi Mémè!”

⁴⁹ Ànu bu pa diine díbà adi, yéyè... Ki mulambu ewu pwàà,

yéyè kààkacyènzakù cyanàànà to. To, kààkacyènzakù cyanàànà, bwalu ànu pa dîbà adi mene mù—mùkòòkò kudilawu bee bee, cimpàngà cikesè cyà mùkòòkò cìvwa ciswikila mu cipèèlà amu ku nséngu aku. Nènku mmisangu bûngì kaayi yitùdì bayiishèyìishe cyôcì aci. Cimpàngà cyà mùkòòkò aci cyàkafika mwaba awu bishi? Mmunyi, munkaci mwà nyama yônsò yà cisuku ayi? Mu kilòmèètà lukàmà ne makumi àsambòmbò kule ne bantu, munkaci mwà nyama yà ntambwe, mibwàbwà, mbwà yà diitu, ne mìshindù yônsò yà nyama yà cisuku muntwamu, lwà kuulu kwà mukùnà aku kùdì kakùyì ní mmâyì anyì mashinde, cìvvàci cyènza kuntwaku ncinyi? Nzambi ngwàkacifuka, kucítèèka ànu mwaba awu.

⁵⁰ Ne pa kuMumònà mu matùkù ètù atùdì ne mwoyi aa! Mpindyewu, mu dìndà emu nebikèngele bwà ngënèzè bintu byàbûngì byànyi—byànyi sungsunga anyì kubyàmba, bwà kufika ku cindi muswè kwamba aci. Ki bwà cinyi ndi ncishindamija mu mûshindù úndì ngenza ewu, kumpàla kwà kubanga cyôcì eci. Ndi muswè bwà nwénù kuumvwa ne bintu bìdì byumvwika byànyi byà sungsunga ebi, kí mbwena kwamba ne mbyànyi sungsunga to. Mbitwàdìlbwemù ànu bwà kufila cileejilu kunùdi bwà diatabuuja dyènù dyàmònà mwà kwikishiladi kakùyì tuseku to mu diatabuuja dìdì mu Kilistò adi, wêwè udi mufwànyìne kwikishila pa mulayì Wèndè. Bwalu Nzambi ùtu ûshààla mukwàtè ku mulayì Wèndè ànu bipwàngànè ne mwàbì mwônsò, mpindyewu mwikàle ùtùleeja.

⁵¹ Nènku tàngilàayi *Yèhowàh-yilè* ùmwèùmwè awu, mwàkàMubìikila Abraham amu, udi mu cyena Ebèlù ùmvwija ne “Nzambi neàDìlongolwèlè Yéyè mwine mulàmbù.” Nzambi ùdi mwà kwenza nànkú. Yéyè wàkenza njila Wendè. Piìkalabi ne Yéyè wàkamba... Wàkambilà Noà...

⁵² Wêwè udi wamba ne: “Èè, aci’s civwa ànu ng’Abraham.” To. Yéyè mmwambe munda mwà bikondo byônsò, ne Ùcidi ànu munkaci mwà kwamba.

⁵³ Wàkambilà Noà kale wàwa, mutwàbwelamu mu dìndà emu, ne: “Mònà’s, mvùla neàlokè.” Mònà’s kakùvwaku... kacya kakùvwaku divuba mu dyulu to. Musùlu mutàmbe bunène wa mâyì ùvwa nditàmbà dyàkamyaminà naadi Nzambi buloba adi, kasùlù kakesè kàà mu mwaba kampànda. Ki cìvvà musùlu mutàmbe bunène wà mâyì ùvwaku’s.

⁵⁴ Mpindyewu, bantu bàdi bàmba ne: “Kacyapu mmunyi mwikalaku mâyì kampànda mwà kufùmina muulu mwàmwa? Ndejààyibi kùdîwu muulu mwàmwa mùdì dîbà dyôsha amu, piìkalaku kakùyì nànscha kamata muulu amu.”

⁵⁵ “Piìkalabi ne Nzambi mmwambè ne: ‘ibàkà bwâtù, bwalu mvùla ùlwalwà,’ bwànyì mbwà kwibaka bwatù ne kudilongolola, bwalu ùlwalwà. Yéyè údi *Yèhowàh-yilè*, Údi mwà kulongolola mâyì kuulu aku.”

⁵⁶ Nènku cintu cìmwèpelè cyàkenzà Ye nkulekela muntu, mukùtakàne, muntu mucimbàkàne awu, wènza menemene ne maalu èndè à mamanya awu, bwà kufikisha ku dyenzeka cìvwà Ye mumanyè ne ki cìvwà mwà kwenzeka aci. Nzambì kacya kàtu mubutùle buloba to; muntu ngutu ubùtula buloba. Nzambì kàtu ùbùtula cintu nànsha cìmwé to, Nzambì ùtu uteeta bwà kulaminyina bintu byônsò. Muntu ngutu udibùtula nkaayendè ku dimanya dyèndè, ànu mwàkenzaye mu budimi bwà Edènà ku muci, ne bikwàbò. Nànku awu mukoleshì wa maalu kampànda ùdi ùtwa byanza pa bukolè kampànda bwà kapwìshipwishi, mwaba kampànda, ùdiye ubùpetela awu.

⁵⁷ Bàvwa—bàvwa dîbà adi mwà kukwàta naabù mudimu, bwalu dîbà adi bàvwa mwà kwenza naabu bintu bitùtù kacya katuyìku buumvwe bâtelea nànsha. Katwèna banjì kuya kumpàla kutambilila to. Bidi mwà kwangata bidimu bìsàtù anyì binaayi, anyì bipìte apu, kumpàla kwa twétù kucyènza, bwà kwenza cyàkenzàbo aci. Bâàkii baka bipaapu byà misàkà ne lupìngù lunène lwà mutù wà ntambwe ne bikwàbò. Katwènaku nànsha mwà kwenza aci to. Katwènaku mwà kubyènzulula to, kakwèna mùshindù wà twétù kucyènza to, amba ànu twétù bapetè bukolè bwà tupwìshipwishi. Bukolè bwà kasòloonyi, bukolè bwà nzembu, kabyènaku mwà kujuula nànsha dìmwè dyà ku mabwe manènaanènàale awu to, kabyènaku mwà kubijuula pansi to. Ne àmwè à kù wôwò àdi bule bwà ntàntà wa kupità misèèsù yìbìdì, bitwè ne muulu mu lupeepèlè, ne bujitu bwà miliyàlà yàà kìlò. Bàvwa bààfikisha too ne kuulu aku bìshi? Nwamònú's, bàvwa bamanyè.

⁵⁸ Kàdi bàvwa baàlekelela, muntu kampànda mulekelela bùmwè bwà maabombe à tupwìshipwishi awu bütayikila mu lumwenu lwà mukwàbò muntu, kale mu matùkù awu, bwalu: “Ànu mwàkadibi mu matùkù à Noà,” ànu mwàkadibi amu, dishidimuka dyà mùshindù awu adi, bantu bàà meeji matwè bàà mùshindù awu abu; “ànu mwàkadibi mu matùkù à Noà, ki mwìkalàbi kàbìdì, ki mwìkalàbi kàbìdì ku dilwa dyà Mwânà wa muntu.” Dyenzuluka dyà cìvwàku's! Nwamònú anyì?

⁵⁹ Mwab'ewu kí nkwanjì kwenza matùkù to kujuulabo cikezudi cyà mâyì cyà cyena-leelù, cìvwa cìsanganyiibwa mwinshi—mwinshi lwà mu Mexique emu kumpàla kwà mvùla wa Noà. Nuwwa bacimòne anyì? Cìvwa mu cibèjibeji, mùvvà cikezudi cyà mâyì ànu mùdì citùdì naaci mpindyewu eci, cìvwa citùkinyijìbwè mwinshi mwà buloba menemene; cintu kampànda cyà tupwìshipwishi cìvwa cicijìngile. Kutaayikaci ne kumwangalaka mùshindù awu. Nwamònú anyì?

⁶⁰ Mpindyewu, “ànu mwàkadibi mu matùkù à Noà,” bantu bàà meeji matwè, bantu bàà meeji matwè ne makolè àbo à tupwìshipwishi ne bikwàbò byônsò, bàvwa mwà kwibaka bipaapu byà misàkà ne mpìngù minènè yà nyama yà ntambwe ne bikwàbò. “Ànu mwàkadibi mu ditùkù àdi, ki mwìkalàbi kàbìdì.”

Kàdi bìdi bìkèngela bwà mudimu wùkòsolojiibwè mu ditùkù edi, bwalu kùdi ne cyà kwikala cisàmbà Cyambwìbwe cìikala mwà kuumushiibwa. Ànu bu Henòkà, kùdi ne cyà kwikala bantu bátùntumunyiibwe. Tudi mu musùmbà awu mu dìndà emu, bantu bàdì batùntumunyiibwe bu mwàkambudiibwa Noà pa nkwaka wa mâyì.

⁶¹ Kàdi vùlukààyi ne, kumpàla... Kanùpu eci mwoyi to! Kumpàla kwà dimata dìmwè dyà mvùla kumatadì, kumpàla kwà kwikalaku cintu cìmwè mu dyulu, kumpàla mene—mene kwà Noà kujikijaye bwàtù abu, Henòkà wàkangaciibwa Kumbèlu. Henòkà wàkambwibwa kàyi mumòne lufù to, kutwàdijaye ànu kwendakana ditùkù kampànda, ne—ne dikòkiibwa dyà kùdì buloba kupangiladì kumulaminyina kwàdì pansi. Ki kudisanganaye ne dikàsà dìmwè dibànde ndambù, ne dikwàbò dikàsà dìtambe kubanda ndambù, ne dikwàbò dikàsà dìtambe kubanda ndambù, nènku katancì aka, yéyè kwamba ne: “Buloba, wàwawèè.” Kubandaye ànu mutàngile mu Butùmbi.

⁶² Nènku Noà mmwenze ànu ukènzakana kàdi kàyì mwà kupeta Henòkà mwaba nànsha ùmwè to, yéyè kukenzakana kàdi kààkamanya kùvwa Henòkà muyè to, ki kwambayè ne: “Dìbà dyákànyì dyà kwibaka bwàtù mpindyewu.” Nwamònou anyì? Ki kuditwayè ku mudimu wà bwàtù bwà kukambula bàshaàdilè abu.

⁶³ Ncintu cìmwècìmwè aci cìdi cyènzechka mwaba ewu mene. Èkèleeyiyà wàkangaciibwa muulu mu Dyulu, ne mpindyewu Yone mmubàndishìibwe Nendè bu cifwànyìkijilu cyà babìsshìibwe ku lufù, bu mutùvvà bacyàngate makèèlèlà diloòlò awu. Ne kujandula ne Dìyì dìmwèdìmwè dyàkamutùmìnà dìyì bwà kutàngilaye paanyimà pa buloba adi, dìvwa n’Dìyì dìmwèdìmwè dyàkamutùmina dìyì bwà kubandaye adi.

⁶⁴ Kaa, mwena Kilistò yônsò! Ànu Dìyì diine adi, Charlie, dyàkakutùminà dìyì dìngà ditùkù mu Kentucky mwàmwa adi, ne “Kùdimukà,” n’Dìyì dìmwèdìmwè dyàkutumina dìyì ne: “Bànda kunu!” Kwènakù ne disàンka bwà bwalu abu anyì, Mwanèètù Evans? Dìyì dyàkamba ne: “Kùdimukà,” Dìyì dìmwèdìmwè adi kwambadì ne: “Bànda kunu!” Kaa, ekèlekèle! Mwaba awu, dibììkila kaayi’s wè! Mbwalu bulelèlà kaayi’s wè! Dijikùke, disungùlùke bu mpungi ne: “Kùdimuka, uNkwacile mudimu! Bànda mwaba ûNdi ewu.”

⁶⁵ Mwaba awu tudi bamumònne uléeja mpàla wa aba bààkafwà, Môsà bwà kuleeja mpàla wa bansantu bafwè; babììke. Eliyà, ne cisùmbù cyèndè mu ditùkù dyà ndekeelu, ne cisùmbù cyèndè cyà Bambwìbwe biimàne mwaba awu. Bwônsò kumpàla kwà Mukalenge Yesù! Yone ngwâkabuulula aci... Yesù wàkabàmbila ne kàvwa—kàvwa mwà kufwà to, ne bwàbù mbunganyi bu yéyè mwà kushààla ne mwoyi too ne kudimònà dyà dilwa Dyèndè. Ki bayiidi kutùùlabo dìyì.

⁶⁶ Kaa, mvw'a kujinga ngiikalapu mwà kwondola menemene, menemene mpindyewu's, bwà tusunsa tukesè, bwà èkèleeyìyà. Muntu yônsò ewu's mmumanyè... Ne muntu yônsò ewu's ùtu ne nsòmbelu wa—wa pàà nkààyende ne Nzambi. S'mbwalu bwà muntu-nkaaya, maalu à Nyumà àdì àkubweja mu myaba yûdì kùyìku mwà kudidinga nànsha mwà kwakula bwàyì to.

⁶⁷ Ngämònu cyôci eci mu mudimu wànyì mukesè wa bwambi, mupwekèle, ne kùdi misangu yàbúngì yindi ngàamba cintu kampànda kàdi nciyì mumanyè ne mbwà cinyì ndi mucyàmbè to, ne kacyèna cìmwèka címpè to (Kàdi nànsha nànkü, muntu kampànda neàmbè cintu kampànda.), kàdi nêntangilè bwà kumònà ne cintu aci neclwe ànu cipwàngàne menemene mu cyôci aci ne mwàci mwônsò. Nzambi neàcifikishe ku dyenzeka's! Pândì muswè kwamba cintu kampànda, nêngàmbè ne: "Èè, mpindyewu, anji indila kakesè. *Mulùmyàna* awu, *kampànda*, *cikampànda* eci necyènenze lwa mwab'ewu, mpindyewu aci—aci cidi ne cyà kwikalà ànu mùshindù awu." Èè, mu bushùwà bwà bwalu, ncyêna—ncyêna mumanyè ne mbwà cinyì ndi mucyàmbè to. Kàdi katancì aka, bìdi ànu mùshindù awu. Nzambi ngudi ucyènza!

⁶⁸ Mpindyewu, pààkambà bayiidi aba ne: "Kaa, Yesù wàkamba ne 'muntu ewu kî mmufwànyine kufwà to.'" Yesù kààkambakù aci to.

Yesù wàkamba ne: "Bwènù mbunganyì pììkalaye mushààle ne mwoyi too ne paNgààlwà?"

⁶⁹ Kàdi pa kumònà bayiidi batùùla dîyì adi, dîbà adi Yesù kwololaye cyanza e kwangata Yone ne kumubandisha ne kudyanjila kumulabwija cintu cyônsò nkòòng, kumònaye kààdyosha kàà Dilwa dyà Mukalenge. Yone wàkamònà Èkèleeyìyà, wàkamònà ndekeelu wa cikondo cyà Èkèleeyìyà, wàkamònà ndekeelu wa beena Yudà, wàkamònà Dilwa Diibidì, wàkamònà bulondyanganyi bwônsò abu.

⁷⁰ Kàdi tàngilàayi cyàkakèngelabi bwà Nzambi kwenza; kumusabishabo mu màfutà munda mwà mêbà matwè ku makumi àbìdi ne ànaayi kuntwaku, bwà kubafikisha ku dimònà ne yéyè ûvwa wa Nzambi, ne Nyumà wa Nzambi ûvwa mulaabe mu—musùkà... (cyà pambèlu aci, cyà ku buloba, anyì mwônsò munwàcìbìkila amu, mubidi wa buntu awu), ûvwa mutambé kuwènzejà mu Bunzambi mu mùshindù wà ne mafuta àvvwa asaba ne luuya lukolè munda mwà mêbà makumi àbìdi ne ànaayi awu kaàkamufyondola nànsha dikòbà to. Bateeta kupatula Nyumà Mwímpè mu muntu ku dimusabisha pèèkù; kanwèna mwà kwenza aci nànsha. Pashìishe kumwela mu cisanga cyà Paatèmò, ki kufundaye Mukàndà, ne kwalukilaye ne kuyiisha munda mwà bidimu mulongolongo. Hmm. Hmm.

⁷¹ Mu bushùwà bwà bwalu, mpindyewu, byàkakèngela bwà kwambulayè dînà dibì ne: "Yéyè ûvwa mwena lubùku, ûvwa

muloji." Mbanganyì bàdì bamanyè ne Yone wàkabiìkidiibwa ne mmuloji? Kakuyì mpatà to! Yesù wàkabiìkidiibwa nànku, yéyè pèndè. Nwamònù anyì? Nwamònù's, bàà pa buloba kabèèna ne cidìbo bamanyè pa bintu ebi to. "Yéyè ùvwa mubadi wa meeji à bantu." Nwamònù anyì? Bààkamba ne "Yéyè ùvwa muloji wa dikèma mu mìshindù wà ne wàkakika ne màfutà awu, bwà ne màfutà kaìkadiku mwà kumwôsha to bwalu ùvwa muàkikè," ànu bwalu kàvwa yéyè ùpetangana ne mmwènenu yàbò yà cyena Kàtòlikè ayi to. Kwàjiki.

⁷² Yéyè ùvwa musadidi wa Nzambì uvwa... mudipwekeshe, ùvwa ne kaacitanda kakesè kuntwaku kàvwaye mulame. Kàvwa mwà kutwala bintu binène byà kale abi to, ki Nzambì ànu kumulama ne kumulaminyina. Ki mwàkenzàYe nànku: Martin Munsantu ne—ne Irénée, ne bwônsò munda mwà bikondo byônsò abi.

⁷³ Ne Yéyè ùdi munkaci mwà kwenza cintu cìmwècìmwè aci leelù ewu, ùtùùluka buludì. Mpindyewu, kanùpu mwoyi eci to, cyà ne Nzambì wàkalaya dinyukushiibwa dinène, ne byenzedi binène, byà bukolè. Mpindyewu, fûndaayi eci pa tubèjì twènù tunùdi nufûnda atu (Nwamònù's. Nwamònù anyì?), ne cìdi muntu ubìikila ne "nciyà bukolè ne cinène aci," Nzambì Yéyè ùdi ucibìikila ne "Ncikùtákàne!" Kàdi cìdi muntu ubìikila ne "ncikùtákàne," Nzambì ùdi ucibìikila ne "Cinène!" Kanùpu aci mwoyi to, nwamònù's, kanùcipu mwoyi to. Aci necinùkwàcìshèku mu bidimu bìcilwalwà, bwalu tutu bindile cintu kampàndà cyà citàmbe bunène dìbà dyônsò. Ne tudi munkaci mwà kupeta cyà citàmbe bunène dìbà dyônsò, kàdi bantu bâà pa buloba kî mbacimanyè to. Anyì kabàvwa bacimanyè mu matùkù à Noà to, anyì kabàvwa bacimanyè mu matùkù à Yone to, mu matùkù à Yesù, mu matùkù à bapostòlò, mu matùkù à Irénée, ônsò à ku matùkù awu, bôbò kabààkacimanyaku to.

⁷⁴ Nànsha mene Jeanne d'Arc, s'ùvwa mukàjì mukesè, munsantu. Pàvvàye ànu mwânà wa bakàjì, Nzambì kwakula nendè mu bìkèèna-kumònà, ne Mwanjèlò kwakula nendè. Nudi bamanye cyàkambà èkèleeyìya wa Kàtòlikè anyì? "Mmuloji." Kàdi kumutèèkabo pa dikunji dyà cyoshelu ne kumwôshabo kufwàye, mwàkenzàbo kùdì baansaserdòsè bâà cyena Kàtòlikè amu; kumushebeya, kukòsabò cibawu cyà lufù lwèndè bu "muloji," nènku Jeanne d'Arc wàkafwà bu muloji. Paanyimà pàà bidimu bitwè ku nkàmà yìbidi, kusanganabò ne yéyè kàvwa muloji to, ùvwa muysiidi wa—wa Kilistò.

⁷⁵ Bâàkenzela bansantu bwônsò cintu ànu cìmwècìmwè aci. Yesù wàkamba ne: "Nganyì wa kunùdì ùdi baatwatwènù kabàyì bakèngeshe? Nganyì wa ku bapròfetà ukààdikù mulwè uvwabò kabàyì babènge?" Yéyè ne: "Bimanu bilaaba lupemba naanyì's nwê." Yéyè ne: "Nudi—nudi nupweka ne—ne nulengeja pa mpàla pàà nkità yà bapròfetà, kàdi's nwènù mene's ki bâdi

babèèlemù's." Hmm! Ekèlekèle! Ekèlekèle! Nwamònou anyì? Yéyè kààkabàlaabakù maanyì to. Hmm! Yéyè wàkabambila ànu nàka.

⁷⁶ "Lukongo lwà nyoka elu," mwàkamba Yone, "nganyi wánùdimwiji bwà kunyeema ciiji cikolè cìlwalwà? Kanùbangi kwamba ne nudi ne Abraham bu taatù wenù to." "Twêtù tudi beena malongolodi kampànda, manène."

"Udi mwena Kilistò anyi?"

⁷⁷ "Kaa, mêmè's ndi Méthodiste. Ndi Presbytérian. Ndi mwena Mpenta." Aci kacyènamu to nànsha kakesè. Aci kacyèna ne cyà dyenzamù kutàmba—kutàmba—kutàmba—kutàmba—mùdì nèjè kàyì bwalu ne nsèsè yà dìbà to. Nwamònou anyì? Kacyèna bwalu naaci to. Pawìkala mwena Kilistò, udi musadidi wa Nzambì mulediibwe cyàkàbidì.

⁷⁸ Mpindyewu, mpindyewu, pààkalwà Yone, tuvwa bacimònè makèèlèlà dilòòlò awu. Mpindyewu, vùlukààyi ne, panùdì nufika ku cyôci eci...Bwà dyumvwija dyà bwalu, mêmè—mêmè ngänwâmbidì dìbà adi. Nwavùlukaayi ne, bàà pa buloba bâdi munkaci mwà kupeta dinyùkishiibwa dyà ditàmbe bukolè ditùbo kabayì banji kupetakù to, mpindyewu mene, èkèleeziyà wa pa buloba.

⁷⁹ Mpindyewu, vùlukààyi ne, kakuyì mpatà to, mu matùkù à—à Yone, matùkù à Yesù, kùvvwa mafestò manène ne baakudi banène mu matùkù àbo awu, bantu banène bàà mamanya à mu mitù, nènku bâvwa bakoka makumi à binunu ne binunu byà bantu. Kaayifa mmufwànyìne kwenza cinyì bu yéyè mwà kubììkila ci—cisangilu? Yéyè's ùvwa mwà kufikisha Yélusàlèmà mujimà awu, ùvwa mwà kukùngwija Izàlèèlà yônsò pàmwè, kuumukila ànu eku ne eku. Ne bwônsò bwàbò bàmba ne: "Kaa,"

"Mpindyewu, bu Kaayifa mwà kwamba bintu *kampànda*, abi's nebiìkale binène byà dikèma."

"Kaa, udi witabuuja Mifùndu anyi, Laabì, Révérend, Docteur, Mwepiskòpò? Udi witabuuja Mifùndu anyì?"

"Cyà bushùwà, mêmè ndi ngiitabuuja Mifùndu, mêmè's ndi mumanyi wa dibàla mumanyike bîmpè!"

⁸⁰ "Èyo. Mpindyewu, Bible mmwâmbe mwaba ewu ne nekùlwè cikondo cìkalàku, 'Mikùnà yônsò neyìtupikè bu twânà twà bimpàngà byà mikòòkò, mabeji wônsò neàtuutè bikàshì, ne myaba yônsò mitùmbùke neyìpwékeshiibwè ne yìvvijiibwa mipwekeshiibwè, myaba yônsò ya mipwekèle neyìbandishiibwè ne yìvvijiibwe mitùmbùke. Ne necyènjiibwe ku dîyì dyà ewu udi wela lubila mu cipèèlè.' Udi witabuuja aci anyì, Laabì, Révérend, Docteur, Mpaasàtà?"

"Cyà bushùwà, mêmè ndi ngiitabuuja aci!"

"Necyènzekè munyì?"

⁸¹ “Kaa, Nzambi neàtume muntu wa bukolè pa buloba dîngà ditùkù. Kaa, yéyè’s neìkale munène. Yéyè neikalè dîyi dyà ewu udi wela lubila mu cipèèlè, anyì yéyè neàdyanjidile Maasiyà uvwa ne cyà kulwa awu. Nènku pààlwàye, kakuyì mpatà mu meeji àanyì to ne yéyè neàtùùlukè mu Dyulu ne neàtùùlukè ku ntempèlù. Yéyè neàtùùlukè buludì ku ntempèlù eku, wàmба ne: ‘Mpindyewu, netwàngatè beena Loomò bwônsò ne kubàtuuta too ne ku lufù. Kwajiki. Netùyobeshè beena Loomò bwônsò abu.’ Ne—ne pashìishe neàmbè ne: ‘Tùùlukàku, Maasiyà!’ Ne Maasiyà neàtùùlukè, nènku netùfwimbe kùpèkupè yètù yônsò kuyìsaka... anyi myelè yètù yà mvità netuyenze nsesu ne kùpèkupè, nènku kakwàkwikalà kàbìdì mvità to.” Nènku, uh-huh, ki dyumvwija dyàbò ndyôdì adi’s.

⁸² Kàdì cyàkenzekà ncinyì pààkalwaci? Cyàkenzekà ncinyì? Kakuvwaku dileejibwa dyà Dyulu, dìvwàbokù bamònè to; dìvwakù, kàdì kabààkadimònà to. Kabààkadimònà to. Nwamònù’s. Ndibà kaayi dyàkatupikà mikùnà yônsò bu twâna twà bimpànga byà mikòòkò? Ndibà kaayi dyàkapwekelelà myaba mitùmbùke yônsò ne dyàkabàndà myaba mipwekele? Muiishi kampànda wa kale wa kwìsù kushitákàne wàkalwa ùpatukila mu cipèèlè wa bwalu kàyì mumanyè nànsha i to. Bilondëshile maalu-malonda, wàkaya mu cipèèlè pàvwaye ne bidimu citèèmà kàdi kàkamwenekaku kàbìdì to too ne pàkaavwàye ne bidimu makumi àsàtù. Üvwa ùdyàngana ànu ne mpasu ne bwicì bwà mpàta. Mpasu ayi’s mbedi, mbedi yèbè yà milemile ayi.

⁸³ Bàtu bàyìdfa dîbà dyônsò edi. Èè, nudi mwà kuyìsùmba ànu muneemu emu mu... Kanwediku meeji ne mmbibì to, bwalu nudi mwà kuyìsùmba ànu muneemu emu mu mìkàjinyì à byàkudyà nwénù naayi dijinga, bânà bàà mbulùbulù, bwicì bwà mbulùbulù, mpasu, nyoka yà nkànga, cyônsò cinùdì baswè aci, nwamònù’s.

⁸⁴ Pa nànkú ùvwa ùdyàngana ànu ne mpasu ne bwicì bwà mpàta. Ncyàkudyà kaayipu’s wè! Kàdì ùvwa mulamìbwé kùdì bukolè bwà Nzambi. Kàvwa ùvwala bilàmbà byà nshingù wa nkoolò abi to; mùvvà muntu kampànda mwambe makèèlèlè dildòòlò awu, Mwanèètù Parnell anyi umwe wa ku bôbò. Kàvwa mulwate cinkùtù cileepa, ne byônsò abi to. Wàkapatukila mu cipèèlè mudìjìngìle cipesè cinènè cyà ciseba, cyà kale cyà mùkòòkò. Anu mùngämbi ne, pàmwápa... Twétù bitu bikèngela kwowa mâyì ku ditùkù dyônsò edi, ne pàmwápa yéyè kàvwa wôwa mâyì kasangu kàmwè mu ngondo yisàtù anyì yinaayi to, lwà mu cipèèlè mwàmma. Ncyéna mumanyè to. Kàvwa wa bâtàmba kutàngila to. Kàvwa ne cyambilu to. Kààkayaku mu bimenga kampànda binènè bwà kwenza tûmpanyè tunènè to. Wàkiimana kuntu kwàka pa nsenga yà ku mwelelu wà Yadènè aku, bitoci bimushiìkidila mu binù, ne kwambayè ne: “Nwénù lukòngò lwà nyokà yà ntòòka nwê, nganyì wänùdìmiji bwà

kunyeema ciji cikolè cìlwalwà?” Hmm. Ki pààkapwekeshiibwà myaba mitùmbùke mpôpò apu, nwamònù’s, ne myaba mipwekèle kubàndishiibwayì. Uh-huh. Èyowà’s, mukalenge.

⁸⁵ Pashììshe, katancì aka anyì, bàvwa batèkèmène ne Maasiyà ùvwa mwà kutùùluka ne Banjèlò ne bikwàbò, ne musòmbele lwa pa cipooyi mwaba awu ne ntempelu uvwàbò baMwibakile bwà kulwamu awu (mutùdì twibaka myaba minène menemene leelù ewu mu matùnga ne bikwàbò). Nwamònù anyì? Kàdi Wàkalwa dìbà kaayi? Wàkacìnguluka umwe ne umwe wa ku nsunàngòngà ayi, dyônsò dyà ku malongolodi awu, ne kupwekela ku cikùmbi. Bôbò mbààkaMwenzeja nànku.

⁸⁶ Ki cidiku leelù ewu aci’s. Bàdi bàMwenzeja bintu, bàmwenzeja bwà kucyènzayè, bamwenzeja bwà kwikala pankaci pàà bukwamàngumba, bwalu Mukenji Wèndè kawèna ùtwa ku cyà dìngumba to. Mukenji Wèndè leelù ewu, muyiishìibwe kùdi bambi Bèndè, ùdi pankaci pàà màngumba bwalu màngumba mmaMwipàte. Bible ngudi mwambe nànku. Yéyè ùvwa usanganyiibwa pambèlu, ùkookola, uteeta bwà kubwela (Nwamònù anyì?), mu èkèleeyìà Wendè Yéyè mwine. Ki mwaba wùdì bwalu ngwòwò awu. Nwamònù’s, bìdi ànu byà mwomùmwè leelù ewu.

⁸⁷ Pa nànku, nwavùlukaayi ne, cìdì cìmweka cinène kùdì muntu, ncikesè kumpàla kwà Nzambi. Mpindyewu, ki bwà cinyì kabyèna bìkèngela bwà kwikala ne bilòngò byàbûngì to. Nènku pàdì Nzambi ùlwa kàbìdì, pàdì Yesù ùlwa kàbìdì, nenùshìtukè, pa kumònà musukwidyanganyi mukesè wa bilàmbà mu mùsèèsù awu. Uh-hum. S’nenùshìtukè’s, mulùmyàànà utu kàyi wàmbaku cintu nànsha cìmwè awu, kacya wàdilaminyina myanda yèndè misokome ne wènda ùnyunguluka kumpàla kwà Nzambi, mudipwekeshe. S’nenùshìtukè. Necìshìtu- . . .

⁸⁸ Mvwa muyiishe ànu àbìdì àdì pansiì aa, ku cilumbulwidi . . . *Dishìtudiibwa ku Cilumbulwidi*. Kabyàkukemesha bwà kumònà mupànyishi wa maala à kapyà kuntwaku to, yéyè’s mmumanyè ne nkuyaayàye. Cyà bushùwà. Kabyàkushitula bwà kumònà mwena mafi, ngèndàmàsàndì, ne bìkwàbò byônsò kuntwaku nànsha, abi kabyàkukemesha to. Kàdi dishìtuka nedììkaleku, ne dyediibwa dyà mâyì ku makàsa, bwà aba bàdì beela meeji ne bàvwa mwà kuya abu; uh-huh, èyowà’s, kàdi pashììshe kubèngiibwabò. Aba bàvwa bàmba ne: “Èè, anji indilabi kakesè tûng, mamwányì ùvwa wa mu èkèleeyìà ewu, tatwányì ùvwa wa mu èkèleeyìà ewu, kakwányì muntu mulùme ne kakwányì muntu mukàjì. Mémè’s ntu cidimba cyà mwômò amu kacya bàndela.”

⁸⁹ “NguuMùkìlaayi apa, nwêñù beena mudimu bàà bubì, Ncìvwa nànsha munùmanyè to.”

⁹⁰ Tàngilààyi mu matùkù pàvwà mukùlumpè mukesè, Simèònà ewu, muntu uvwa kàyi mumanyìke, kàyikù ne luumu to, katwèna

bamanyè kantu nànsha kàmwè bwèndè mu Bible to. Kàdi Bible mmwambe ne: “Bààkamubuulwila kùdì Nyumà Mwímpè,” (S’ki yéyè awu; s’ki bwalu mbwòbù abu.) “bwà ne kàvwa mufwànyine kufwà pàvwàye kàyì mumònè Kilistò wa—wa Mukalenge to.”

⁹¹ Pashiishe tàngilàayi numònè ne Yone Mubatiji ùvwa nganyì, muntu wa mùshindù kampànda wà pabwèndè awu, muntu wa mwitu lwà mu meetu. Cyàkamubuuludiibwa. Wàkapatuka wènda úyiisha Mukenji. Tàngilàayi aci!

Anna mukesè awu ùvwa nganyì?

⁹² Virgo mutekète awu, Mariyà, mu—mu cimenga cyà Nazàlèèta (cyà lonjì ànu bu Jeffersonville) ne mwaba ùvwa mpèkaatù ne bintu byônsò b icyòkwèle, kàdi yéyè ùvwa mudilame mukezùkè bwalu ùvwa mumanyè ne dìngà ditìkù kùvvwa Maasiyà uvwa ne cyà kulwa. Nwamònù anyì?

⁹³ Yòzefù, mukoonyi wa mabaya, ùkaavwa mufwishe mukàjèndè ne—ne ùvwa wèndela mwânà mukesè wa bakàjì ewu bwà kumusela. Nènku civwa mmu ngiikadilu awu mwàkalwà Nyumà Mwímpè. Ne pashiishe bàà pa buloba kulwabo ne kunyangakajabu luumu lwèndè, bu mùdì ne “munsantu mubunguluki wa mu malaba, mwena mpenta.” Nwamònù’s, banyangakaja luumu lwèndè. “Mòna’s, aci, yéyè... mwânà awu’s kí mmulediibwe mu dibaka dinsantu to.” Nwamònù’s, bàvwa biitabuuja aci, ne bìvwa bimwèke ànu bu ne bìvwa nànku. Kàdi Nzambì ùtu wenza nànku bwà kufofomija mèṣù à beena meeji ne batálàme, ne kuCibuulwila bâñà bâdì baswè kuyiila.

⁹⁴ Ndi ntekemena ne kùdì ndambù wa nshindameenu bwà pangìkala mwà kulenga cintu kampànda paanyimà pàà katancì. Nénùleeje. Nudi numònà maanyì aa anyì? Mpindyewu, cíngänwàmbìdì aci, nshindameenu, bwà kumònà ne kí mmuntu to, n’Nzambì, némfunkunè ku cyóci eci. Èyo.

⁹⁵ Mpindyewu: “Bànda mwaba ewu,” ke cìvwa Dìyì adi. Nènku pààkakangulaye yéyè kuumvwa mpungi udila, ne pashiishe dyàkamwe Yone ùvwa mu Nyumà—ùvwa mu Nyumà, nènku ànu ne cìbwèledi mu Nyumà dyàkamwe kubangaye kumònà bintu. Udi ubanga kumònà bintu paûdì ubwela mu Nyumà. Dyàmbedi bikèngela ùbwéle mu Nyumà. Kí mmwòmò anyì?

⁹⁶ Mpindyewu, amba tünd bu wéwè mwà kuya mu dinaya dyà ndundu, wàmба ne: “Ncyà bushuwà ne mêmè ntu munange ndundu.” Um-hum. Nènku wéwè kusòmbela mu nkwasà yà kumpàla ayi, ànu lwà mu katàndà kàà bukalenge amu nènku mwikale munkaci mwà kubandila baa Yankees anyì baa Bulldogs, bwônsò banùdì bamanyè abu, munkaci mwà kunaya. Kàdi bôbò bwônsò munkaci mwà dinayà dyà mikùkûkù mwaba awu.

⁹⁷ Kàdi bàà ku lwèbè luseke bàmba kwobeshiibwa, nènku dyàkamwe Babe Ruth wa cyena leelù utaayisha makòndò à

katunga mùshindù *ewu* ne wàmба ne: “Udi mumòne kwàka nàka anyì?” Tudi ne bantu bàsàtù bàdì boobèshe. “Yööö!” Kàdi mmumutuute muye kule kwà kàyì umweneka to; utuula cifulu cyèndè ne utwàdiya kudyèla kapeepa; ùpweka mutàngile ku kazùbù kàà kumpàla ne ùkènzakana, balùmyàànà bwônsò abu bamungwile; uya ku kazùbù kiibîdî, ùlabulangana ku cyanza ne munàyi mwibîdî wa ku cimanu awu; wàsa lwendo, wàsa lwendo mu cinyànyà walukila pa kaaba kèndè, winamija wèndè... Mònà’s, ekèlekèle! Ekèlekèle! Mbila mikolè kàayi, ditumpika kaayi, mikunda kaayi, mbila ya ne: “Hòloolò!” Mònà’s, bâvva bafwànyine...

⁹⁸ Ntuku mubàmòne cyà bushùwa bangata... Nudi bavùluke cifulu cyà kale cyà lutanda cyà makàkà aci anyì? Ngààkaya ku dinaya dyà ndundu ditùkù kampànda kàdi kumònà mwabilaayi kampànda mobeshe kandundu kàà cikùmà. Nènku mwabilaayi ùvwa musòmbe mumpàla mwànyì ne cifulu cyà makàkà awu, kusalukaye bikolè byà kacya; kukwàta cifulu cyèndè ne kucipulumuna ucìpwekesha, kudyenzela nshingu wa nkoolu mùshindù *ewu* mpàvwa kaalusongo kààcì katùùke kaye. Mònà’s, yéyè’s ùvwa upicila mu cikondo cyà dicyónkomoka! Yéyè—yéyè ukaavwa mupàtuke mu yéyè kaciìyì mumanyè cìvwàye wènza to. Ànu udyela udìkuma ne wela mbila ne wela mikunda ne utumpika. Èè, mpindyewu, nudi bamanyè cîndì mêmè ngeela meeji, ncìyà bushùwà ne yéyè ùvwa ne... yéyè ùvwa munan... ùvwa... ùvwa munange ndundu. Yéyè ùvwa munangi wa ndundu wa dipòkò, ànu mùtu munangi wa mfwanka anyì munangi wa cicyampa amu.

⁹⁹ Mêmè ntù munangi wa Yesù. Èyowà’s. Ntu ànu munange aci’s. Ntu... Wêwè mufike ku diikala munangi wa Yesù, udi umònà’s, munangi wa cintu kampànda.

¹⁰⁰ Dîbà adi nudikù mwà kudifwànyikijila mwabilaayi awu wàmба ne: “Kaa, cyà bushùwà, mêmè’s ndi munangi wa ndundu.” Kàdi baa ku luseke lwèndè bàmba kwobeshiibwa, nènku bamumònà ùlwa wòbesha mùshindù awu, yéyè ùkènzakana ne: “Èyowà’s, ngeela meeji ne aci’s cìvwa ànu címpè pààcì’s.” Uh-huh. Wa bwalu, wàmба “mùdìye munange ndundu.”

“Kaa, yéyè’s ùdi cintu kampànda!”

¹⁰¹ Udi mufwànyine kwamba ne: “Mònà’s, kwêna muciswe to, kî mmwômò anyì? Kùdi cintu kampànda cipampalamuke mu wêwè amu!” Munangi yônsò mwímpè wa ndundu ewu mmufwànyine kwamba ne: “Ncinyì cìdi kaciìyì cyènda bîmpè ne mulumyana wàwa’s? Cintu kampànda cipampalamuke mu yéyè amu. Mutàngilaayi numònà mùdìye musòmbe mwaba awu.” Huh! Aci’s cìdi ànu...

¹⁰² Sàkidilààyi ibìdì ku ibìdì mpindyewu bwà nümvwa, nwamònà’s. Kaa, paùdì munangi wa Yesù, ne umvwa mùdì

Nyumà Mwîmpè ùkùbwëja Mêyì awu, dîbà adi cintu kampànda cidi cikobola mu wêwè amu! Kaa, udi upàtuka mu wêwè's!

¹⁰³ Ndi ntékemena ne muntu ewu ùdi ùmfwìlakù luse, mmusòmbe lwà pabwípì apa. Muntu munène mule, wa nsukì mifiìke udi musòmbe kaaba aka, uvwa mwimane mwaba awu dilòòlò kampànda mu cibambalu amu, kàdi muntu kampànda kwambaye cintu kampànda cyà...dyambulwisha, nudi bamanyè's, cyenza bu civwa cimubènèshe mùshindù kampànda. Kàdi nsongàálùme mukwàte ne byà luse awu ùvwa mupicile mu cikondo cyà bwalu bukolè, ndi mumanyè ne—ne mukàjèndè wààkamushiya ne kumufunda ku tubàdi bwà kushipa dibàkà ne bwalu yéyè ùvwa munange Mukalenge Yesù. Ncyà bushùwà. Ki muntu kampànda kwambaye cintu kampànda bwà Yesù, nudi bamanyè's, yéyè ùvwa ànu bu umwe wa ku banangi abu's. Ne yéyè ùvwa tuye ku mvitâ ne mwashiùbwe pambidi pônsò, ne bikwàbò byônsò, mwâna wa balùme awu's; mêmè kumumvwila luse. Kwalukilayè kumbèlu ne...bânà bëndè ne mukàjèndè. Pashìishe yéyè—yéyè wàkalaya Mukalenge ne neàMukwàcile mudimu, nènku Mukalenge mmwenze ànu ùbanga kumubènesha ne yéyè pëndè kuditèéka mu bulongame ne Nzambi, mukàjèndè kumukùdimukilaye, kumufundaye bwà kushipa nendè dibàkà ne kumba kumushiya. Kumushiyaye musòmbe pambèlu mu mashìka. Kàdi yéyè ùcìvwa ànu munangi's.

¹⁰⁴ Nènku pààkiimanaye mwaba awu dilòòlò kampànda ne muntu mukwàbò wàmba cintu kampànda bwà Yesù, cintu kampànda, mùshindù ùvwa Ye munène, mùshindù awu, kwambaye ne: "Kaa, Butùmbi's wè!" Kukùpaye mabòkò èndè kàdi's ki cyanza cyèndè civunga aci kutùbulabi cimanu mùshindù awu. Kàvwa mumanyè ne mmwenze nànkù to. Cyanza cyèndè civunga aci ki kushààla kacya cyàkàlama mu cimanu. Yéyè ne: "Mwanèètù Bill, némfute bwà kucìlongolwesa." Ngeela meeji ne Mwanèètù Wood wàkalwa ne kwaluja dibaya adi, kipingaja dibaya dikwàbò. Kabyàkatùtacisha to, Mwanèètù Ben, tudi ànu—tudi ànu ne disànkà dyà ne wêwè ùtu munangi. Nwamònu anyi?

¹⁰⁵ Pàdì Nyumà Mwîmpè ùkwenzela cintu kampànda, kwena ànu mwà kushààla mupuwe to, kùdi cintu kampànda cidi citùtuka mwaba awu. Amen. Yøyöyö! Eyowà's, cintu kampànda cidi cikutwà byanza, wêwè munangi wa Kilistò awu. Paùdi munange Mukalenge, cintu kampànda cidi ànu cìdyela, cibàkula, ciikale ne nzala ne nyòotà, Yesù wákamba ne: "Bàà disànkà ng'abu, bwalu bôbô nebùújiibwè. Mbàà disànkà pàdibù ànu mene ne nyòotà, nànsa wêwè muMupetè anyì kuyi mwanjì kupeta to." Mbanganyì bàdiku baswè Nzambi mutàmbidile? Eyo. Èè, cidi cyenza ne újingè Nzambi mutàmbidile aci, udi mubènèshiùbwè ànu bwà kwikala nànkù. Nànsa kùyì naaCi to, ucidi ànu mubènèshiùbwè. "Ne bàà disànkà ng'aba bàdì ne

nzala ne nyòòtà.” Udi mubènèshìibwe ànu bwà kwikala ne nzala ne nyòòtà. Bwalu udi naaCì dijinga, udi mubènèshìibwe. Bwalu kùdi bantu bààbùngì bàdì kabàyì bàCìswé to.

¹⁰⁶ Nudi bavùlùke diyiisha dyànyì dyà dilòòlò adi anyì? Nwamònú’s, byenzé bu mukùtakane awu, wàkashààla mulame kashètè kàdi mwimanshe mâtápisì awu. Nwamònú anyì? Kwangaciku kashètè aku to, angàta Dipà adi. Èyo.

Mpindyewu, *dyàkàmwè...mu nyumà: nènku, mònaayi, nkwaswa wa butùmbi...mutèeka mu dyulu, ne kampànda musòmbe pa nkwaswa wa butùmbi.*

¹⁰⁷ Mpindyewu, mònaayi, pashiìshe ndambù, anyì, tudi bacìpete makèèlèlà dilòòlò awu, ngeela meeji, ne pa Nkwasa wa butùmbi ewu pàvvwà... Tudi tujandula ne dyàmbedi kakùvvwakù cintu nànscha cimwè pa Nkwasa wa butùmbi apu to, nènku mpindyewu kùdi Muntu kampànda pa Nkwasa wa butùmbi pa nànkù bìvvwa bìleeja ne Yesù ùvwa mulwè ne Èkèleeyiyà Wendè mubànde mu Butùmbi ne musòmbe pa Nkwasa Wendè Sungasunga wa butùmbi. “Musòmbe pa Nkwasa wa butùmbi,” aci’s mpaanyimà pàà cikondo cyà Èkèleeyiyà. Mpindyewu, mpindyewu, tudi baswè kufika ku cyòcì aci paanyimà pàà katancì.

¹⁰⁸ Mpindyewu, wèwè udi wamba ne: “Èè, nkwaswa Wendè wa butùmbi ùdi penyì leelù ewu?” Mpindyewu, Mwanèètù Neville, mêmè mupangilé kwamba aci, ùnkonkè paanyimà pàà katancì ne: “Nkwasa Wendè wa butùmbi ùdi penyì leelù ewu.” Ngeela meeji ne nêmifikè too ne kwôkò aku. “Nkwasa Wendè wa butùmbi ùdi penyì mpindyewu piìkalaYe kàyì pa Nkwasa Wendè wa butùmbi awu mpindyewu?”

Yéyè kêna pa Nkwasa Wendè wa butùmbi mpindyewu to. To, mukalenge.

¹⁰⁹ Èyo, mpindyewu:

Nènku ewu uvwa musòmbe awu ùvwa ne cya kwikala ne mmwènekelu wa... yaspà ne... dibwe dya sardwànè: ne kùvvwa mwanzankóngòlò munyùngùlùkile nkwaswa wa butùmbi eku ne eku, mu cimfwànyi...ku mésù bu mudi diikala dyà mâyì à matàmbà.

¹¹⁰ Mpindyewu, twàngatààyi mpindyewu mvensà mwi3, bwà kubanga. Ne pa nànkù “yaspà”, ewu Ùvwa musòmbe pa Nkwasa wa butùmbi awu ùvwa ne cyà kufwànangana... Mu ngaakwìlù mukwàbò, panùdì nuMutàngila, Yéyè ùvwa mu bulenga bwà dikèma, bulenga bwà dikèma! Kaa, ndi muswè kuMumònà. Kàdi nwénù?

¹¹¹ Dîngà ditùkù... Ndi mvùluka Mwanèètù wa bakàjì Cadle, Mwanèètù wa bakàjì Howard Cadle, ngeela meeji ne bààbùngì bàà kunùdì mbamuvùlùke. Mvwa nsanganyiibwa dyamwàmwa dyà mùsèèsù wàwa, ne mukàjàànyì udi musòmbe mwab’awu mpindyewu ùdi ùvùluka ne ùvwa ne mashìka, mu cibambalu

amu. Kàdi mvwa mujuukile kuulu, ne mvwa ne kakesè, kàà kale... kàvvwa nkaadicyùwà kaa mu meetu mwaba awu kiikale ne... tuvwa twoshela dyâmpà dyètù mu mfuulù, mu lubungulu amu. Nènku mêmè... kùvwa mashika makolè ne lupeepèle lutuuta, mu muvù wa mashìka, nêjè pansi, eku lupeepèle lumònangane ne kubwelela ku mpeepu yà mîshi aku, nènku ncivwakù nkòokesha mwà kuteemesha cintu aci to, nànsha bwà kupandisha mwoyi wànyì. Nènku nkààvwa mutàcishiibwa ngamba kutaayika bwa bwalu abu. Ki même kusakidilamu ndambù wa nkùnyi, kujìmakù cyàkàbìdì. Billy eku mashìka àmba kuya nendè ne mukàjàànyì ne mashìka, mvwa ndwangana bwà kuteemesha kapyà. Ki kwenzekabi ne nkangule cisanji ne (tusunsa tukesè kumpàla, ne cikaavwa cibange kukwate luuya, citeeme), ne Mwanètù wa bakàjì Cadle ùvwa wimba ne: “Pângààyà mu Buloba abu, ku mwelelu wà kule awu, ndi muswe kumònà Yesù. Kàdi wêwè?” Kaa, ekèlekèle!

¹¹² Mêmè kusòmbela ànu pansi apu lwà munkacinkaci mwà nzùbu amu kàdi kushààla musòmbe ànu mwaba awu e kukutulangana ne mwadi's. S'nudi bamanye musòmbeleye wimba, ùpweka, ùpatula díyì dyèndè dishèème dìdì bu nyuunyi wa mbònkimbò adi. Ndi muswè kumuumvwa pângààsabukà kuya dyàmwàmwa; wàmba ne: “Ndi muswè kumònà Yesù. Kàdi wêwè?”

¹¹³ Mêmè kudyambidila ne: “Éyì Nzambi wa yààyà, èyowà's, ndi muswè kuMumònà dîngà ditükù. Piìkala bilòngò byônsò bimana kupa, ndi muswè kumònà Yesù.” Mùnyi...Bwà kuMumònà pa Nkwasa Wendè wa butùmbi, bulenga Bwèndè, bulenga Bwèndè! Nènku bu mêmè... Kaa, ndi muswè kwimana mwaba wàkiimanà Yone, bwà ngaamònà ànu mwà kwimana ne kuMubandila.

¹¹⁴ Mwab'ewu kukaadi cikondo, lwà kwinshi eku... mu cikondo cyà bupika. Ndi ngàmba bwalu ebu bwà balunda bàànyì bàà bafiìke bàdì mwab'ewu mu dìndà emu. Kwakadi muntu mununu wa bafiìke, kàdi ùvwa... ùvwa uya ku mwaba kampànda wa mukesè, kùvvwàye ne ciibidilu cyà kuya.

¹¹⁵ Nènku byôbì ebi bìvwa pa ciibidilu byenzeka mu Kentucky mwàmwa, batwilangana bimba. Pàmwàpa Maman Cox ne bakwàbò bàdi mwà kuvùluka cikondo cìvwàbo ne ciibidilu cyà kuya ne kwimba misambu, nudi bamanyé's, baya ku nzùbu yà bantu bìmبا cisanji cyà orgue, bisùmbù byà bansonga ne bwônsò bimba. Bìvwa byenzeka pa ciibidilu apa ku Utica eku, ne eku ne eku mu myaba yà mu ditunga emu. Mpindyewu bàdi ne kàlàngì kàà wiskí, mwaba kampànda mu difestò dyà majà à bidündadundà.

¹¹⁶ Kàdi, cikondo aci, bàvwa bìmبا miyengà. Ùmwè wa ku misangu yà dimba dya kale dyà miyenga edi, kùvwa mwanètù mukulumpe, wa bafiìke wàkasüngidiibwa. Ki Mukalenge

kumubìikila bwà kuyiishaye, kàdi ditùkù dyàkalondà yéyè kuya eku ne eku wàmbila bapika bàvvà mu madimi abu. Yéyè ne: “Mukalenge mmusùngile makèèlèlà dilòòlò awu ne mumbìikile bwà kuyiisha bânà bëètù.”

¹¹⁷ Ki ndekeelu wa byônsò bwalu kufika ku macì à mwena mpàta anyì mwena budimi abu. Kumubìikilaye, kwamba ne: “Sambo, ndi nkukeba, bwelela muneemu.” Yéyè ne: “Bwela mu birò byànyì emu.”

Yéyè ne: “Èyowà’s, mukalenge,” kuyaye tamakatamaka too ne ku birò.

¹¹⁸ Yéyè ne: “Cîndì ngumvwa wenda utangalaja munkacì mwà bapika ncinyì eci, munkacì mwà bantu bàdi kuntu kwàka, beena mudimu bàànyì, bapika bàànyì, ne Mukalenge mukuvwijè mudishikàmìnè?”

¹¹⁹ Yéyè ne: “Èyowà’s, mukalenge.” Yéyè ne: “Mfùmù, mêmè’s ndi mupika webè.” Yéyè ne: “Ngâkasùmbiibwa ku mfranga yèbè, kàdi...” Yéyè ne: “Kàdi mushindù ùdi Nzambì mûmpè budishikaminyi makèèlèlà dilòòlò awu, Yesù mmumviji mudishikàmine ku nsòmbelu wa mpèkaatù ne bundù, ne nsòmbelu wa lufù. Mmumviji mudishikàmine.”

Yéyè ne: “Sambo, ngwambilamu menemene anyì ngudìngà’s?”

Yéyè ne: “Ndi ngàambilamù.”

¹²⁰ Yéyè ne: “Ndi muumvwe bàamba ne neùtwadije kuyiisha cisàmbà cyèbè—cyèbè eku ne eku mwaba ewu mu madimi emu ne bikwàbò.”

¹²¹ Yéyè ne: “Èyowà’s, mukalenge!” Yéyè ne: “S’ki cîndì ndumbila bwà kwenza ncyôci aci, nkuyiisha kwà Èvànjeelìyò ewu kùdì cisàmbà cyànyì.”

Yéyè ne: “Sambo, ngwambilemu anyì’s ngudìngà?”

Yéyè ne: “Ndi ngàambilamù.”

¹²² Yéyè ne: “Lwâkù, lwà tuye neebè ku—ku tubàdì, mêmè pàànyi nénkùpèeshè budìkkadidi bwèbè. Udi mudiikàdile kündì, ne udi mudiikàdile kùyikù kàbìdì mupika to. Mvwa mukusùmbe, udi wanyì mêmè, ne ndi nkushiya mudiikàdile bwà wamònà mwà kuyiisha Èvànjeelìyò kùdì cisàmbà cyèbè.” Kupwekeye ne kwelaye cyàlà ku budishikaminyi, anyì dijikula patòòke, ki yéyè kuvwijiibwa mudiikàdile. Kàcìvwa kàbìdì mwà kusùmbishiibwa bu mupika to. Üvwa muntu mudishikàmìnè bwà kuyiishaye Èvànjeelìyò.

¹²³ Wàkayiisha munkacì mwà bânà bààbò munda mwà bidimu. Batòòke bààbûngì bààkakùdimuna mucima ku mudimu wèndè wa bwambi. Dîngà ditùkù dîbà dyà lufù lwà mukùlumpè awu kulwadi. Yéyè ukaavwa muyiishe munda mwà bidimu makumi àsàtù anyì makumi ànaayi, anyì bipìte apu. Nènku

pààkakumbana dîbà dyà kufwàye, ùkaavwa mulààle mu cibambalu amu, ne bânà baabo bààbûngì bàà batòòke bàkaavwa badisangishe mu cibambalu amu bamunyùngùlùkile ki kwelabò meeji ne ùkaavwa tuyè munda mwà mêbà matwè bu ku àbìdì anyì àsàtù. Pashìshe ndekeelu wa byônsò pààkatàbulukàye ne kukanzenzakanaye mu cibambalu amu, kwambaye . . .

“Sambo, uvwa penyì?”

Yéyè ne: “Kaa, ndi mwalukile cyàkàbìdì apa anyì? Ndi mwalukile cyàkàbìdì anyì?”

Kwambabo ne: “Bwalu bùdì cinyì, Sambo?”

Yéyè ne: “Kaa, nkâvwa musabuke tuyè mu Buloba bukwàbò mwàmwa.”

Bôbò ne: “Twâmbilaaku byà mwômù’s.”

¹²⁴ Yéyè ne: “Èè, ndi ànu mubwele’s, mu Bwikadi Bwèndè.” Ki yéyè ne: “Pâmvwà mwimane mwaba awu,” yéyè ne, “kulwaku Mwanjèlò, wàmba ne, ‘Dînà dyèbè n’Sambo Kampànda anyì?’”

Yéyè ne: “Èyowà’s, mukalenge, s’mmwômò’s.”

Yéyè ne: “Bwela.”

“Mêmè kubwela munda, ne kuMutàngila musòmbe mwaba awu.”

¹²⁵ Yéyè ne: “Sambo, vwilà kùneeku mpindyewu, paanyimà pàà wêwè mumanè kuMumònà, ndi muswè bwà ûlwe mwab’ewu, tudi baswè kukupà muzàbì wèbè, tudi baswè kukupà lunkòmbè lwèbè, tudi baswè kukupèèsha cifulu cyèbè cyà butùmbi.”

Sambo kwamba ne: “Kungambidiku bwà nkcombe, bifulu byà butùmbi, ne mìzàbì to.”

Yéyè ne: “Kàdì udi mupete difutu, tudi baswè kukupà difutu dyèbè.”

¹²⁶ Yéyè ne: “Kunteèlediku byà . . . bwà bwalu bwànyì . . . bwà bwalu bwà mafutu to.” Yéyè ne: “Ndekelaayi ngììkale ànu mwimane bwà kuMubandila munda mwà bidimu cinunu. Ki ciìkalà dyànyì difutu aci.”

¹²⁷ Ngeela meeji ne ki mùshindù awu utùdì bafwànyine kudyumvwa bwônsò ne: “Ndekelaayi ànu ngììkale mwimane mMubandila.” Kaa, nebinkèngelè bwà mêmè kwikala ne mubidi mushìlàngànè ne úndì naawu mpindyewu ewu, kalanjilanji kônsò kàà buntu bwèbè ànu bwà kuMubandila.

¹²⁸ Ki Yone awu mwimàne e kuMumònayè musòmbe pa Nkwasa wa butùmbi, ne Yéyè “ùvwa mufwàràngànè ne dibwe dyà yaspà ne dyà sardwànè.” Mpindyewu, bintu byônsò ne mwâkù wônsò ewu ùdi ne dyumvvija kampànda mu Bible. Mpindyewu: “dibwe dyà yaspà ne sardwànè.”

¹²⁹ Mpindyewu, bu nwénù mwà kumònà, bìdi binwàngana ne mikwàbò Mifundu. Mu bitùpà byà kale byà Mifundu, Yéyè ùvwa

Alpha, Omega, Yéyè ngùvwa Mbangilu ne Ndekeelu, Yéyè ùvwa wa Kumpàla ne wa Ndekeelu, Yéyè ùvwa Taatù, Mwânà, ne Nyumà Mwîmpè. Yéyè ùvwa “byônsò mu byônsò” byungwija mu Yéyè. Maataàìyì 17 ûdi ùleeja ne Yéyè...kuulu ku Mukùnà wà Dikùdimuka dyà mpàla, byônsò bïvwa bidisangìshe mu Yéyè.

¹³⁰ Mpindyewu, “yaspà” ùvwa—ùvwa dibwe, ne “sardwànè” ùvwa ndibwe. (Mpindyewu, netükafikè ku meekala àwù paanyimà pàà katanci.) Mpindyewu, ndi muswè bwà numònè ne yônsò wa ku bankambwa pàvvàbo bâlediibwa, èyowà’s, muntu yônsò, ûdi ne dibwe dyà dilediibwa. Dyànyì mêmè, bâtu bandele mu ngondo mwinâyì, ndibwe dyà mbongo. Ne ngondo mishìlèshìllàngàne yìtu yileeja mabwe mashìlèshìllàngàne. Èè, bankambwà bâvwa cintu cìmwècìmwè aci. Musangu wônsò wùvwà nkambwà, pàvvàye ulediibwa, ùvwa ùt-...ùvwa ne dibwe dyà dilediibwa.

¹³¹ Nènku ànu bwà kwimanyina kaaba aka bwà katancì kakesè cyanàànà. Pàvvà baamaamù bâà beena Ebèlù abu... Lekèlà nkuleejeku Dîyì dyà Nzambì, mulunda wanyì, bwà diitabuuja dyèbè dyàmònà mwà kwibakiiibwa bushuwà mu Dîyì dyà Nzambì. Dîbà dyônsò, baamaamù bâà beena Ebèlù abu, pàvvabo pa cicì, bâdinyenga bwà kulela, bwà kule... kulela bânà aba, mèyì miine àvvâye ùpatula mu dilela dyèndè ngàvvà àpèësha muntu awu (mwânanà wa mu dibòkò ùvwa mulela kûdì mukàjì awu) dînà dyèndè, ne àmushikika bilondêshile myaba mu Pàlèstinà mwaba wikalaye ku dilwa dyà Mukalenge. Bisaamà byà pa kulela mu maamù ewu! Byenzè bu, Efàlàyimà mbwena kwamba ne “ku mwelelu wà mbû.” Nwamònou anyì? Nènku Efàlàyimà wàkapèshiibwa cyèndè citùpà cyà buloba ku mwelelu wà mbû. Nènku, kwamba ne, Yudà ùvwa ùmvwija... Ncyéna mumanyè cìdì mwâkù awu wùmvwija to, kàdi ndi mufwànyîne kuwùpeta. Mpindyewu, nwamònou’s, ki mwaba ûndì ncìyi ne dîbà, dyà tuntu twà tutùpà etu, bwà kwangulula tuntu atu to. Kàdi pashìishe kwalukila, ne Yudà, kwônsò kûdì Yudà ùmvwija aku, ki mwaba wèndè mumutèèka munkaci mwà bânà bâà Izàlèèlâ.

¹³² Nènku angàtaayi ku Genèsè 48 ne 49, nenùsangane muntwamu ne Yakòbò, pàvvàye ùpùnga ne lufù, mweyèmènè pa mulangala wèndè, mushààla mpofo, wàkambilà bânà abu bilondêshile myaba yìvvàbo bafwànyîne kwikala ku nshìikidilu kwà buloba. Nènku mbatèèkiibwe ànumu bilondêshile myaba patûdi twakulangana apa kacya ànu bâlukila mu buloba bwàbò. Wàkambilà Yozefù ne: “Wêwè udi mwonjì wa mvinyò wa bimuma ku cimanu,” nwamònou’s, “ku ciinà cyà mâyì,” mâyì. Kutùngunukayè. Kwambayè ne: “Udi mweyèmene Mukalenge Nzambì. Udi muvvije ntafu webè—webè ne bukolè” (Etats-Unis. Nwamònou anyì?) “mu Mukalenge, kàdi dîngà ditükù mwonji wà mvinyò awu ùvwa wàlukila ku cimanu aku.” Nènku’s ki yéyè awukù, ànu mwaba awu mene mpindyewu. Ànu menemene

cyàkambàye kukaadi bindimu byàmba kutwà ku binunu bìsàtù, munkaci mwà kwalukila. Kwambila Efàlàyimà ne yêyè ùvwa mujiike makàsà èndè mu maanyì, ne Efàlàyimà wàkashikikiibwa ànu mu mwaba ùvwa biina binène byà maanyì bisanganyiibwa. Ànu menemene.

¹³³ Byàkamba bantu abu abi, cìvvà pa bantu bàà cifwàkà abu ncinyì's? Nzambì wàngata tulanjilanji twàbò atu ne ùkwacila mudimu mu bôbò's!

¹³⁴ Bìvwa bimwèke ànu bu ne pàvvà Bukalenge bwalàbàlè bwà beena Loomò bubàmwàngalaje, pàvvà bakwàbò bàbàmwàngalaje, pààkakinyiibwàbo kùdì Hitler apu, misangu binunu dikumi kuvudija ku binunu, wàkakòka lupeepèlè kubèèla mu mijilu ne kufwàbo, nuvwa mwà kumònà mibidi yàbò milembèlè pa mpangu yàbò ne yà bânà bààbò bàà mu mabòkò ne bikwàbò byônsò, ne mifùbà...kàdi kwangata mifùbà yàbò ayi ne kwenza naayì manga à bufukà. Kubapatula ànu kuntwaku ne bàbàtwà lupeepèlè alu, bàbèèla mu màkaadikà. Pashiìshe bàpàtuka, dìbà dìdibo bàpàtuka adi, nànsha mene ku ntawdijilu aku, bàvwa bìmبا ne: "Maasiyà neàlwé ne twètù netùnwe cyàkàbìdì mashi à tumuma twà mvinyò." Pààkayàbo, bënda bàpùnga ne lufù, beena Yudà abu, bàpàtuka buludi kuntwaku, bamanyè ne mu ndambù mukesè wa mikùma mwoyi wàbò newikale mumane kuya. Nènku mu dipweka amu bàvwa mwà kuya, bënda bìmبا ne: "Netùmònè Maasiyà àbìdì àdi pansiì aa." Kaa, ekèlekèle! Bènza bufukà ne mifùbà yàbò's.

¹³⁵ Bààbûngì bàà ku nwénù bàsàalaayì bàdì mwab'ewu nudi bamanyè ciine aci ne bacimònè. Ngààkiimana pa myaba yàkabòòshelabo ayi ne bikwàbò byônsò, kwôkò aku, kùdì Hitler ne bôbò abu. Kàdi bàndishàayì mésù kùdì Stalin ne Russie ne bwônsò abu, mbenzè cintu cìmwècìmwè aci. Neyà bushùwà. Kàdi beena Yudà abu, bwalu bwàbò bùvvwa cinyì? Bààkenzejiibwa ku bukolè bwà kipingana mu buloba bwàbò. Ki mwômò amu mùdìbo bàsanganyiibwa.

¹³⁶ Mpindyewu, mvwa ne mukàbà wa bindidimbì munène awu, *Tusunsa Tùsàtù Kumpàlà kwà Mundankùlù*. Pààkabwelà beena Yudà abu, bàvwa bàbàkonka, bàmبا ne: "Bwà cinyì bunùdì nwalukidila, bwà kukafwìla mu buloba bwénù anyì?"

¹³⁷ Yêyè ne: "Tudi balwe bwà kumònà Maasiyà." Amen. Hmm! Tukaadi ku cikondo cyà nshiìkidilu.

¹³⁸ Yônsò wa ku bânà abu pààkalediibwàbo, bàvwa ne dibwe dyà dilediibwa. Nènku pàvvà Aalonà, mwakwidi munène kumutù kwà yônsò wa ku bânà abu awu, ùvwa ne cibwikilu cyà pa cyàdì, ku nkanzu wendè. Ki cîndì muswè kwanji kushààla mwindija ànu katancì kakesè, bwà kubwela mu mvensà mwi6 ewu, bwalu aci cidi cìtwala cimfwànyì cyônsò cyà Dipungila Dikùlùkulu too ne mwômò amu. Yônsò...nkwasa yônsò ne

byônsò byà mu Dipungila Dikùlùkulu abi bìvwa citembelu cyà bìvwa bimònà mu Dyulu, byenzela muntu.

¹³⁹ Nènku's ki cibwikilu cyà pa cyâdì cyà Aalònà eci, yêyè ùvwa mwakwidi munène. Mônaayi, dibwe dyà dilediibwa dyà cisàmbà ne cisàmbà cyônsò dìvwa dileejìibwemù. Ùmwè, dibwe dyà dilediibwa, mmutèke dibwe dyèndèmu; cisàmbà cyà Efàlàyìmà, cisàmbà cyà Maanàsè, cisàmbà cyà Gaàdà, cisàmbà cyà Benyàminà, byônsò abi bìvwa bileejìibwemù. Nènku mùshindù awu ki ùdi... Pashìlshe bâdi bàngata mabwe à dilediibwa awu, mabwe malenga awu, baàkùdika ku dikunji mùshindù ewu. Nènku mupròfetà yêyè mwambe cipròfetà, ne nànsha cyùmvwika címpè anyì cibi, bâvva bàya nendè too ne ku Ulímà-Tuumìmà ewu ne bamulekela wàmba cipròfetà cyèndè aci; Bukénkè bunsantu bôbò bupàtukemu ne bubange kupenyesha mabwe awu cyàpàmwè, cìvwa n'Nzambì uvwa wandamuna. Cìvwa mbwà cisambà cijimà, byônsò abi, cisàmbà ne cisàmbà cyônsò.

¹⁴⁰ Mpindyewu, pa wôwò aa, dibwe dyà kumpàla. Dyà kumpàla, mbanganyì bâdì bamanyè ne mwânà wa kumpàla ùvwa nganyì? Dînà dyèndè dìvwa nganyì? Luubènà. Eyo. Wa ndekeelu ùvwa nganyì? Benyàminà. Ncyà bushùwà. Dibwe dyà dilediibwa dyà Luubènà dìvwa "yaspà," dibwe dyà dilediibwa dyà Benyàminà dìvwa "sardwàne." Bìvwa bìkèngela kumwekayè bu "Luubènà ne Benyàminà," Wa Kumpàla ne wa Ndekeelu, Ewu Wàkadikù, Udkù Awu, ne Wâlwâ Awu, Yéyè ùvwa Alpha (A) mu màleetà à cyena Ngelikà, Omega (Z) mu màleetà à cyena Ngelikà. Yéyè nguvwa wa Kumpàla, wa Ndekeelu, Yéyè ùvwaku kuumukila ku Benyàminà too ne ku Luubènà, kuumukila ku Luubènà too ne ku Benyàminà. Kaa, ekèlekèle! Ki Yéyè awu ne: "Ùmweka bu dibwe dyà sardwàne ne bu dibwe dyà yaspà." Ùvwa musòmbe pa Nkwasa wa butùmbi ewu!

¹⁴¹ Mmunyì munùdiku nwêñù bwônsò baswè ku Mumònà musòmbe pa Butùmbì Bwèndè? Tubuululààyi mu Bwàkabuulwibwà 21:10, lukasalukasa, bwà tuMutàpèku ànu disù mwab'ewu. Eyo, 21:10 too ne ku 11.

Nènku wàkaya naanyi kule mu nyumà ku mukùnà munène ne mutùmbùke, ne kundeeja cimenga cinène aci, Yélusàlèmà wa cijila, upweka úfumina mu dyulu kùdì Nzambì,

Mwikàle ne butùmbi bwà Nzambì:...Mwikàle ne butùmbi bwà Nzambì: ne makénkè èndè àvwa mafwànàngàne ne dibwe dyà mushinga mukolè mutàmbe, nànsha mùvvwà...yaspà..., ànu ditòòke zeezeeze bu ntàlàtalà;

¹⁴² "Bukénkè Bwèndè." Bukénkè! Bukénkè abu nganyì? "Ne Cimenga aci kacìvwa cikèngela dìbà to, bwalu Mwàñà wa mùkòòkò ki Bukénkè bwàcì."

¹⁴³ Dibwe dyà “yaspà, sardwànè” adi. Butùmbi bwà Nzambì n’Yesù Kilistò, Butùmbi bwà Yesù Kilistò ng’Èkèleeziyà Wendè. Ne Yéyè nguvwa Wa Kumpàla. Yéyè ùvwa cinyì? Yéyè ùvwa Mbangilu wa cikondo, Yéyè ngudi Ndekeelu wa cikondo. Yéyè nguvwa wa Kumpàla wa bankambwa, Yéyè ki wa Ndekeelu wa bankambwa. Yéyè nguvwa Èkèleeziyà uvwa mu... Yéyè nguvwa Nyumà uvwa mu Èkèleeziyà wa Efèsò awu—awu, Yéyè ùdi Nyumà wa Èkèleeziyà mu Laòdikiyà. Yéyè ki wa Kumpàla ne wa Ndekeelu, A ne ku Z, wa Kumpàla, wa Ndekeelu, Ewu Wàkadiku ne Wâlwa Awu, Muji ne Mütôlokù wà Davìdì, Mütootò wà mu Dindà, Mbata wa mu Cibanda, Rose wa Shalònà! Kaa, kùdi nkàmà yìnaayi ne byà mu njila yà myanzu mu Bible yìdì yìMukùmbanyina. Anjì elààyibì ànu meeji ku bwalu abu, cìvwà Ye's! Kàdi nànsha nànku Yéyè ùvwa Mukalenge Yesù mupwekele wàkalediibwa mu cidìlù cyà nyama bwà butùmbi bwà Nzambì awu's.

¹⁴⁴ Cintu kanà cyônsò cìdì cidìpwekèshe eci, cìtàngilaayi bîmpè bwali ncyà bushùwà. Cintu kàna cyônsò cìdì cinéne eci's ncyà madileeji, nànku kanùkùtùmikù ntéma to; nwamònú's, s'ndipatangana ànu ne lupeepèlè nàka, kàdi kamwèna cyà nsongó to. Eyo.

¹⁴⁵ Mpindyewu ne: “Ùvwa mufwànàngane ne dibwe dyà yaspà ne dyà sardwànè.” Twalukilààyibi. Nudi ne...? Tudikù ne dìbà ndambu, kî mmwômò anyì? Tucìdi ne tusunsa tutwè ku makùmi ànaayi. Tùmonààyibì, twàlukilààyibi ku Yéhezèkèlè 1. Alùkìlaayi mu Bible ku Dipungila Dikùlukulu, ku Yéhezèkèlè, nènku tûbalààyibi kaaba aka kàvvà Yéhezèkèlè muMumònè, yéyè pèndè. Nènku fwanyikijààyaaku Mifùndu eyi mpindyewu bwà numònè mwaba utùdi. Yéhezèkèlè nshapità 1, èyo, mpindyewu tûbalààyibi bwà katancì kakesè. Mpindyewu némbaré mvensà yìtaanu yà kumpàla ayi, ne pashìshe netùbale, ndi mufundè mwaba ewu, kuumukila ku 26 too ne ku 28. Kàdi tubalààyaaku mvensà yìtaanu yà kumpàla ayi mpindyewu yà nshapità wa 1 wa Yéhezèkèlè, mupròfetà. Eyo:

Nènku byàkenzeka mu cidimu cyà makùmi àsàtù, ne mu ngondo mwinâyì, mu ditukù diitaanu dyà ngondo, ... Mvwa munkaci mwà bapika—munkaci mwà bapika lwà ku musùlù wà Kebâ, ... (Mmwômò anyì, Kebâ? K-e-b-â, Kebâ.)... nènku maulu àkunzuluka, ki même kumònà cikèènà-kumònà cyà Nzambi.

Nènku mu... (Mpindyewu, tàngilààyibi)... Mu ditukù diitânù dyà ngondo, mbwena kwamba ne ngondo wakakwàciibwa mfùmù Yehoyàkìmà ku bupika,

Diyì dyà MUKALENGE dyàkalwa patòòke kùdi Yéhezèkelè mwakwidi, mwànà wa Buzì, mu buloba

bwà... Beena Kasàdà ku musùlù wà Kebâ; ne cyanza cyà MUKALENGE cìvwa... pambidi pèndè.

Ki mêmè kutàngila, nènku, mònàayi, mvunde wàkapatukila ku nord,...

¹⁴⁶ Tàngilààyi mupròfetà ewu, bidimu nkàmà yìtaanu ne makùmi citeèémà ne bìtaanu kumpàlè kwà dilwa dyà Kilistò, nudi numònà mùdì cikèènà-kumònà cyèndè cikùmbanangana ne Yone:

... mvunde wàkapatukila ku nord, divuba dinène, ... kapyà kàdìvungulula kôkò nkaayaku, ne dibàlakana adi divwa didinyùngùluke, ne lwà munkaci mwàkù amu mùvwa diikala dyà mâyì à matàmbà dyà ditàmbe kutwìla, lwà munkaci mwà kapyà.

Kàbìdì lwà munkaci mwàkù amu kulwamù cimfwànyì cyà bifukùnbwa bìnaayi bìdì ne mwoyi. Nènku ki mmwènekelu wabò nyéyè ewu; bàvwa ne cimfwànyì cyà... muntu.

¹⁴⁷ Mònàayi, diikala dyà Nyumà wa Nzambì dìvvà kumutù kwà cimfwànyì cyà Bifùkùnbwà bìnaayi ebi aci, dìvwa dyà mâyì à matàmbà dyà ditàmbe kutwìla. Diikala dyà mâyì à matàmbà dyà ditàmbe kutwìla's nkàlaabi-bu-mâyì à matàmbà. Mpindyewu, tàngilààyi: "diikala dyà kàlaabi-bu-mâyì à matàmbà," *diikala dyà mâyì à matàmbà dyà ditàmbe kutwìla*, kaa, Yéyè ùdi umwèumwè awu makèèlèlè... WàkaDibuuulula kùdì Yéhezèkèlè; munkaci mwà cikèènà-kumònà cyà Yéhezèkèlè, Bukènkè bwàkamònàye bùlwà kumutù kwà Bifùkùnbwà bìnaayi bìdì ne mwoyi ebi bùvwa bwà diikala dyà kàlaabi-bu-mâyì à matàmbà. PààkalwaYe kùdì Yone, Wàkamwenekela mu *diikala dyà mâyì à matàmbà* didi kàbìdì "kàlaabi-bu-mâyì à matàmbà." Ùdi ùlwà mpindyewu kùdì mubuuludi mu diikala dyà kàlaabi-bu-mâyì à matàmbà. Yéyè ùdi ùlwà kutùdì mu diikala dyà kàlaabi-bu-mâyì à matàmbà, Bukènkè! Endelaayi mu Bukènkè, Yéyè ùdi Bukènkè.

¹⁴⁸ Tùyaayi ku mvensà wa 26 mpindyewu, bwà twamònà mwà kubala too ne ku wa 28. Mvensà wa 26:

Nènku pamutù pàà maul-...

Kaa, panwàlukila kumbèlu, ndi muswè bwà nùfundè cyôcì aci ne nùbalè kantu ne kantu kààci. Bwà kulaminyinaku diba:

Nènku pamutù pàà maulu àvwa lwà kumutù kwà mitù yàbì kùvvwà cimfwànyì cyà dibwe, diikale ne mmwènekelu wa dibwe dyà sardwànè: ne pa cimfwànyì cyà nkwasà wa butùmbi pàvwa cimfwànyì cyà mmwènekelu wa muntu kumutù kwà... yéyè awu.

¹⁴⁹ Awu ùvwa m'Mwânà wa muntu, nwamònà's, Kilistò. Mpindyewu tàngilààyi numònà mùvvwà Ye, mùvvwà Ye muvvwàle kaaba aka:

Ki mêmè kumònà bu meekala à mâyì à matàmbà à matàmbe kutwìla, (tàngilààyi, mu nyungulukilu wa Mwânà wa muntu ewu) bu mmwènekelu wa kapyà kanyungulukile munda mwàku amu—kanyungulukile munda mwàku amu, kubangila ànu lwà mu mmwènekelu wa cifùkà cyèndè... .

¹⁵⁰ Tèèlejààyi! Ikàalaayi bàà nyumà, umvwâyi bîmpè, ne mu myoyi yènù nwêñù biine mwab'ewu. Ndi nnulòmba mu Dînà dyà Yesù, lamààyi eci bwêñù nwêñù nkaayenù! Kàdi nwavùlukaayi ànu mùdici cyûle tèntè ne mabènesha's wè!

¹⁵¹ “Ndi mb...” Tùbangaayi cyàkàbìdì mu mvensà wa 27. Tèèlejààyi, muntu ne muntu! Umvwâyi bîmpè menemene mpindyewu!

Ki mêmè kumònà diikala dyà mâyì à matàmbà dyà ditàmbe kutwìla (aci's ki kalaabi-bu-mâyì à matàmbà aku), kenze bu kapyà eku ne eku... kakànyùngulukile,...

Kapyà kanyùngulukile kàà mâyì à matàmbà à lubìshibishi aku. Mpindyewu:

... kuumukila ànu mu mmwènekelu wa cifùkà cyèndè kubanda, (Kuumukila mu cifùkà cyèndè kubànda.) ne kuumukila mu mmwènekelu wa cifùkà cyèndè... kupweka, mêmè kumònà byenze bu mmwènekelu wa kapyà, ne bùvwa bùbàlakana eku ne eku. (Kapyà eku ne eku.)

Bu mmwènekelu wa ntafu ne mu diikala dyà mu matùkù à mvùla, ki mìvvwa mmwènekelu wa dibàlakana divwa dimunyùnguluke eku ne eku adi. Eci cìvwa mmwènekelu ne cimfwànyì ne butùmbì bwà MUKALENGE. Nènku pangààkacimònà, mêmè kutwà mpàla pansi, ne mêmè kuumvwa dìyì dyà muntu dyàkula.

¹⁵² Tàngilààyi! Nudi pabwîpi anyì? Tèèlejààyi! Lamààyi eci mpindyewu, vùlukààyi ànu ne, mbwà kunùfikisha ku dimanya. (Gene, udi mwà kwimanyika mukàbà wà mêtì ewu.) Tèèlejààyi! (To, kabyèna bìkèngela bwà mêmè kuwimanyikila apu to, kakwena bwalu to. Ndi muswè kwamba ne kulama ànu mukàbà wà mêtì; kuwànyishila ànu Èkèleeziyà ewu.) Mònayayi eci! Mpindyewu, bwà nwamònà mwà kumanya ne diikala dyà Bukénkè dìdì kùdì Mukalenge, ne Bukénkè bwà Mukalenge bùdì bùlondà Mukalenge, ne bùdì ànu mùdì Mukalenge, mbwà diikala dyà mâyì à matàmbà dyà ditàmbe kutwìla, dyà kàlaabi-bu-mâyì à matàmbà. S'ki diikala dìmwèdìmwè dyà Bukénkè bùdì neetù leelù ewu abu, ànu mùdì beena maalu à mamanya baBùkwate fôtô, bwà kàlaabi-bu-mâyì à matàmbà, bwà mâyì à matàmbà à matàmbe kutwìla abu.

¹⁵³ Pâncìvwà mwânà mukesè, ne mêmè kuBùmònà bwà musangu wànyì wà kumpàla, nudi bavùluke, beena kale bàdi

mwaba ewu abu's. Mvwa misangu yônsò ànu nnwambila bangabanga ne kukwàtabò fôtô wetù mwena diìnà ewu ne: "Bùvwa bwà kàlaabi-bu-mâyì à matàmbà, ciine aci's ki mâyì à matàmbà à matàmbe kutwila." Mpindyewu, bwà kunumanyisha ne Nyumà wa Mukalenge...

¹⁵⁴ Wàkamba, pààkacimònaye mu cifùkà cyà Cifùkììbwà cìdì ne mwoyi cyàkadi ciimane mu bwikadi bwèndè ne: "Kuumukila mu cifùkà cyèndè kubànda cìvwa bu kapyà, Bukènkè kuumukila mu cifùkà cyèndè kupweka, cìvwa cibwikidija ne Bukènkè. Ne mu nyÙngulukilu mwônsò amu mùvvwa meekala àbÙngì mafwànàngànè ne mwanzankòngòlò." Ncyà bushùwà anyi?

¹⁵⁵ Ndi muswe bwà nuvùluke ne, Nzambi ùcìdi ànuku mu meekala àmwèàmwè awu: "kuumukila mu cifùkà kubànda, kapyà, diikala dyà mâyì à matàmbà dyà ditàmbe kutwila," difwatulula kùdì cyamu cyà fôtô cyà bindidìmbi binyunga anyì ne cyamu cyà fôtô cyà meekala, "diikala dyà mâyì à matàmbà dyà ditàmbe kutwila kuumukila mu cifùkà kubànda, kuumukila mu cifùkà kupweka, ne mu nseke yônsò, meekala àbÙngì bu mùdì àdì mu mwanzankòngòlò mu dyulu paanyimà pàà mvùla." Yesù Kilistò umwèumwè awu makèèlèlè, leelu, too ne kashidi! Nyumà Mwîmpè ùcìdi ànu mu bukolè Bwèndè, ùcìdi ànu mu Èkèleeziyà Wendè mu matùkù à ndekeelu aa. Ki bwalu mbwòbù abu's. Kî mmêmè to, mvwa ànu mwimane mwaba awu, kàdi cìvwa mfôtô uvwa mukwàcìbwé. Ndi muswè bwà nùtangilè cyòcì aci, ànu menemene cyàkamònà Yèhezèkèlè aci's. Meekala àmwèàmwè awu, mùshindù ûmwèùmwè awu, ne dyènza maalu mùshindù ûmwèùmwè awu, ne dyela nsesè mùshindù ûmwèùmwè awu, wà bwena wà Bifùkììbwà bìdì ne mwoyi abi's. Ncinyì aci? Bifùkììbwà bìdì ne mwoyi bidi bileeja Èkèleeziyà udi ne mwoyi, Èkèleeziyà udi ne mwoyi ku bukolè ne dibìkkà dyà ku lufù dyà Kilistò awu. Meekala àmwèàmwè à mâyì à matàmbà matàmbe kutwila awu mmacìbwikidije kuumukila ànu mu cifùkà kubànda, kuumukila mu cifùkà kupweka.

¹⁵⁶ Kakùcyèna kàbìdì byà dicinka to, maalu à mamanya mmakwàte maafòtô! Tàngilààyi meekala ààbì awu, tàngilààyi ànu meekala à kapyà munda amu. Nwamònù anyì? Mwanzankòngòlò ànu pa wòwù. Tàngilààyi diikala dyà kàlaabi kàà mâyì à matàmbà edi. Mpindyewu, ku eci cyamu cyà fôtô, cìvwa ànu ncyamu cyètù cyà mukwaci wa fôtô cyà buludi eci. Ku eci cyamu cyà fôtô cìvwa cyà meekala, fôtô yà meekala's, yà meekala à Kodachrome. Tàngilààyi meekala à mâyì à matàmbà àdìmu awu's. Ngíkalapù mwà kucifikisha ku bukènkè mwaba kampànda unùdi mwà kucìmònà lwà mu ndekeelu mwàmwa's. Nudi mwà kumònà mpindyewu anyì? "Byenze bu mwanzankòngòlò," tàngilààyi mishoonyi yìdì yitwa paanyimà ne kumpàla bu mwanzankòngòlò ayi, mushoonyi ne mushoonyi wônsò ne diikala dishìilàngànè. Netùbwéle mu cyòcì aci mu tusunsa tukesè emu, mmeekala awu ncinyì ne àdì àleeja cinyì?

¹⁵⁷ Kaa! Aci's cìdi ànu cìtùpisha mwoyi wànyì ùdì mukwàte bikole ne byà luse ewu ne disànkà. Ne pa kumanya ne mu ditùkù ditùdì ne mwoyi edi, didì Kilistò...pàdì myaba mikwàbò yônsò eyi luntekà, mwaba mukwàbò wônsò. Ngeela meeji ne: "Bwà cinyì ncyena mwa kucilondelangana? Bwà cinyì ncyena mwa kufikisha bàà pa buloba ku diCimònà's?" Bàà pa buloba kabàvwa balongolwela kuCimònà to. Bàà pa buloba kabààkuCimònà to, bôbò kabààkuCimònakù to! Kàdi Èkèleeziyà ùdi munkacì mwà kupeta dinyùkushiibwa dyà ditàmbe bukolè dìkaadìYeku mupeta kacya!

¹⁵⁸ Mu miine matùkù awu kabàvwa mwà kuCikwàta fòtô to. Mpindyewu bàdi mwà kukwàta bwalu bàdi ne byamu byà mishindù's. Aba bàdi bateeta bwà kwangata byamu bwà kuvila Nzambì abu, ki bàdi baalukila bwà kujaadika ne Nzambì ùdikù. Ncyà bushùwà ne: "Diikala dyà mâyì à matàmbà." Mpindyewu, vùlkààyi ne, kî mmêmè ùtu mucikwàtakaje to, ndi nnubadilaci ànu buludi mu Bible. Tàbàlelàayi pàndì mbala, ne nutàngile, ne numône ne Cidi m'Mukalenge Nzambì umwèumwè awu, kakwèna dishìlangana to. Tàngilààyi mvensà wa 27:

*Nènku ngààkamònà...diikala dyà mâyì à matàmbà
ditàmbe kutwila, bu mu mmwènekelu wa kapyà...*

¹⁵⁹ Nwamònù's, cyenze bu ndìmì yà kapyà yilàkuka. Nwamònù anyì? Meekala à mâyì à matàmbà à matàmbe kutwila àfùmina mu kapyà. Nudi nucimònà mpindyewu anyì? Diikala dyà mâyì à matàmbà dyà ditambe kutwila, s'ki meekala à mâyì à matàmbà à matàmbe kutwila *aa* àfùmina mu kapyà. Lwà kwinshì eku mbàmba ne:

Ne *mmwènekelu* bu wa *ntafu*, anyì mwanzankòngòlò,
mu matùkù à paanyimà pàà *mvùla*,...
mwanzankòngòlò, mu matùkù à paanyimà pàà
mvùla,...

¹⁶⁰ Nènku kùvwa—kùvwa "Cifùkììbwà cìdì ne mwoyi." Cìvwà Yone muleeje mpàla aci, Èkèleeziyà mujimà, mwangàcììbwé muulu. Mvwa munwàmbile. Muntu umwèpelè kaaba aka mu cikèènà-kumònà ùdi mwà kuleeja Mubidi mujimà wà Kilistò, mubwikila! Mpindyewu, tàngilààyi:

*Nènku ngààkamònà...diikala dyà mâyì à matàmbà
dyà ditàmbe kutwila, bu mmwènekelu wa kapyà...
dimunyùngùlùkile, ne mmwènekelu...kuumukila ku
mmwènekelu wà cifükà cyèndè kubànda kuulu, ne
kuumukila ku mmwènekelu wa cifükà cyèndè kupweka
kwinshì, mémè kumònà byenze bu mmwènekelu wa
kapyà...*

¹⁶¹ Tàngilààyi, *tàngilààyi* mùdì kapyà kàtangalaka. Kapàtukila mu cinyì? Mwanzankòngòlò, meekala mwandamutekète awu. Mpindyewu, tàngilààyi, kùdi ànu meekala mwandamutekète

mwômò amu menemene, ne mwanzankòngòlò ùdi ne meekala mwandamatekète.

... *mêmè kumònà byenze bu ne cìvwa mmwènekelu wa kapyà, ne kàvwa ne dibalakana dikànyungulukile eku ne eku.*

Bu mùdì mmwènekelu wa ntafu kampànda udi mu mavuba mu ditùkù dyà mvùla, ki mùvvà mmwènekelu wa dibàlakana lwà mu nyùngulukilu amu. (Bunyùngùlukile Nkwasa wa butùmbi wa Nzambì, nwamònù's.) *Eci cìvwa mmwènekelu wa difwànangana dyà butùmbi bwà MUKALENGE.*

¹⁶² Kî mMukalenge to, mpindyewu, butùmbi bwà Mukalenge. Butùmbi bwà Mukalenge bubwikidije Èkèleeziyà Wendè bwalu Yéyè ùdi mu Èkèleeziyà Wendè! Amen! Kaa, cìdi cimweka cikùtakàne bwà cibùlangènyi, kàdi mùshindù ùdìCi cinène bwà aba bàdì biitabuuja. Uh-huh.

... *Eci cìvwa mmwènekelu ne difwànangana dyà butùmbi bwà MUKALENGE. Nènku pangààkacímònà, mêmè kupòna mutwè mpàla panshì, ki mêmè kuumvwa dyì dyàkula...*

¹⁶³ Mpindyewu ùdi ùtùngunuka ne wamba cìvwà cìkèènà-kumònà aci cyùmvwija, bu mutùdì katùyì ne dîbà dyà kubwelamù mu dìndà emu to.

¹⁶⁴ Mpindyewu, mònayai mùdì Mukalenge mu luse Lwèndè lunène ùtùpèèsha bintu ebi.

¹⁶⁵ Mpindyewu twàngatààyi mukwàbò. Yéhezèkèlè ne Yone bùbìdì bwàbò bààkàMumònà mu bwalu-busokoka bwà meekala Èndè ne Bukènkè, ne kuBùbììkilabo ne “ndiikala dyà mâyì à matàmbà dyà ditàmbe kutwila.” Yone paañymà... Nwénù bàdì bafunda... nudi nufunda Mifundù's, Yone wa Kumpàla 1:5 too ne ku 7. Yone, pashìshe (ne yéyè ùvwa mu cisanga cyà Paatèmò bidimu bitwè ku bìsàtù pààkafundaye Mukàndà apu), pààkaalukilàye, muntu mukùlakàjì wa bidimu bùipacila ku makumi citèèmà, mu Yone wa Kumpàla 1:5 ne 7, mmwambè ne: “Nzambì ùdi Bukènkè.” Yone wàkenza dilabula, wàkàMumònà ne wàkamanya ne Yéyè ùvwa Bukènkè, Bukènkè, Bukènkè bwà Cyendèlèlè; kî mbukènkè bwà mu cibwàshìbwàshì to, kî mbukènkè bwà mwêndù to, bukènkè bwà nzembu, anyì bukènkè bwà dîbà to, kàdi Bukènkè bwà Cyendèlèlè! Kaa, mùshindù mwinè wündì muMunangè's wè. “Nzambì ùdi Bukènkè.”

¹⁶⁶ Mònayai, netùtwàdijilule mpindyewu bwà kumònà mwaba utùkaadi. Tucìdi mu mvensa mwi3, kî mmwômò anyi? NetùMupetè anyi? Ndi ntèkemena. Èyo:

... *yéyè... ùvwa ne mmwènekelu bu dibwe dyà yaspà ne dyà sardwanè: ne kùvwa mwanzankòngòlò... munyungulukile nkwasà wa butùmbi awu,*

mufwànàngane ne diikala dyà mâyì à matàmbà.
 (Dyà kàlaabi-bu-mâyì à matàmbà.)

¹⁶⁷ Mpindyewu, “mwanzankòngòlò,” nudi numònà ne cìvwa m’mwanzankòngòlò. Twàlukilààyibi mu Genèsè 9 bwà tujandule, mu Genèsè 9:13. Nènku netùsangane kaaba aka “mwanzankòngòlò,” pààkamwènekà mwanzankòngòlò bwà nzanzanza. Genèsè nshapità wa 9, nènku netùbangile ku mvensa wa 13, Genèsè 9:13. Nwènù bwônsò nudi baswè Cyôcì eci anyì? Kaa, ndi muCinange! Ncyêna ànu muCìswe to, ndi muCinange! Tàngilààyai:

*Nénteke bulelèlà ntafu wanyì mu mavuba, ne neìkale
 bu cimanyinu (Tàngilààyi’s!), cimanyinu cyà cipungidi
 pankaci pàànyì mêmè ne buloba.*

¹⁶⁸ Cinyi? “Pankaci Pàànyì ne Noà anyi”? To. “Pankaci Pàànyì ne buloba.”

*Nènku nebyènzekè, pangààtwàla divuba pamutù pàà
 buloba, ne ntafu awu neàmweneshiibwe mu mavuba:*

*Nènku némvùlukè cipungidi cyànyì, cìdi—cìdi
 pankaci pàànyì neenù...*

¹⁶⁹ Mpindyewu Yéyè ùdi wàlukila ku cipungidi Cyèndè pankaci pààbò, kàdi cipungidi cyà mwanzankòngòlò... Nwamònu’s, cipungidi cìvwa mmwoyi bwà Noà, bwà ne Yéyè wàkamupàndula, kàdi cipungidi cyàkenzà Nzambì ne Yéyè mwine cìvwa mwanzankòngòlò, bwà ne Yéyè kàvwa mwà... Mpindyewu, nénñùleejè cìvwa cipungidi cyà Noà ne Nzambì, mu katancì kakesè emu. Kàdi eci ki cipungidi cyà Nzambì Yéyè mwine ncyôcì eci ne Yéyè mwine, amen, mwanzankòngòlò.

¹⁷⁰ Mpindyewu, tudi tujandula dìbà adi ne cipungidi cìdi “cimanyinu,” cimanyinu. Nzambì mmwambe ne cìvwa “cimanyinu” mwab’ewu, kí mmwômò anyì? Nwamònu anyì?

*Mêmè...kutèèka wanyi...ndi mutèèke bulelèlà ntafu
 wanyì mu mavuba, (Aci’s mpaanyimà pàà dibutudiibwa
 dyà buloba, bunyangakaja kùdì mâyì; mubidi wônsò,
 pa kuumusha Noà—Noà, wàkabutudiibwa.) nènku
 necììkalè bu cimanyinu cyà cipungidi pankaci pàànyì
 mêmè ne buloba.*

¹⁷¹ Kí nne “Mêmè ne bàà pa buloba to”. *Bàà pa buloba* cìdi “kosmos.” Nwamònu anyì? Kàdi eci cidi “pankaci Pàànyì ne buloba.” Nzambì wàkamba ne: “Mêmè ngwakenza buloba abu. Nènku ndi mutambe kubuyoobesha bibyâbibi, mu mùshindù wa ne ndi mubukudimune munda ne paanyimà ne kubùtaayisha tupesetupese. Nènku—nènku kabìvwa bìkèngela bwà mêmè—mêmè—mêmè—mêmè kwikala mucyènzè to, pàmwäpa.” Yéyè ne: “Ngààlu—ngààlu kuumvwa mene ne luse, cìvwa cintu cibì be.”

¹⁷² Nudi nwela meeji ne necììkalè cinyì pààlwà Ye mu ciiji Cyèndè mpindyewu? Diteèke mu bulongame, mulunda wanyì ngènzhàmpèkààtù.

Kaa, ikàlà utàngila ne mwindile lùmònù
luwíkala mwà kumònà alu;
Yéyè ùlwalwa cyàkàbìdì.

Nudi nwitabuuja aci anyi?

Yéyè ùlwalwa cyàkàbìdì.

Ndi munange aci, kàdi nwêñù?

Kaa, udi muswà kubadiibwa bu umwe wa ku
balwishì Bèndè anyi?

Ncyêna mufwànyìne kwitaba bwà kwikala aci to. Udi mufwànyìne kucyènza anyi? To, mukalenge. Kwikala mulwishi wa ulwis-... anyi, kwikala mulwishi Wendè, kwikala Nendè ki kùdì kufwànyìne kwikala kwîmpè. Kàdi kulwishangana Nendè!

Kwikadi ne katòba munda to, ikàlà mutàngile
ne mwindile lùmònù luwíkala ne cyà kumona
alu,
Ùlwalwa cyàkàbìdì. (Hmm!)

¹⁷³ Mpindyewu, cipungidi, cimanyinu cyà cinyì? Cimanyinu cyà cinyì? Cyà mulàmbù údì mwitàbibiwbè. Mpindyewu angàtaku Genèsè 8:20 ne 22. Mpindyewu, Genèsè 8:20 ne 22, èyo, ànu luseke lukwàbò menemene lwà dibeji alu ke kùdìye.

Nènku Noà wàkaasa *cyoshelu bwà MUKALENGE; ne wàkangata... nyama yônsò mukezùke, ne... nyuunyi yônsò mukezùke, ne kulàmbula milambù yà dyôsha pa cyoshelu apu.*

Nènku *MUKALENGE* *kuumvwaye* *mupùuyà* *wà dipembu dîmpè; ne* *MUKALENGE* *kwamba Ye mu mwoyi wèndè ne: Ncyàkvela kàbìdì buloba mulawu nànsha* (kwela buloba mulawu) *nànsha kakesè bwà bwalu bwà muntu; bwalu didifwanyikijila dyà mu mwoyi wèndè ndibì kacya ànu ku bwâna bwèndè; anyi ncyàkushipaku kàbìdì cintu cyônsò cìdì ne mwoyi, bu mûndì mwenze emu to.*

¹⁷⁴ Nènku mpindyewu tudi mwà kubala mvensà wa ndekeelu:

Nènku... Pàcìdì buloba bucììkaleku, cikondo dyà dimiinu ne dinowa,... mashìka ne luuya,... muvù wà luuya ne wà mashìka,... muunya ne bufukù kabyàkujikaku to. (Cipungidi.)

¹⁷⁵ Cintu cìmwècìmwè cyàkamònà Yone aci: Yesù, cipungidi ciitàbìlbwe cyà Nzambi cinyùngulukile mu maulu. Ne mu nyùngulukilu Wendè amu mwikàle mwanzankòngòlò lwà ku Nkwasa wa butùmbi aku, ümweka bu mùdì Bukènkè bwà diikala dyà mâyì à matàmbà, lubìshibishi lwà mâyì à matàmbà mu

nyungulukilu wa Nkwasa wa butùmbi. Butùmbi kùdì Nzambì's wè!

¹⁷⁶ Tàngilààyi's! Wà Noà mmwenza nangananga... mwanzankòngòlò wà Noa mmwenza nangananga ne meekala mwandamutekète. Muntu kàna yônsò ewu's mmumanyè ne mwanzankòngòlò ùdi ne meekala mwandamutekète. Mpindyewu, meekala aa ki épì's? Dikùnze, dyà maanyimaanyì, dyà bleu mukùnzùbile, to, dikùnze—dikùnze, dyà maanyimaanyì...dyà mâyì à matàmbà, dyà bleu, dyà bleu wa mufiìke fitùtuu, ne dyà bleu wa mukùnzùbile. Awu's ki meekala à mwanzankòngòlò's. Mpindyewu, tudi ne cintu cyà ndòndò kaaba aka, nènku nebìkèngelè ànu bwà mfike ku dilenga myaba yààcì minène bwalu dìbà dikaadi dyènda dipita bikolè. Mpindyewu, nwavùlukaayi ne, dyà maanyimaanyì, anyì, dikùnze, dyà maanyimaanyì, dyà kàlaabi, dyà mâyì à matàmbà, dyà bleu, dyà bleu wa mufiìke fitùtuu, ne dyà bleu wa mukùnzùbile.

¹⁷⁷ Mpindyewu, bu nwêñù mwà kumònà, mwandamutekète. Tàngilààyi. Myanzankòngòlò mwandamutekète...meekala mwandamutekète, ndi muswè kwamba ne, mwanzankòngòlò wà meekala mwandamutekète. Mbwena kwamba ne ntafu mwandamutekète's! Ntafu mwandamutekète, èkèleeyìà mwandamutekète yìleeja makénkè mwandamutekète, bukénkè ne bukénkè bwônsò buvungila mu bukwàbò. Wakabanga ne dikùnze, dikùnze. Paanyimà pàà dikùnze kulwaku dyà maanyimaanyì, didì dileejiibwà dyà dikùnze adi. Paanyimà pàà dyà maanyimaanyì kùwwa... paanyimà—paanyimà pàà dyà maanyimaanyì kulwaku dyà kàlaabi, didì diikale dikùnze ne dyà maanyimaanyì masambakaja pàmwè, ki bìdì byenza dyà kàlaabi. Pashiìshe dyà mâyì à matàmbà. Dyà mâyì à matàmbà ne dyà bleu bìdì byenza difiìke. Pashiìshe kùlwa dyà bleu mufiìke fitùtuu. Nènku pashiìshe ku dyà bleu wa mufiìke fitùtuu aku kulwalwa dyà bleu wa mukùnzùbile, udi mwikale citùpà cyà bleu. Àlèluuyà! Kanwènaayikù numònà anyì? Nzambì, mu mwanzankòngòlò Wèndè wà meekala mwandamutekète awu, cipungidi Cyèndè cyàkenzàYe aci, cipungidi cyà ne ku Bikondo Mwandamutekète byà Èkèleeyìà, meekala mwandamutekète awu, Yéyè ûvwa mwà kusùngila buloba.

¹⁷⁸ CivwaYe mufwànyine kwenza ncinyì? Vùlukààyi ne, Yéyè mmucyénzè ne buloba, diikala Dyèndè adi. Kàdi tàngilààyi mpindyewu. Ànu mwanzankòngòlò ewu, mu bucýàmà bwàwu, ùdi ànu (mu mmwènekelu wa ntafu) ubwikidija citùpà címwè cyà buloba. Ki cyônsò civwa mwanzankòngòlò wa meekala wà Noà awu mubwikila...ànu, ànu cyàbibìdì címwè cyà buloba. Ùvwa mu mmwènekelu wa ntafu, ki cyônsò cinùdì mwà kumònà aci's. Kàdi pààkaMumònà Yone mu diikala Dyèndè dyà mâyì à matàmbà adi, Ùvwa munyungulukile Nkwasa wa butùmbi mujimà wa Nzambì awu. Cyàbibìdì

cikwàbò kacitu cyanji kwambiibwaku to. Wàkabwidijia... Ùvwà ànu... buloba mbwenze ànu ntafu, ùdi ànu cyàbìbìdì címwè cyàbò; s'ki bikondo byà èkèleeziyà abi's.

¹⁷⁹ Kàdi pààkaMumònà Yone mu diikala dyà mâyì à matàmbà matàmbe kutwìla, diikala dyà mâyì à matàmbà matàmbe kutwìla, kunyùngulukila Ye ne kubwidijia bu kafulu kàà bukènkè. Kafulu kàà bukènkè! Kafulu kàà diikala dyà mâyì à matàmbà à matambè kutwìla, Bùvwa bunyùngulukile buumùntù Bwèndè! Nwamònù anyi? Diikala dimwèpelè, Nzambì umwepelè kumutù kwà byônsò, ne kùdì bwônsò, ne mu bwônsò, kàdi kùdì Bikondo Mwandamutekète byà Èkèleeziyà.

¹⁸⁰ Tàngilààyì dibwe dinène dyà mbongù. Bàvwa ne ciibidilu cyà ku apeta... nudi mwà kuápeta mu Afrikè malekelela mu mísèèsù. Kùdìdìngi kùlami nànscha dìmwèpelè to, bwalu kî ndisonga to. Wéwè ne didi kadiyi disonga to, nebàkwelèlèdi mu bùlokò ànu buludi, ne bàkukosela bùlokò bwà matùkù èbè wônsò à mwoyi bwalu udi mudilame. Wéwè mudipete, ùkadìfile ànu paùdì udipeta apu.

¹⁸¹ Mpindyewu, bâdi bàngata mbongò ewu... Kaa, s'ncintu cikolè's. Ngààkamònà cyamu cisongi cinène cyà tonne makumi ànaayi ciimanyika mùshindù ewu, bàvwa bapongolwelamu mabwe à bleu awu, ciàsonga wônsò, civingutula nsàkàlàbwà ayi yìshàala ànu butù, kàdi kacìvwaku mwà kuvingga mbongò to. Cisongi cyà tonne makumi ànaayi aci cilembèlèle pa ndungilu kampànda, lwà kuulu eku, cinyunguluka cikudimuka eku ne eku ciikale ne nkàtà minène yà manungumanungu mùshindù awu, yìvvà ànu yizaaza nsàkàlàbwà ayi tupesetupese; kàdi mbongò yéyè ùwwa ùpicilamù, unyungisha mene ne cyamu cyà tonne makumi ànaayi aci. Kaa! Pàvwàci cizaaza ne cipwekela mu kasengelu, cisenga citùma mu tusengelu tukwàbò, cisampulula nènku ndekeelu wa byônsò ciya cyambula kùdì mulongo wà makaadìkà.

¹⁸² Mulombodi wa Mines minène yà Mbongò yà mu Kimberley awu ùwwa umwe wa ku baawisiyê bàànyì kuntwaku mu mulongo, mwanèètù wa balùme wa mupwekèle menemene, wa bupolè.

¹⁸³ Nènku pashìishe lwà kuulu kwà mâyì aku bu mu bule bwà mêtre umwe, mwaba uvwawu afùkukila awu, kùdì, Cosmolíne ngudibo batèèke muntwamu. (Nudi bamanye's, nutu nubiìkila cintakanyì aci ne ncinyì–ncinyì apa's? Kùdì... Meda, citùdi naaci mu nzàbà mu kazùbu kàà mudimu aci ncinyì? Vaseline!) Nènku tudi twela Vaseline awu, wipacila mu bule bwà cyàlà cijima, ùbanda too ne pa mibàngùbangu apa. Nènku ùdi ùpweka, kàdi mònàayi, dìbà dyônsò didi nsàkàlàbwà ayi yìbanda, yìdi yìbungulukila mu Vaseline awu amu; kàdi pàdì mbongò ùpicilapu, ùdi ulamata. Mbongò yéyè mmûme ne ùdi ulamata ku aci. Mêmè kubàmònà bàyàngula, too ne yà mikesè menemene ayi,

ne bàyìtapulula ne mènetà à mèssù. Ki mêmè kubàkonka cìvwàbò bacyenzela's, kwambabò ne bàdi bayìsumbisha ku Âmèrikè bwà kwenzabo tushìngi twà kwimbisha naatu diskè twà Victrola ne bikwàbò; katwèna tùpeluka to, nwamònù's.

¹⁸⁴ Kàdi mabwe manène à mbongò awu, mpindyewu, ki wôwò awu, ànu bunène bwà ndundu umwepelè munène. Kàdi pàdì... Bàdi baàngata ne bàngata màshinyì à nzembu bwà kuàsonga, ne benza mbongò wa musonga. Pashiìshe pàdibo bamusonga, mbwà kuleeja meekala à kapyà à bujitu bwèndè, nènku yéyé neàleeje meekala mwandamutekète, kàbidì's.

Kaa, mùshindù mwine ùwwa Yesù...

¹⁸⁵ Kaa, udi mufwànyìne kwikala ne mfranga yàbûngì, udi mufwànyìne kwikala ne milongolongo yà màshinyì à Cadillacs, udi mufwànyìne kwikala mpaasàtà wa nzùbu munène kampànda wa dilamina bitàlù anyì kàtèdralè kàà mùshindù kampànda, udi mufwànyìne kwikala mwèpiskòpò anyì mwèpiskòpò mutàmbidile, kàdi, kaa, mwanètù, paùdì upeta Cilengà aci, Mbongò awu, muntu ùdi ûsùmbisha bubanji bwèndè bwônsò bùdîye naabù abu, ùbùshìya, ne bikwàbò byônsò.

¹⁸⁶ Tàngilààyi virgo mukùtàkàne awu. Kaa, cyàkenzaye ncinyì? Byàkakèngela bwà kusùmbishaye cintu kampànda bwà kusùmbaye Maanyì. Byàkakèngela bwà yéyé kusùmbisha cinyì? Twitàbabààyi yèndè yà kale ne màngumba ne bikwàbò abi. Yéyé wàkasùmbisha byônsò bìvvàye naabi bwà kupetaye Kilistò, Kilistò, Cilengà cinène aci. Yesù, mubidi awu...[Katùpà kàà mukàbà wa mèyi munda mutupù—Muf.]...?...Ndi ne ticket wa kuya mu Dyulu pààlwà kàwulù, dìmwè dyà ku maadindà à mîdimà aa. Kaa, dibènesha kaayì's wè!

Kaa, nkawaka awu ngwa mushinga mukolè
Udi umvwijà mutòòke bu nêjè;
Ncyêna mumanyè mukwàbò mpokolo to,
Ànu Mashi à Yesù.

¹⁸⁷ Kakwèna luumù, kakwèna bintu binène, cintu nànsha cìmwè, kakwèna mabanji, cintu—cintu nànsha cìmwè, mpèëshaayi mêmè ànu Nkwaka wa mushinga mukolè awu. Bwalu's mbuuuke!

Ncyêna mulwe ne cintu nànsha cìmwè mu
mabòkò àànyì to,
Ndi ànu nkùlama ku Nkùrusè Webè.

¹⁸⁸ Cilengà cinène aci! Cìwva ncinyì? Cìwva cipwàngànè. Ùkaavwa ne bidimu makumi àsàtù ne bìsàtù ne citùpà pààkàMupìcishilà Nzambì mu cìshinyì cinène cyà ditondoka aci, pààkayà Ye naaDì kuntwaku ne kubanga kuDìsonga. WàkaDìkosa, WàkaDìboza, WàkaDìzaaza.

...wakatàpiibwa mpùtà bwà dishipa dyètù dyà
mikenji,...muzaajìibwe bwà bubì bwètù: dinyooka

dyà ditalala dyètù dyàkapònà pambidi pèndè; ne ku mibündàbündà yèndè twâkondopiibwa.

¹⁸⁹ Nzambì wàkenzela Muntu mupwàngànè awu cinyì? Kùdi ànu umwe wabò pa buloba, ànu umwèpelè pa buloba, ne ùvwa n'Yéyè! Ki Nzambì kuMusongayè mwaba ewu: "Wàkatàpiibwa mpùtà bwà dishipa dyètù dyà mikenji." Bwalu mumvwà ngènzàmpèkààtù, Wàkalekela Bukénkè bwà mwanzankòngòlò wa Bikondo Byèndè Mwandamutekète byà Èkèleeyiyà bubàlakanà pambidi pàànyì, bwà kumanya ne Wàkatàpiibwa mpùtà bwà dishipa dyànyì dyà mikenji.

¹⁹⁰ Ki mwanzankòngòlò wènù wà meekala mwandamutekète awu ngwôwò awu's. "Wàkazaajiibwa bwà bubì bwètù, dinyooka dyà ditalala dyètù dyàkapònà pambidi Pèndè, ku mibündàbündà Yèndè twâkondopiibwa." Nzambì wàkaMukòsa, ne kuMuzaaza, ne kuMubòza, ne kuMukòsa, bwà Wàmòna mwà kuleeja ku mpùtà Yèndè yìdì yìpunga ne lufù ayi, difwidiibwa dyà luse ku mpèkaatù, disànkà, ditalala, mwoyi mule, bwímpè, bupolè, kalolo. Nyumà mwandamutekète yà Nzambì ayi ki mamuma mwandamutekète à Nyumà àvvà ne cyà kulwa kuleejiibwa mu cisàmbà Cyèndè. Wàkazaajiibwa, kusongiibwa ne kufwimbiibwa, bwà Bukénkè bwà Nzambì bùdì bùkenkelà mu mubidi wa Muntu umwèpelè awu abu bwàfwànyina kupikula buloba bujimà; "Némibandishiibwè pa buloba, Nénkokè bantu bwônsò kúNdì." Tàngilààyi mwanzankòngòlò wa meekala awu pàdìwo àdìleeja apu's.

¹⁹¹ Kàdi pààkaMumòna Yone mwab'ewu, cìvwa ncinyì? Ditùkù dyà kupikula dikaavwa dijike. Bwalu bukaavwa butùùke, ki yéyè kuMumònaye mu ngìükadilù Wendè wa kale wa ku cibangidilu awu, diikala dyà mâyì à matàmbà ditàmbe kutwila. Kaciyi ànu cyàbìbìdì cìmwè cyà buloba to, cidi ànu mwà... dîbà, didi ànu mwà kukenkesha cyàbìbìdì cìmwè cyà buloba musangu ùmwè, nwamònu's, pàdibu bunyuguluka apu. Kàdi pààkaMumòna Yone, Ùvwa musòmbe ne mmwènekelu wa dibwe dyà yaspà ne dyà sardwànè, meekala à mâyì à matàmbà matàmbè kutwila awu; wêwè musambakaje àbìdì awu pàmwè, udi upeta diikala dyà mâyì à matàmbà dyà ditàmbe kutwila adi. "Ne diikala dyà mâyì à matàmbà dyà ditàmbe kutwila adi dinyungulukile Nkwasa wa butùmbi!" Kaa, ekèlekèle! Kaa, ndi-ndi nkawambila ne, ànu... tudi bafwànyinè kutùngunuka ànu ne kuya.

¹⁹² Nyumà Mwandamutekète, meekala mwandamutekète, bikondo mwandamutekète byà èkèleeyiyà, bambi mwandamutekète, makénkè mwandamutekète, byónsò bìdi mu mwandamutekète. Nzambì mmupwàngànè mu "mwandamutekète." Nzambì wàkakwàta mudimu matùkù àsambòmbò; ditùkù dyà mwandamutekète, Wàkiikisha. Buloba nebwikalèku bidimu binunu bisambòmbò, ne cinunu cyà mwandamutekète m'Bukalenge bwà bidimu cinunu.

¹⁹³ Mònaayi, *mu cyàbìbìdì cyà cijèngù*, “cyàbìbìdì cìmwè kacyèna ànu cimanyìlbwe to.” Mpindyewu, ncyà bushùwà ne bintu ebi bìdi bìleeja cintu kampànda.

¹⁹⁴ Mpindyewu, mu Ekèsòòdè 23:13 ne mu Ebèlù 6:12, Nzambì wàkenza cipungidi ne Yéyè mwinè ne wàkadìcipila ku Yéyè mwinè. Ebèlù :13 ùdi ùtwàmbila, anyì 9, :13, ne: “Wàkadìcipila ku Yéyè mwinè.” Kakùvwa mutàmbe bunène bwà kudìcipilaku to pààkambilàYe Abraham ne Izàkà ne, mwaba awu Yéyè ùvwa mwambile Abraham ne Ùvwa mwà kwenza nendè cipungidi, cipungidi cyà kashidi. Nzambì . . .

¹⁹⁵ Cipungidi citu misangu yônsò cyenzela ànu ku mucipu, pa nànku kakwèna muntu nànsha umwe. . . Udi udicìpila ku muntu kampànda udi munène mukutàmbe wêwè; udi udicìpila ku mamwébè, udicìpila ku ditùngà dyèbè, udicìpila ku cintu kampànda, udicìpila ku Nzambì. Kàdi kwêna mwà kudìcipa pàdiku kakùyì muntu kampànda munène mukutàmbe wêwè to.

¹⁹⁶ Ne kakùvwa muntu nànsha umwe mutàmbe Nzambì to, pa nànku Wàkadìcipila ku Yéyè mwinè, ku Yéyè mwinè. Amen! Ùdicìpila ku Yéyè mwinè ne Ùvwa mwà kushìndika cipungidi eci. Amen. Kaa! Yoyòyo! Wàkadìcipilakù, Yéyè ùvwa mwà “kulaminyina Dimiinu dyà Abraham.” Dimiinu dyà Abraham kùdì bàà Bisàmbà byà bendè ncinyì? Dibàtiiza dyà Nyumà Mwímpè, Dimiinu dyà Abraham. Wàkadìcipila ku Yéyè mwinè ne: “Nêmbarìshè, muntu ne muntu, ku lufù. Nêmbarèshè Mwoyi wà Cyendèlèlè ne kubàluja pa buloba apa.” Citùdì mwà kuditaci— . . . kwela meeji pa bwalu abu ncinyì?

¹⁹⁷ Pa nànku tudi tuMumòna mu cijèngù cyà mâyì à matàmbà, diikala dyà kàlaabi kabwicidile. Diikala dyà lubishibishi edi, mâyì à matàmbà àdi àleeja cinyì? Mwoyi. Mâyì à matàmbà mbwena kwamba ne mbubishi bwà kashidi, ùshààla dîbà dyônsò ànu mubishi, s’ki mwoyi awu. Cìdi cyùmvwija cinyì? Ne Nzambì wàkalaya, bu mwàkenzàYe mucipù mu Genèsè amu, ne Yéyè “kàvvwakù mufwànyìne. . .” (Kutèèka mwanzankòngòlò mu dyulu.) mùdì Ye “kàiyikù mufwànyìne kàbìdi kubùtula buloba ebu ku mâyì to.” Yéyè ùdi wenzà kàbìdi mucipù Wèndè ne ùdícipa kùdì Yéyè mwinè ne Yéyè neàjuule Dimiinu dyônsò dyà Abraham, ne buloba ebu nebùpicile ku dinyukishiibwa dyà bilumbulwidi byônsò. Netwákule bwà bilumbulwidi abi mu maleesònà àcìlwàwà kumpàla eku, netùnùleeje mwaba wìkala buloba ebu mwà kubyola ne kwalukila ku difùkuka dyà volcan, ne kutaayika mu tupesetupese, ne kukùdimikiibwabu ne bikwàbò byônsò. Kàdi Yéyè wàkadìcipila ku Yéyè mwine ne Kààkubùbùtulakù to, kàdi Yéyè neàbùlandàkaje cyàkàbìdì ne neàteeke bânà Bèndè pa buloba bwà Bukalenge bwà bidimu cinunu abu. Kaa, ekèlekèle!

Ndi mwindile dilwa dyà ditùkù dyà disànkà
dyà Bukalenge bwà bidimu cinunu adi,

Dyàlwà Mukalenge wetù mubènèshìibwe
awu bwà kubàkula Mukàj'Èndè-musèla udi
mwindile;

Kaa! Mwoyi wànyì wùdi wùjinga wàmba
kufwà, wùdila bwà ditùkù dyà disùngidiibwa
mu kalolo adi,

Dyàlwà cyàkàbìdì Musùngidi wetù pa buloba.

¹⁹⁸ Kaa, mùshindù mwine utùdì tujinga kumònà Ditùkù adi's wè, Yéyè wàkalaya ne Bukalenge bunène bwà bidimu cinunu bùvwa mwà kulwa. Kàbìdì cíngà cintu, cìvwà cyenza ne Yikale munyunguluka, Yéyè's Nzambì mulami wa cipungidi. Yéyè neàlame cipungidi Cyèndè's!

¹⁹⁹ Mpindyewu twàngatààyi mvensa udi ulonda awu, nànsa bìshi. Ekèlekèle, tudi baswe kwangataku mukwàbò kàbìdì, ne tucìdi ànu ne tusunsa tutwè ku dikumi, dikumi ne tùtaanu bwà kucyènza. Nwacyòku anyì? Nudi baswè kutùngunuka anyì? [Disangisha dìdi dyàamba ne: "Amen."—Muf.] Èyo, twàngatààyi mvensa mwi4:

*Ne lwà mu nyùngulukilu wa nkwasà wà butùmbi
amu müvwa nkwasà makùmi àbìdì ne yìnaayi: ne
pa nkwasà ayi ngákamònà bakùlù makùmi àbìdì ne
bànaayi basòmbe, bavwàle bivwàlù bitòòke; nènku
bavwa bavwale bifulu byà butùmbi bya ngôlò ku mitù
yàbò.*

²⁰⁰ Tudi mwà kupanga kuya ne kundekeelu kwà mvensa awu. Èè, tùbangàayi. Mvensa mwi4, tàngilààyi mpindyewu, pààka Mumònà Yone, diikala dyà mâyì à matàmbà dyà ditwile adi di Munyùngùlùkile, twamònú meeakala ônsò awu, myanzankòngòlo, ne bikwabò, ne byônsò bivwabi abi. Mpindyewu, mu mvensa mwi4, cintu cyà kumpàla cìdìye wàkula mwab'ewu, ku mvensa mwi4 ew... .

Ne lwà mu nyùngulukilu wa nkwasà wa butùmbi... .

²⁰¹ Tàngilààyi! Neimfwànyì cilenga be kaaba aka, kacìnùpici to, "Nkwasa wa butùmbi."

²⁰² Nudi bamanyè's, twàlukilààyi kùdì Môsà. Môsà... Katwèna ne dîbà dyà kubyùmbula to, pa nànkú angàtayi ànu cîndì ngàmbo aci. Môsà, pààkamupèeshàbo cìkèènà-kumònà pa Mukùnà wà Sinààyì... .

²⁰³ Ndi muswè bwà numònè ne eci kacìcìvwa kàbìdì Nkwasa wa ngâsà to. Mwaba awu, mashi àkaavwa mamanè kuya, ne mulàmbù ùkaavwa mwalùkile cyàkàbìdì ne bàvwa biitabiibwe, ne mashi kâvwa pa nkwasà wa ngâsà to. Nànkú cìvwa mpindyewu nkwasà wa cilumbulwidi bwalu mikungulu ne mipenyi bivwa bipàtukilamù. Ncyà bushùwà anyì?

²⁰⁴ Vùlukààyi ne, cìvwa bu Mukùnà wà Sinààyì. Pààkaya Môsà pa Mukùnà wà Sinààyì apu, cyàkenzeka ncinyì? Mikungulu,

mipenyi. Nànsa ngombe anyì kânà kàà ngombe anyì mùkòòkò, anyì ní nganyì ní nganyì, mulenge mene mukùnà awu, ùdi ne cyà kufwà. Bible mmwâmbé ne: “Dikanka dyà buloba dyàkadi dinène dyà kacya mu mushindù wa ne nànsa Môsà mwine wàkaciìna.” Ki Môs... Yéyè ne: “Kopolà bísàbaatà byèbè mwaba ewu, udi usanganyiibwa mu malaba à Cijila.” Yoshùwà mulwanganyi munène wa mvitâ awu, ùvwa ne cyà kusabwisha bânà ne kwabanya bumpyànyì bwàbò, ùvwa ànu mwà kubànda citùpà cyà njila pa mukùnà apu.

²⁰⁵ Ki Môsà udi mwimane pààpa wàwa ne meekala à àpodya à Nzambì ne mikenyi ne yà diikala dyà mâyi à matàmbà matwile mamunyìngùlukile, ùbandila mèyi matùma awu àfundiibwa. Mwimàne mu Bwikadi bwà Nzambì, Dìyì adi diikàle dyàndamuna ne: “Môsà, udi penyi? Kopola bísàbaatà byèbè, s’udi mu buloba bwà Cijila.”

²⁰⁶ Nkwasa wa cilumbulwidi, ki cìvvàci mpindyewu, cintu nànsa cìmwè kacivwaku mwà kwimana mwaba awu to ànu bapikùdùibwe. Ngènzàmpèkààtù kàvvakù mwà kuseemenakù to nànsa kakesè (kwàmanyì kujika), nkwasa wa cilumbulwidi. Eyo.

²⁰⁷ Mpindyewu, Môsà wàkenza bintu pa buloba, wàkenza tabernacle, bifwàràngane ne bintu byàkamònàye mu Dyulu abi. Tudi bamanyè nànku, kî mmwômò anyì? Tudi tusangana ne Pôlò wàkenza cintu cìmwècìmwè aci. Ùvwa ne cyà kwikala ne... Ebèlù 9:23, uvwa Môsà mwenze maalu ànu menemene mwàkenzaye yéyè amu. Nènku Pôlò mu cikèènà-kumònà cyèndè pààkabàndaye mu Dyulu (pààkalongeshàye Mukàndà munène wa Ebèlù awu apu), ùvwa ne cyà kwikala mumòne mu cikèènà-kumònà cyèndè cintu cìmwècìmwè cyàkamònà Môsà aci, bwalu mmwambe ne (wàkalongesha Mukàndà mulenga wà dikèma wà Ebèlù awu), mushindù ùvwa bwena Kilistò bwikàle mubidi wà bwalu wà Dipungila Dikulukulu. Yéyè ùvwa mulongeshi munène, Mô... Pôlò awu’s. Mpindyewu, ki cìvvà Nkwasa Wendè wa butùmbi dìbà adi. Pashiìshe mu...

²⁰⁸ Twànjààyibi ànu... Kakwèna dikwàcisha to, ncyêna mwà... nkaavwa muswe kulekela bwalu ebu, kàdi ncyêna ànu mwà kubulekela to. Mboodi wa kufundila ùdi penyi? Nuvwa bamuumùshe anyì? Ùdi paanyimà anyì, Doc? Èè, pàmwàpà ndi mwà kunufikisha ku dicimwèna mwaba ewu. Ndi—ndi... Mpindyewu, angàtayaai crayons yènù ne mabèji, bwalu ndi muswè kwambaku cintu kampànda mwab’ewu. Mvwa—mvwa musòmbe mu dindà emu pàvwa cintu kampànda cilwa kündì. Mpindyewu nénkwambilè cìngààkenzà, bu nwènù mwà kumònà, ndi mucizôle lwà paanyimà apa. Nwamònù anyì? Kucìzola ànu buludi ànu mùvwà Nyumà mucìmpèèshè, nwamònù’s, kuzola mwab’ewu civwàci ne cyà kwikala. Kàdi ndi—ndi muswè kwambakù cintu kampànda mwab’ewu mene.

²⁰⁹ Mpindyewu, Nzambi, pàdìYe ùtèèkiibwa mu nkwaswa wa butumbi apu, Yéyé ùdi díbà adi Mulumbulwishi. Ncyà bushùwà anyì? Nzujì ùdi ùlumbulwisha díbà kaayì? Pàdìye ùlwa ku nkwaswa wendè wa cilumbulwidi, nkwaswa wa butumbi. Mpindyewu, ndi muswè bwà numòne mùshindù wàkenjiibwa Dipungila Dikùlùkulu, mùshindù ùvwa mbàlandà yà pabwîpì ne Nkwasa Wendè wa butumbi awu myenjìibwe, ne mùvvà Yone mumòne kaaba aka. Katwàkufikakù mu dìndà emu to, mu cyônsò aci. Kàdi mùshindù mwine wàkamònà Yone mbàlandà yímwèyimwè yà dissemena kùdiYe, ne cìvwà dissemena ku mbàlandà Yendè. Mpindyewu, kaa, ndi munangepu eci.

²¹⁰ Mpindyewu, mu Dipungila Dikùlùkulu, kùvwa cìvwà cìbììkidiibwà ne “disangisha aci,” kùvwa bantu badisangìshe. Cintu cyà kumpàla, kumpàla kwà kubwelabò, disangisha, bwà kubweladi mwómò amu, bìvwa bìkèngela bwà kulwabò mwinshi mwà mashi meela pansi, mbàlandà yà pambèlu ayi. Dyàmbedi bàvwa bálwa ku mâyì à ditàpulula, kùvwa ngombe wa lukùngùlù mukùnze ùshipiibwa ne wènjiibwa mâyì à ditàpulula. Ke ngènzàmpèkààtù nyéyè awu udi ulwa utèèleja Dìyì.

²¹¹ Mùshindù awu ki wàkatwàdiibwà laabì munène wa beena Yudà ewu ànu kùdi Mukalenge, pààkangumvwayè nyiisha pa cyôcì aci mu . . . ku Tulsa. Ku Tulsa, ki cìvwàku. Tuvwa ku Tulsa, mu Oklahoma. Ki kulwaye kuntwaku, ànu bu mubandidi. Ki kulondaye disangisha adi, kwambayè ne: “Ndi mumanyè!” Yéyé ne . . . Yéyé ewu ki umwe wa ku baalaabi mwandamutekète bâà batàmbe kumanyika bâà pa buloba abu. Ki kulwaye mwaba awu, kwambayè ne: “Ndi muswè kumònà cidi beena Kilistò bâà Kantu-ku-byanza abu bâba . . . Babâbììkila ne: ‘Beena Mpenta.’ Ndi muswè kuyakù, kusòmbela pansi, kutèèleja.”

²¹² Nènku pààkandombola Mukalenge bwà mêmè kwakula pa mulàmbù wà ngombe wa lukùngùlù mukùnze awu, paanyimà pàà disangisha yéyè kutwilangana ne bàmwè bâà ku bânà bètù bâà balùme abu kuntu kwàka, kwambayè ne: “Ndi muswè kutwilangana ne muntu awu. Ndi mumanyè ne kêna nànsha ne kàlaasà kalonga to kàdi . . .” Yéyé ne: “Mêmè ndi laabì wa beena Yudà udi mumanyè mishindù yônsò mishìlèshìllàngànè yà dissemena ne bintu byà mùshindù awu abi,” yéyé ne: “Kacya bandela ncitu mwanji kumònà aci to.” Yéyé ne: “Ncitu mwanji kucìmònaku to.”

²¹³ Nènku mpindyewu yéyè ùdi laabì wa beena Mpenta, muujiibwe tèntè ne Nyumà Mwîmpè, ùya myaba yônsò, ùyiisha Èvànjeeliyò. “Laabì mwena Mpenta,” müdiye ùdibììkila. Wàkaya ku Cilààla-beenyi cyà mu Washington Youree, ditùkù adi patwàkatwilanganà pàmwè kwà Mwanèètù Jack, ki inábànzà awu kumumanyayè, kwambayè ne: “Laabì,” yéyè ne, “tudi ne mwaba mulenga bwèbè wèwè, kàdi” yéyè ne: “katwènamù ne télèvìziyô to.”

²¹⁴ Yéyè ne: “Bintu abi bìdi ‘ifernovìzìyô,’ byelààyi pambèlu! Ncyêna muciswemù to, nànsha bishi; bu cyóci mwômù, mvwa mufwànyìne kunwenzeja bwà kucyèla pambèlu.”

Yéyè ne: “Laabì!”

Yéyè ne: “Mémè ndi laabì wa beena Mpenta.” Àlèluuyàh!

²¹⁵ Yéyè ne: “Mpindyewu, pawàyà mu Izàlèèlè, Mwanèètù Branham, ndi muswè kuya neebè.” Yéyè ne: “Tudi mwà kucitwadila cisàmbà cyètù.”

²¹⁶ Mémè ne: “Kî mpindyewu to, Laabì, mpindyewu to. Kî mpindyewu to, kî ndibà mene to, anjì indilàbi kakesè.”

²¹⁷ Mpindyewu, mònaayi myaba yà cijila eyi. Mpindyewu, paùdi ubwela mu mbàlandà, cyà kumpàla’s mbàlandà, mbàlandà yà pambèlu ayi. Civwà cilondà cìvwa ncyoshelu, kùvwàbò bâlambula milàmbù, cyoshelu cyà cyamù cyà kabanda. Pashìshe pambèlu pàà cyoshelu cyà cyamù cyà kabanda aci, kùvwà cilàmbà cikùdika cìvwa cikùdika mwab’ewu cìvwa cibweja mu Mwaba mutàmbe cijila; mwômò amu mùvwa nkwasà wa ngâsà, mwômò amu mùvwa Bakélùbà. Ki cîndì muswè kuleeja mu dileesònà dyètù didi dilonđà, Bakélùbà abu biikàle bàbwikila ne mundidimbì nkwasà wa ngâsà. Kaa, ekèlekèle! Ndi . . . Tudi mwà kushààla ànupù ngondo ewu mujimà, nwamònù’s, pa Mukélùbà awu.

²¹⁸ Mpindyewu, mpindyewu mònaayi pàvvàbo bàbwelamù. Disangisha divwa mwà kulwa *mwaba awu*; baakwidi bàvwa mwà kwimana *apa*; kàdi ànu mwakwidì mutàmbe bunène ki uvwa mwà kubwela *muntwamu*, musangu ùmwè ku cidimu, ûyamu ne mashi.

²¹⁹ Nénku bìvwa bìkèngela ikalè muvvale mùshindù kampànda, civwalu kampànda; bìvwa bìkèngela kwikalayè ne ngonga ne grenade, aka kalondangane ne kakwàbò. Nénku pàvvàye wènda, bìvwa bìkèngela bwà yéyè kwenda mu mùshindù kampànda. Pàvvàye wènda apu, tûvwa tûdila ne: “Wa cijila, wa cijila, wa cijila, kùdì Mukalenge. Wa cijila, wa cijila, wa cijila, kùdì Mukalenge,” tungonga atu ne grenades ayi bìdila pàmwè ne: “Wa cijila, wa cijila, wa cijila!” Bwà cinyi? Yéyè ùvwa wènda useemena pabwípi ne Nzambi, mwikàle ne mashi à cipungidi mu cyanza cyèndè, wènda uya kumpàla Kwèndè, mwambùle mashi.

²²⁰ Mwela maanyì (Kaa, ekèlekèle!) ne mânanshi kampànda. Bilàmbà byèndè bìvwa ne cyà kwikala byenza kùdì byanza byûle tèntè ne Nyumà Mwîmpè, byanza bijidila ki bìvwa byenza bilàmbà abi’s. Rose wa Shalònà, maanyì à dilaabiibwa, kuàpòngolwela pa mutù wèndè apu, àvwa àpweka too ne ku mwedi wèndè ne pashìshe àpweka àmwangalaja mwaba wèndè awu manànanshi à bukalenge; grenade ne kangonga; mwambule mashi à mwânà wa mùkòòkò uvwa kàyì mwenze bwalu to; nénku kàvwa mwà kudidìnga kuseemena ku cibwikilu lwà pambèlu to, ùvwa mufwànyìne kufwila ànu mwaba awu, mwaba ùvwaye

mwimanyine awu's. Pa nànku bìvwa bìkèngela bwà yéyé kuya, wènda wènda mùshindù kampànda ne: "Wa cijila, wa cijila, wa cijila, kùdì Mukalenge. Wa cijila, wa cijila, wa cijila," (ùseemena kùdì Nzambi) "kùdì Mukalenge. Wa cijila, wa cijila, wa cijila!"

²²¹ Ki kuyaye kuntwaku ne kulàmbùlayè mashi ku nkwaswa wa ngâsà aku, musangu ùmwè ku cidimu. Nènku pàvvwàye mwômò amu apu, ûvwa ne dyésè dyà kumònà Butùmbi bwà Shekìnàh; pàvvà Dikunji dyà Kapyà, Bukénkè bwà mâyì à matàmbà butàmbe kutwila abu bupweka, bwàkalamboala kupàtula bânà bâà Izálèèlè abu. Bwàkuuja mene ntempèlù ne mwîshì mu mùshindù wà ne muntu nànsha umwe kâvwakù mwà kuBùmònà to. Butùmbi bwà Mukalenge kutùùluka too ne mùvvwàmu muujiibwa ne mishì. Nènku wàkabwelamù Yéyè mwine, kubwelaYe paanyimà pàà cibwikilu ne kusòmba pa nkwaswa wa ngâsà mu Mwaba mutàmbe cijila. "Mwaba mutàmbe cijila," mùdibo bàwùbùkila, Mwaba mutàmbe cijila. Nènku bìvwa bikèngela bwà yéyé kwikala muvvwàle mùshindù kampànda, wènda mùshindù kampànda, mwedùbbwe maanyì mu mùshindù kampànda. Yéyè ûvwa muntu wa pabwèndè bwà kubwelayè muntwamu. Mùshindù mwine ûvwa disangisha ne cyà kwikala dìmwakalakan'a's wè!

²²² Kàdi pààkafwà Yesù, cilàmbà-cikùdika cyà mu ntempèlù cyàkapandika. Kabiciyì ànu mwakwidi munène to, kàdi "ewu yônsò udi muswè" ùdi mwà kupeta dilaabiibwa dimwèdìmwè dyà Butùmbi bwà Shekìnàh adi ne kwenda lwendu lwà cijila ne: "Wa cijila, wa cijila, wa cijila, kùdì Mukalenge," ne kuseemena mu Bwikadi mene bwà Nzambi, ku Mashi à Yesù Kilistò kumpàlè kwèndè. Üya nendè ne: "Mukalenge Yesù, s'ki mubèèdì ewu mudyadije kaaba aka, s'mmwanèètù wa balùme. Üdi pa bulààlu bwà lufù patùdì twakulangana apa, bwà kufwà. Nyéwù nseemena Kûdì ne: 'Wa cijila, wa cijila, kùdì Mukalenge.'"

"Bwà cinyì?"

"Bu mwakwidi munène."

"Bwà cinyì?"

"Pa kaaba kàà mwanèètù. 'Wa cijila, wa cijila, wa cijila, kùdì Mukalenge.'"

²²³ Ki bwalu mbwôbù abu's! Lwendu lwèbè lwà ku ditùkù ne ku ditùkù, dyakula dyèbè dyà ku ditùkù ne ku ditùkù, diditwàlè dyèbè dyà ku ditùkù ne ku ditùkù, mwoyi wèbè, musùùkà wèbè, ne byônsò: "Wa cijila, wa cijila, wa cijila, kùdì Mukalenge." Kakuyi miji yà bululu to, cintu cikwàbò nànsha cìmwè to, "Wa cijila, wa cijila, wa cijila, kùdì Mukalenge. Wa cijila, wa cijila, wa cijila, kùdì Mukalenge," bu mutùdì tubanga kuseemena pa kaaba kàà mwanèètù. Ewu yônsò udi muswè ùdi mwà kulwa, mulaaba maanyì, ne Mashi kumpàlè kwèndè, Mashi àdyanjidila kumpàlè kwèndè, ìmba "Wa cijila, wa cijila, wa cijila, kùdì Mukalenge."

²²⁴ Mpindyewu, awu's ùvwa mbàlandà wa pambèlu, mwaba wà cijila. Ne Mwaba mutàmbe cijila, ùvwa mmwaba wa cijila wa Nzambì pa buloba. Tàngilààyi, cìvwa cifwànyikijila pa cyà ku Dyulu. Mpindyewu, netwàlukilè cyàkàbìdì buludì ku Mufùndu wùmwèwùmwè ewu. Kaa, patùdì tulonga Bwàkabuulwibwà apa, tudi mwà kwalukila buludì cyàkàbìdì ku cyôcì eci. Ñwamònù anyì?

²²⁵ Mpindyewu yêyè... Yone, Yone mmwimanyine penyì? Ku mbàlandà. Twänjìbi kubalakù ànu ndambù kaaba aka bwà nwamònà mwà kuumvwa cimfwànyì aci:

Ne ku nkwaswa wa butùmbi kùvwa kùpàtuka mikenyi...mikungulu...meyì: ne kùvwa myêndù mwandamutekète yà kapyà (Indilaayi too ne patwàfikà ku cyôcì aci!) miikàle yìteema kapyà kumpàlà kwà nkwaswa wa butùmbi, yìdi miikale Nyumà mwandamutekète yà Nzambì.

²²⁶ Miikàle yìleeja Bukénkè bwà Nzambì mu Èkèleeyiyà, buludi bùfùmina ku Nkwasa wa butùmbi wa Nzambì, kî nku sèminérè kampànda to, kî nkùdì mwepiskòpò kampànda to, kàdi ku Nkwasa wa butùmbi wa Nzambì, ku dibuulula dyà bukolè bwà dibìkkà Dyèndè dyà ku lufù, uMuvwija umwèumwè awu makèèlèlè too ne kashidi; mìootò mwandamutekète ayi miimane mwaba awu yìleeja Bukénkè abu, Bukénkè bwà Shekìnàh, buumukila ku Butùmbi bwà Shekìnàh bwà mu Mwaba mutàmbe cijila awu. Myêndù mwandamutekète yìteema kapyà, misòmbesha ku lusongo lwà bitèèkedi byà myêndù ebi, mwikàle üleeja Bukénkè Bwèndè, meekala Endè, à bukolè Bwèndè bwa dibìkkà Dyèndè dyà ku lufù, buludì mu Èkèleeyiyà. Amen! Hmm!

Ne kumpàlà kwà nkwaswa wa butùmbi...kùvwa mbù wa lumwénù mufwànàngànè ne ntàlatalà: ne munkaci mwà nkwaswa wa butùmbi, ne lwà mu nyìngulukilu wa nkwaswa wa butùmbi, mùvwa bifükùbwà binaayi byûle tèntè ne mèsù kumpàlà ne paanyimà.

²²⁷ Nènku ùdi ùtungunuka ne ùbanga kufila cyôcì eci... nyama eyi, cintu cìmwècìmwè cyàkamònà Yéhezèkèlè aci; balami abu... umwe bu muntu, umwe bu nyama wa ntambwe, ne umwe bu mukanku. Cìvwa ncinyi? Mpindyewu, tàngilààyi, patwàbabweja ne kuleeja Ntambwe wa Cisàmbà cyà Yudà awu ne bakwàbò bashììleshììlàngànè bwònsò bàà mu bisàmbà byàbò, bàvvà bàsòmba pa bimanu binaayi abu, ne bàvvwa bàlama nkwaswa wa ngâsà ewu. Kaa, ncimfwànyì kaayi's wè! Kaa, ndi ànu... Kùdi matukù manène kumpàla eku.

²²⁸ Ànu mutùvwà babimònè, mpindyewu, cìvwa n'Nkwasa wa butùmbi wa Nzambì mu Dyulu, Môsà wàkaMufwànyikija pa buloba, cìvwa n'Nkwasa wa butùmbi wa Nzambì bwalu nkwaswa Wendè wa cilumbulwidi ùvwa muleejìbwè pa buloba apa

mu Mwaba mutàmbe cijila awu. Nzambì... Izàlèèlà mujimà wàkalwa ku mwaba ùmwèpelè awu bwà kupeta luse, bwalu Nzambì ùvwa ùtuutakeena ànu mwinshi mwà mashi meela panshì.

²²⁹ Mpindyewu, tèèlejààyi ne ntèmà. Pashìishe Butùmbi bwà Shekìnàh kuuukabu mu nkwasà wa ngàsà awu díngà ditùkù, ki Bwôbù kusòmbabù mu mukwàbò Tabernacle (Amen!), Ewu nùnku: "Taatù kèèna ulumbulwisha muntu nànscha umwe to kàdi Yéyè mmufile dilumbulwisha dyônsò kùdì Mwânà." Nkwasa wa Cilumbulwidi wa Nzambì. Yòyòyò! "Nwênu baakule bibì Bwànyì, nenùfwìdiibwe luse," baakule bwà mukwàbò—mukwàbò ulwàlwa Awu, mukwàbò Nkwasa wa Ngàsà. "Akula... wêwè mwakùle bibì bwà Mwânà wa muntu, Mémè nénkuwfìllè luse; kàdi díngà ditùkù Nyumà Mwîmpè neàlwè bwà kusòmbela mu myoyi yà bantu, díyì dìmwèpelè dibì bwendè Yéyè kadyàkufwidiibwaku luse to."

²³⁰ Cìdi cìtùngunuka ne kutàmba kulwa cyà dísù dikolè ne dísù dikolè dyà menemene díbà dyônsò, cilumbulwidi, bwalu lutùùlù lwà Nzambì lüdi lwenda ànu lushèèkeleka, pàdi Ye uteeta bwà kufikisha bangènzàmpèkààtù ku dilwa kùdì Ye bwà kupungishiibwa. Dyàmbedi, Yéyè ùvwa mu maulu kuulu ne ùkenkeshila mu mítootò. Ciibidì, Yéyè ùvwa pa buloba munkaci mwà kukenkeshila mu Butùmbi bwà Shekìnàh. Pashìishe, Wàkalwa ne wàkawijiibwa mubidi ne wàkasòmbela munkaci mwètù, lutùùlù Lwèndè lucidi ànu lwenda lushèèkeleka. Pashìishe Yéyè wàkapikula muntu ku Mashi Èndè, wàkabwela mu Èkèleeziyà Wendè mu mmwènekelu wa Nyumà Mwîmpè, ne kwakula bibì bwà Aci s'nkujike, bwalu mbutùùke.

²³¹ Mpindyewu nudi mwà kumònà kùdì dinyùkùshiibwa dìlwa. Kabèèna bàfika ku dyumvwa cikondo citùdì to. Bantu kabèèna mwà kuumvwa cidiCi cyùmvwija to.

²³² Mpindyewu, Nkwasa wa butùmbi wa kumpàla ùvwa mu Dyulu, nkwasà wa cilumbulwidi. Nkwasa wa butùmbi mwibidì ùvwa mu Kilistò. Nkwasa wa butùmbi mwìsâtù ùdi mu muntu.

²³³ Mpindyewu, nganjì kwangata kaacintu kakesè kàndì muzòle kaaba aka aka. Netwènze... Mvw'a kwikalaku nànscha ne mboodi, bwà ngaamònà mwà kutàmba kunumvwijací menemene. Netwangate mbàlandà ayi kàdi kuyìzola, kuyeela ànu mu mulongo wa cijengu, anyì mùshindù ewu, anyì ewu nùnku's. Mpindyewu netwàngatè... Ngeela meeji ne, mùshindù ewu pàmwäpa ngùdì mufwànyìne kwikala mutàmbe bwîmpè, netwàngatè ne kwenza mbàlandà ayi.

²³⁴ Mpindyewu, muntu ncinyì? Yéyè ùdi kampànda pàsàtù; mubidi, musùùkà, ne nyumà. Mbanganyì bàdì bamanyè nànscha? Tàngilààyi dissemena dyà Nzambì. Mwoyi wèndè ncinyì? Nudi bavùlùke mukenji wànyì wà ne: *Nzambi Wakasungula Mwoyi wà Muntu bu Kàleyì Kèndè anyì?* Dyabùlù ngwâkasungula mutù

wèndè bu kàleyì kèndè kàà bukòntonyi; nwamònù's, yéyè ùdi ùmufikisha ku dimòna maalu, ùtàngidila mu mésù èndè amu. Kàdi mu cyôcì aci... munda mwà mwoyi wèndè Nzambì ùdi ùmufikisha ku diitabuuja bintu bidiye kàyì mwà kumònà to. Kî mmwômò anyì? Nwamònù's, Nzambì ùdi pa mwoyi wèndè, mu mwoyi wà muntu ke mùdì Nkwasa wa butùmbi wa Nzambì. Nwacyümvù anyì? Muntu! Nzambì mmwènze mwoyi wà muntu Nkwasa Wendè wa butùmbi.

²³⁵ Mpindyewu, tàngilààyi. Citùpà cyà kumpàlà cyà muntu ncinyì? Citùpà cyà kumpàlà cyà muntu m'mubidi. Citùpà cìdì cìlondà m'musùukà wèndè, cìdì ngiikàdilù wa nyumà wendè udi umufikisha ku diikala cidìye aci. Yéyè ùdi úseemena mpindyewu. Mpindyewu, citùpà ciisátù cyà muntu n'nyumà wendè, ne nyumà wendè awu ùdi munkàcìnkàcì wa mwoyi wèndè, ne munkàcìnkàcì wa mwoyi ke mùdì Nzambì ùlwa kushikika Nkwasa wa butùmbi.

²³⁶ Nudi bavùluke ne, àbìdì àdi pansi aa, bi—bibèjibeji bìvwa bifila mu Chicago kukaadi bidimu bitwè ku bìnaayi, pàvwa mwena kwitabuuja wa kale awu... mwena bupidyà wa kale's we, mwikale ne ciibidilu cyà kwamba ne Nzambì wàkenza cilema ku Solomo pààkambà Ye ne: "Anu mùdì muntu wela meeji mu mwoyi wèndè amu." Yéyè ne: "Kakwéna byeledi byà meeji mu mwoyi byà kwelelaku meeji to. Mmunyi mùdiyekù mufwànyine kwela meeji ne mwoyi wèndè? S'bikèngela bwà... S'uvwa ùswa kwamba mutù wèndè."

²³⁷ Bu ne Nzambì ùvwa ne meeji à kwamba mutù wèndè, nùnku's mMwambe ne: "mutù wèndè."

²³⁸ Bu Môsà, kàdi bu ne Môsà... bu ne Nzambì mmwâmbe ne: "Môsà, umusha bisàbaatà byèbè, wêwè's udi mu buloba bwà Cijila"; yéyè ne: "Èè, bwà cinyì nciyikù mwà kuumusha ànu cifulu cyànyì, s'bidi ànu byà mwomùmwè"? Yéyè mmwambe ne: "bìsàbaatà." Yéyè kàvwa mwambe ne: "cifulu" to, ùvwa mwambe ne: "bìsàbaatà."

²³⁹ Nènku pààkambaYe ne: "Nyingalalaayi, nubatiijiibwè mu Dînà dyà Yesù Kilistò," Kàvwa ùswa kwamba ne "Taatu, Mwânà, ne Nyumà Mwîmpè to". Ùvwa ùswa kwamba ànu menemene cyàkambaYe aci.

²⁴⁰ PààkambaYe ne: "Udi ne cyà kulediibwa cyàkàbìdì," Yéyè kààkamba ne: "Bìvwa mwà kwikala bîmpè bu wêwè mwà kwikala nànku to."

²⁴¹ Yéyè ne: "Bimanyinu ebi nebifilè aba bàdì bìitabuuja," Yéyè kààkambakù ne: "Pàmuăpa nebìlkalè mwà kufila to."

²⁴² Yéyè ùdi wàmба cìdìYe muswè kwamba! Ne Yéyè ùdi Nzambì ne Kéna mwà kuCyàluja to. Yéyè mmumanye cìdì cipwàngànè ki bwà cinyi Ùdi ùCyènza mùshindù awu, nènku s'ki mùshindù ùdiYe—ùdiYe muswè bwà Cyôcì kwikala awu. Nènku bikèngela ùkafike ku Cyôcì aci. Ki n'Yéyè upweka ku lungènyì lwèbè to,

bikèngela wêwè ùkafike ku Mmwènenu Wendè. Ki dishììlangana ndyôdì adi.

²⁴³ Mpindyewu, mpindyewu, mu ndongolwelu wa mubidi ewu, musùùkà . . . Mpindyewu, nwénù bangate mwâku ewu *musùùkà* ne bawùkenkête, newùnwâmbilè mu—mu nkòngamyákù wa Bible anyì wa Webster, yônsò wa ku yôyì ne, cidi “ngiikàdilù wa nyumà.”

²⁴⁴ Mpindyewu, muntu nyéyè ewu, mutùtù twamba, John Doe nyéyè ewu. Èyo, John Doe. Kàdi Sam Doe nyéyè ewu. Èyo. Mpindyewu, John Doe mmuntu, mubidi, mwanààbù ne Sam Doe. Mpindyewu, John nnyumà, musùùkà, mubidi; ne Sam Doe ùdi pèndè cintu cimwècimwè aci (mubidi, musùùkà, nyumà) mùdìye pèndè amu, mubidi, musùùkà, nyumà. Mpindyewu, muntu *ewu* mmubì, wa lwonji, wibila, wìba, ushima, wènda masandi, cintu cibi kanà cyônsò cidiye mwà kwenza aci; kàdi *ewu* muntu yéyè mmûle tèntè ne dinanga, ditalala, disànkà. Bùbìdì bwàbò bàdi ne musùùkà, mubidi, ne nyumà. Èè, dishììlangana dìdi penyì? Muntu *ewu* ùdi mwà kwalukila cyànyimà kwamba ne: “Ndi mvùluka maman wanyì, Ndi mvùluka bintu bitùdì benzè patùcivwà bânà bàà nsongààlùme apu”; bwônsò bàbìdì bàdi mwà kucyènza. Bùbìdì bwàbò bàdi ne nyumà, bùbìdì bwàbò bàdi ne misùùkà, bùbìdì bwàbò bàdi ne mubidi.

²⁴⁵ Kàdi ngiikadilu wa nyumà wa muntu *ewu's* mmubì, ngiikadilu wa nyumà wa *ewu* muntu's mmwîmpè. Nwamònou anyì? Pa nànku ngiikadilu wa nyumà ki musùùkà wà muntu. Nwamònou anyì? Pa nànku, mpindyewu, Nzambì ùdi ûteeta kubwela mu cinyì? Nyumà ne mwoyi wà muntu. Mwaba wùdì nyumà ùsanganyiibwa mu mwoyi.

²⁴⁶ Nudi bamanyè's, ne maalu à mamanya mmambè (bu mûmvwà nciyi mujikijekù aci to), ne muntu kàvwa mufwànyine kwela meeji ne mwoyi wèndè to. Nènku maalu à mamanya ăbangì kujandula ne kùdi kaacibambalu kakesè mu mwoyi wà muntu (kî mmu mwoyi wà nyama to, kàdi mu mwoyi wà muntu), kamwena nànsha kabùlù kàà mashi to, anyì cintu nànsha címwè. Bôbò kwamba ne: “Cidi ne cyà kwikalà mwaba ùdi musùùkà usòmbela's, anyì nyumà.” Bâlekèlaayi ànu—bâlekèlaayi ànu cyanàànà, bôbò nebàngatè bintu byàbò byà bukùtakane abi ne nebàjaadikè Nzambi. Ncyà bushùwà. Nzambì ùtu ànu ûfikisha bukùtakane ku diMufidila bujaadiki.

²⁴⁷ Mpindyewu, ki cyôcì aci, cyena-bwalu cinène mu cibèjibeji. Mwânà wa bakàjì mukesè wa Mwanèètù Boze kwambaye ne: “Mwanèètù Branham, udi mumanye cyûvwà wamba ditùkù adi aci anyì?” Yéyè ne: “Tàngila, tanggala, maalu à mamanya àkaadi mamane kujandula.”

²⁴⁸ Mêmè ne: “Èè, Nzambì àbèneshiibwè! Ndi muswè kupeta aci, mwanèètù wa bakàjì, ndi muswè—ndi muswè kupeta aci.”

²⁴⁹ Musùùkà wa muntu ke ngiikàdìlù wa nyumà, ne nyumà mmusòmbè mu mwoyi wà muntu.

²⁵⁰ Mpindyewu, mpindyewu, mbàalandà yà pambèlu ncinyì? Aci's mmubidi. Nwamònù anyì? Ki cintu cyà kumpàlà kûdì ufika, mmubidi. Bikèngela bwà wêwè kwôsha aci dyàmbedi. Udi ne cyà, kutàmba mubidi awu. "Ncyêna—ncyêna mudyumvwe bu udi mwà kujuuuka kuya mu èkèleeyiyà to, njila yìdi ne busenù bwà dikèma. Ndi—ndi... Kùdi luuya lukolè be. Kaa, disangisha dyà leelù, ncyêna mumanyè to." Ki mubidi ngwôwò awu. Èyo. Mpindyewu, bikèngela wôshè ne ùtämbe cyôcì aci, bikèngela bwà Nzambì àcitàmbè.

²⁵¹ Musangu wàlondà wàlwà Ye, bikèngela Àbwelè mu musùùkà, ki ngiikàdilù nyêyè awu. "Kaa, ba-Jones nebâmbè cinyì bwànyì mêmè's? Kaa, ekèlekèle! Nudi bamanyè's, èkèleeyiyà wanyì neàngeele pambèlu mêmè—mêmè mwà kwenza cintu cyà mùshindù awu. Nwamònù anyì?" Kàdi bikèngela ùpite aci.

²⁵² Nènku paùdì upìta aci, dîbà adi Yéyè ùdi ubwela mu mwoyi ne mwômò amu ki mùdìYe ùshikama mu nkwaswa wa butumbi. Ki Nyumà Mwîmpè awu munda mwèbè's. Yesù wàkamba ne: "Mbipicìlbwe ne bàkuswìke dibwe dyà mpelu mu nshingù ne bakwinyìje mu kandondo-nkidi kàà mbû, pamutù pàà kulendwisha mene umwe wa ku bakesè bàdì baNgítàbùuje aba." Kanùbenzèdi bibi to; ànu mene kubàlèndwisha, ànu kubàbìndulula pa cintu kampànda nàka. S'bivwa kwikala bitàmbe bwîmpè bwà wêwè kwikala mufwile mu mâyì, anyì kùyìku nànsha muledìlbwe pa buloba to, pamutù pàà kutwàla cilèndwishi kùdì umwe. Ki cívwàYe muswè kwamba anyì? Ùdiku mwà kushima anyì? Bâpostòlò mbààkacyàmbà anyì? To, to. Yesù ngwàkaCyàmbà! Yesù wàkamba ne: "Wêwè ànu mulèndwishe umwe wa kùdìbo, bakesè bàdì baNgítàbùuje aba."

"Bimanyinu ebi nebìfilè aba bàdì biìtabuuja!"

²⁵³ Muntu kampànda munène, wa katankù wàmба ne: "Kaa, mêmè's ndi muMwitàbùuje! Àlèluuyàh!"

²⁵⁴ "Kacea ukààdikù mwakule mu myakulu, mwandamune myakulu, mwipate badémons, mumònè bikèènà-kumònà, ne bikwàbò, bu mwàkalayàYe anyì?"

"To, ditùkù àdi's dìkaadi dipìte." Yéyè kî mmwena kwitabuuja to, mmwena kwitabuuja wa budìngibudìngì.

²⁵⁵ Yesù wàkamba, mêtì à ndekeelu àkambàYe ne: "Bimanyinu ebi nebìfilè bàdì biìtabuuja, pa buloba bujimà ne kùdì cifùkìlbwà cyônsò." Ncyà bushùwà. "Nebìfilè mwena kwitabuuja too ne pâNgààlukilà." Awu m'Mêtì à ndekeelu àkambàYe. Mbanganyì bàdì bamanyè aci? Bible, Maako 16.

Mpindyewu, nwamònù's, yéyè mmwena kwitabuuja wa budìngibudìngì.

²⁵⁶ Kàdi paùdì usangana mwena kwitabuuja udi witabuuja cyà bushùwà, ne bimanyinu biikale bilonda, ne umònà didìpwekesha dyà nsòmbelu wendè, kî mmutentudyanganyi, mumanyè bîmpè ne mmwena Kilistò, mulelèlè, muntu mushuwashùwàlè, shàala wêwè ànu kacya wâpùwa. Cintu cìdì cikèngela bwà wêwè kwenza, nkudisanga nendè buludi, kukutula lwendo, bwalu udi munkaci mwà kwenda ubanda ne cibeeba cyà Mfùmù.

²⁵⁷ Mpindyewu, cìdì cyènzekà ncinyì? Tàngilààyi eci. Mbàlandà yà pambèlu: cìvwa ncikondo cyà Luther, patùdì tubanga mu Mubidi wà Èkèleезiyà wa bàà Bisàmbà byà bendè.

²⁵⁸ Nwavìlukaayi ne, bàvwa mbeena Yudà too ne bu ku cikondo cyà—cyà cidimu 606 paanyimà pàà lufù lwà Yesù pààkafikaci mu Twatìlà, pàmwè ne bwônsò's bàvwa bakudimune mucimà bàà beena Yudà. Kàdi paanyimà pàà beena Yudà, mbikuupuke mwab'ewu mu beena Yudà ne bàà Bisàmbà byà bendè bwônsò (kàdi beena Yudà batàmbe kupita bûngì). Kàdi pàdìbi bìkafika mu cikondo cyà bàà Bisàmbà byà bendè cyà bushùwà, kulwilabì elu luseke, nwamònou's, Martin Luther, John Wesley, ne bakwàbò. Nwamònou anyì?

²⁵⁹ Mpindyewu, tàngilààyi bìsàtù byà ndekeelu ebi paanyimà pàà Cikondo cyà Mìdimà, kufika ku Cikondo cyà Pankaci ne kuya kwà nàka. Pàdì bwalu abu bùlwa, tàngilààyi mbàlandà yà pambèlu eyi. Nwamònou's: mubidi, musùùkà, nyumà. Nwamònou anyì? Mbàlandà yà pambèlu ayi, mubidi. Mwaba wa cijila: Ba-Nazaréens, ba-Pélérins de la Sainteté, ba-Méthodistes Badishikàmine. Nwamònou anyì? Ne pashiìshe Mwaba mutàmbe cijila: kwalukila mu beena Mpenta, mwàkabangaye ku cibangidilu amu, nwamònou's, kwalukila ku cibangidilu.

²⁶⁰ Mpindyewu, panwìkala nucìzola, ndi muswè kuleeja tùmwè tuntu. Mpindyewu, kùdi biibi bìtaanu bìdì bìbwëja mu mubidi, bìdì bìkontonona mubidi. Nudi bamanyè aci. Kabyènamu anyì? Ki byumvwilu bìtaanu mbyôbì abi. Mbyumvwilu bûngì kaayi bìdì bìkontonona mubidi ewu? Bitaanu: lumònò, lulabulu, lulengu, lununku, luumvu. Ncyà bushùwà anyì? Ki mubidi ngwôwò awu, mbàlandà yà pambèlu, ki bintu byûdì kùyikù mwà kutèèkela mwoyi to bwalu mbyà musunya.

²⁶¹ Mbàlandà yà munda dìbà adi, tudi ne mbàlandà yà munda, yìdi ncyoshelu cìdì cìlondà. Ne cyoshelu cìdì cìlondà cìdì cibwelà, ne cìdì cibwela ne—ne kondo kàà mwoyi, bifwànyikijilu, bivùlukilu, majinga, ne meeji à dinanga. Ki byumvwilu bìtaanu bìdì bìkontonona mbàlandà yà munda. Ki musùùkà ngwôwò awu. Byumvwilu byà meeji à dinanga, ki musùùkà, dinanga, ne bikwàbò. Nènku pashiìshe cìdì cìlondà mu cipiminu eci emu, mùvwa kàbìdì mwà kwikala bivùlukilu, ne kondo kàà mwoyi, ne luse, ne bikwàbò, ne—ne—ne didifwànyikijila. Udi usòmbela pansi udifwànyikijila bintu kampànda, cyûdì wenza ncinyì?

Kwéna ucyènza mu mubidi wèbè to, byumvwilu byèbè kabyèna bìdifwànyikijila to. Mbàlandà wa munda mwèbè amu awu.

²⁶² Ùdi ne biibi bìsàtù. Citùdì twenza ncinyì? Tudi tukosoloka mpindyewu, kaCinùpiciku to. Ufumina mu mubidi, byumvwilu bitaanu; ku cìdì cilonda aci, musùùkà, mbàlandà yà munda; kàdi mpindyewu udi ubwela mu mwoyi. Nwamònou anyì?

²⁶³ Mpindyewu, ki mwaba wunùdì nwénù ba-Pèlerins de la Sainteté ne ba-Méthodistes bashààdile pa cyoshelu aci *kuntwaku*. Wamònou's, nwénù nudi mu mbàlandà ayi. Nwénù ba-Luthériens ne bakwàbò bààlùkile mu mubidi, bààlùkile kwàka ne byumvwilu bitaanu, cìdì dìsù mwà kumònà ne kuumvwa aci. Nwamònou anyì?

²⁶⁴ Ki Pèlerin de la Sainteté ulwàlwa ewu mwine uvwa ànu mene Méthodiste Mudìshikàmìnne awu, ulwa ku mbàlandà yìdì yìlonda ne witabuuya cijila, bwalu cìvwa cibììkidiibwa ne mmwaba wà cijila ùvvà mulambu ùtèèkiibwa.

²⁶⁵ Kàdi musangu ùmwè ku cidimu ke ùvvà mwakwidì munène ubwela mu Mwaba mutàmbe cijila ùvvà mukàngiibwe. Kùvwa cikondo cyà ba-Luthériens; pashììshe cikondo cyà ba-Méthodistes; pashììshe cikondo *eci*, makénkè à Èkèleeziya ènda àlwa, àvvà mafwànangane ne ndongolwèlù wà muntu.

²⁶⁶ Dibà adi mmunyì—mmunyì mutùdì tubwela mu cyôcì *eci*? Mpindyewu, vùlukààyi ne, kùvwa cibwikilu, cibwikilu kampànda cìdì cilembèlèle pankaci pàà mwaba wà cijila ne Mutàmbe cijila. Mu Mwaba mutàmbe cijila ki mùdì Kilistò ùlwa bwà kusòmба pa nkwasà wa butùmbi wa mwoyi wèbè, Kilistò ùsòmба pa nkwasà wa butùmbi. Ùdi ùpicila ku dibingishiibwa (Ncyà bushùwà anyì?); dijidiibwa; “Ne pashììshe ku...” (mâyì àmwè...ku èkèleeziyà umwe...ku twitabààyi umwe...To!) “ku Nyumà umwe,” ànu kwôkò eku nkutùdì bwônsò babàtijìibwe mu Mubidi wùmwè wùdì Mubidi wà Kilistò. Ku cinyì? Nyumà Mwîmpè.

²⁶⁷ Nganyì udi ubwela? Méthodiste, Baptiste, Presbytérien, beena Mpenta, yônsò udi muswè awu. Cibwikilu aci, udi mumanyè cìdì ciine cibwikilu cìdì cibwikile mwoyi wèbè cìkupangisha bwà kuCimònà aci anyì? Udi mutèèleja anyì? Cibwikilu aci cìdì cibììkidiibwa ne “budìswile.” Udi mpindyewu upeta cimfwànyì aci anyì? Byumvwilu abi pambèlu *apu*, byumvwilu byà mubidi ne byumvwilu byà musùùkà, ne cibwikilu pankaci pàà cyôcì aci ne mwaba wa cijila, mwaba Mutàmbe cijila. Ne mùshindù wùmwèpelè wûdikù mwà kubwela mwômò amu ngwà kwikala ne budiswile! “Bwalu ewu yônsò...” Cinyì? Ewu yônsò udi ulabulangana ku cyanza anyì? Ewu yônsò udi mwinyijìibwe mu mâyì anyì? Ewu yônsò udi ukashààla wa mu èkèleeziyà anyì? Ewu yônsò udi ufila mukàndà wèndè anyì? Ewu yônsò udi wenza...? To! “Ewu yônsò wâswà kulwa dyàmwàmwà dyà cibwikilu awu.”

²⁶⁸ Kilistò alwe ku byumvwilu abi; àmbè ne “Èè, bìvwa bikèngela mêmè kuya. Ncyêna muswè kuya mu iferno to, ki cintu cîmwèpelè ncyôci aci. Nênkashààlè wa mu èkèleезiyà.” Èyo, wêwè Luthérien.

²⁶⁹ “Èè, nênkwambilè mudi bwalu, ndi ngiitabuua ne bìvwa bikèngela ngìikale ne nsòmbelu mushììlàngàne, ne mwànyì pàànyì mwônsò’s,” dijidiibwa ku cyoshelu. Èyo, wêwè Méthodiste.

²⁷⁰ Èyo, ne pashiishe ewu yônsò *wâswa* awu, àpitè cibwikilu cipanda aci. Kaa, butùmbi bwìkalè kùdì Nzambì! Ndi ku luseke lukwàbò. Àlèluuyàh kùdì Dînà Dyèndè! Kaa, ekèlekèle! Ewu yônsò udi muswè, mulekele àpaasule, rìdô yà diswa dyèndè yéyè mwine, nènku Nzambì àbwelè munda mwà mwoyi wèndè. Ki Kilistò udi pa nkwasá Wendè wa cilumbulwidi mu mwoyi wa muntu wàwa! Cidi ne cyà kwenzeka ncinyì?

²⁷¹ Wêwè udi wamba ne: “Bikèngela mêmè... Kaa, ndi—ndi mwà kwenza minèkù yà bundù, kabyèna bìmpììsha to.” Bwà cinyì? Kabèèna ne cintu nànsha cîmwè cìdìYe mwà kupììsha to. Muntu nànsha Umwe kénamù bwà—bwà kucyumusha to. Muntu nànsha Umwe kénamù bwà—bwà kukupììsha to. “Èè, nênkwambile’s,” mudi bakàji bàmba’s, “mêmè ndi mwà kwikalà ne nsuki mîpi, ncyêna nguumvwa dipììlà to.” Kabyèna bikèmesha to! Nwamònou anyi? “Kaa, ndi mwà kuvwàla tuntu twîpì... Ndi mwà kwenza *cikampànda*. Ndi...” Bantu abu kwambabò ne: “Kabyèna bintàcisha bwà kunwà bifwankà to, ne kabyèna bintàcisha bwà kunaya ndambù—ndambù wa twarta ne kunaya mibèlè to,” ne cyônsò cyènzenzàbo aci’s. “Kabyèna bintàcisha to.” Kàdi pààbò biikala ànu beena èkèleезiyà, nwamònou’s: “Kabyèna bintàcishaku bwà kwenza *cikampànda* eci to.” Bwà cinyi? Bwà cinyi? Kakwèna cintu nànsha cîmwè mwaba awu bwà kukupììsha to.

²⁷² Kàdi pàdi Kilistò ubwelamù, udi mufûke cyoshelu mu mwoyi wèbè ne mpèkaatù yèbè mmyumùshììbwe ku ditùkù ne ku ditùkù. Pôlò Munsantu munène awu, wàkamba ne: “Ndi mfwa ku ditùkù ne ku ditùkù. Nànsha mêmè ne mwoyi, kàdi kí *mêmè* udi ne mwoyi to, Kilistò ngudi ne mwoyi munda mwànyì.” Ki cibwikilu cyà munda ncyôci aci. Kaa, mwanèètù wa balùme, mwanèètù wa bakàji!

²⁷³ Tùlwijakaja, ndi mumanyè... Kaa, to, ndi... Ncyêna ànu mwà kucikikija to, ndi mupicìshe dîbà. Tùmonèbi, nganjì ànu... To, mbîmpè ncicyénjì to. Nwamònou’s, ndi muswè kwangata bakùlù makumi àbidi ne bânaayi, ne ndi mumanyè ne ndi munùlamè bwônsò bwà didyà dyènù dyà mundaamuunya. Netwìkalè ànu... Tùmonèbi, ne... Mbanganyì bàdì bàmba ne twàngate bakùlù makumi àbidi ne bânaayi? Ànu... [Disangisha dìdi dyàamba ne: “Amen.”—Muf.] Èyo, katancì kakesè cyanàànà. Èyo, katancì kakesè cyanàànà. “Bakùlù makumi àbidi ne

bànaayi,” díbà adi, tòbångàtaayi ne lùkàsà lwônsò mpindyewu, “mu nyùngulukilu wa Nkwasa wa butùmbi amu, ne bàvwa makumi àbìdì ne . . . banyùngùlukile Nkwasa wa butùmbi.”

²⁷⁴ Mpindyewu nudi numònà cìdì . . . Nkwasa wa butùmbi udi penyì mpindyewu? Mu mwoyi. Mu mwoyi wa nganyì? Wà bidimba byà Bikondo Mwandamutekète byà Èkèleeziyà, Kilistò! “Dìdìngebi wàkule dìyì dibì bwà cyenzedi cyàbò, s’udi mupììshiìbwé’s,” neùkadìlumbùlwile mu Ditùkù dyà Cilumbulwidi. Nènku nganyì wâlumbulwisha buloba? Bansantu ki bààlumbulwishà buloba.

²⁷⁵ Nganyì wâkamònà Danyèlè ùlwa ne binunu makumi kuvudija ku binunu dikumi awu? Bansantu. Mikàndà yákabuuludiibwa, yà bangènzàmpèkààtù. Mukàndà mukwàbò wàkabuuludiibwa, ùvwa m’Mukàndà wa Mwoyi, bwà virgo mukùtakàne awu. Kaa, ekèlekèle, bôbò kabèènakù mwà kumònà aci anyì? Èkèleeziyà mukùtakàne, aba bààkàpàtukà bwà kutwìlangana ne Mubàki abu, bààkalekela Maanyì àjika mu myèndù yàbò abu; kabààkabwela mu Eci to, kabààkalekela Kilistò ùkontonona bwà Wàmònà mwà kwenza bishimà ne kwakula mu myakulu ne kwenza maalu à kukema ne bikwàbò bwà kujaadika ne Yéyè ùvwa ne mwoyi mu Èkèleeziyà Wendè.

²⁷⁶ Ambaayi tÙng bu ne Yesù wàkalwa pa buloba ne kwamba ne “Ndi Yesù, Ndi Mwânà wa Nzambì,” kàyi mwenzeku cintu nànsha cìmwè to, Yéyè mmufwànyìne kwamba ànu ne “Ndi—ndi mbànda apa nkashààla mwena èkèleeziyà”? Aci ncifwaànyìne kwikala Mwânà wa Nzambì anyì?

²⁷⁷ Cyàkamba Ye ncinyì? “Mêmè ncìyì ngenza byenzedi byà Taatù Wanyì to, nànkú kanùNgiitàbùiji to.”

²⁷⁸ Kaa, ekèlekèle! Nudi numònà anyì? Nzambì ùdi ùDìmanyisha, Yéyè utu munange kuDìmanyisha. Yéyè ùdi Yehowàh. Ùtu muswè kuDìmanyisha. Kaa, ndi ne disànkà dyàbùngì bwà bwalu abu. Èyowà’s, mukalenge. MmuDìmanyishe kùndì, ndi mumanyè ne Yéyè mmunwenzela pèènù mwomùmwè. Bàmwè bàà kunùdì nwènù bansonga nnucifumina ku dikudimuna micìmà, kàdi kanwèna . . . kanwèna bafwànyìne kuMumanya mu bukolè ne bintu binène mùdì beena Kilistò bàà kale bamumanyè to, kàdi nudi nwenda ànu nukakùfika. Nudi nwenda nubànda ne cibeeba cyà Mfùmù. Kanwikadi . . . TÙngunukààyi ànu ne kutàngilaku ne nukolesha ne mwènù pèènù mwônsò. Nyeemààyi lubilu, nyeemààyi lubilu, nyeemààyi lubilu ne mwènù mwônsò. Kanwìmanyikù bwà kantu nànsha kàmwè to, tÙngunukààyi ànu ne kuya.

²⁷⁹ Byenzè bu mùvwa Mwanèètù wa bakàjì mukùlumpè mukwàtè ne byà luse ewu Snelling ne ciibidilu cyà kwamba ne:

Ndi nyeema lubilu, nyeema lubilu, nyeema
lubilu, ngäfùmu ànu kudisabuka;

Nyeema lubilu, nyeema lubilu, nyeema lubilu,
ngăfumu ànu ku disabuka;
Nyeema lubilu, nyeema lubilu, nyeema lubilu,
kùyìku mwà kutwà nyimà pansi to.

Musùükà mukulakaji mukwàtè ne byà luse, nyewù ùkaadi kwàka leelù ewu.

²⁸⁰ Èyo, mpindyewu, ne kùvwa—kùvwa nkwasà yà butùmbi ne yìdikù, yìdiku makumi àbìd... kùvwa nkwasà makumi àbìdì ne yìnaayi. Mpindyewu, mbûngì kaayi budiyi yenza, makumi àbìdì ne yìnaayi? Makumi àbìdì ne yìnaayi. Èyo:

...nkwasà makumi àbìdì ne yìnaayi: ne pa nkwasà ayi...pa nkwasà ayi ngâkamònà bakùlù makumi àbìdì ne bânaayi...(umwe pa nkwasà), bavwàlè bilùlù bitòòke; ne bâvwa ku mitù yàbò bàsé bifulu byà butùmbi byà ngôlò.

²⁸¹ Mpindyewu: “bakùlù makumi àbìdì ne bânaayi.” Ndi muswè bwà nùmonè ne bôbò kabàvwa Banjèlò to. Banjèlò kî mbatéediibwemu to, Baakampànda bàà mu Dyulu kabèéna ne cyà dyenza ne bifulu byà butùmbi ne nkwasà yà butùmbi to. Nwamònù’s, bôbò kabèéna baswikakaneku to, bôbò m’Banjelo, kacya kabàtukù bacimùne to. Bu nwêñù mwà kumònà pashìishe ndambù, misambu yìvwàbo bìmba ayi, ne bikwàbò, bìdi bijaadika ne kî mbôbò to. Nwamònù anyì? Bâvwa bìmba musambu wà bupikudi; pa nànku, Banjèlò kabèéna dijinga ne kupikudiibwa to. Nwamònù anyì? Eyo. Kàdi bâvwa bantu bapikula.

²⁸² Ncyêna...nwêñù, Ncyakupetaku dîbà dyà kubakula eci to. Kàdi nwêñù bâdi bâfunda abu, panwìkala baswè kumanya ne bâvwa mbantu bapikula, angàtaayi Maatààyì 19:28, èyo, 19:28, Maatààyì, Bwàkabuulwibwà 3:21, pashìishe nwàngatè yoyì ayi, Bwàkabuulwibwà 20:4, Bwàkabuulwibwà 2:10, Peetèlò wa Kumpàla 5:2 ne 4, Timòtè Mwibidì 4:8. Aci necinùmanyìshè ne mbapikùdiibwe. Ndi muswè kuya mu cyôcì aci mu dindà emu, nudi numònà’s. Nènku nudi bafwànyìne ànu kucìkenketa munda mwà mbingu cyanàànà, nudi numònà’s. Bôbò abu kabàvwa—bôbò kabàvwa Banjèlò to, kabàvwa Baakampànda bàà mu Dyulu to, bâvwa bantu bapikula. Nwamònù anyì? Nudi mwà kutàngila mizàbì yàbo, mûshindù ùvvàbo bavwàlè awu; nudi mwwà kutàngila kaaba kààbò, cìvwàbo naaci aci; nudi nutàngila misambu, cìvwàbo bimba aci; ne kumanya ne kabàvwa Banjèlò to. Hmm.

²⁸³ Ndi ngumvwa bibì bwà kufika ku cyôcì eci, kàdi tûbalààyikù mukwàbò Mufundu. Nudi baswè anyì? Èyo. Twàlukilàayi ku Danyèlè 7, katanci kakesè cyanàànà, paanyimà apa, mu Danyèlè 7, ne tûbalààyì ànu Mufundu kaaba aka. Ndi muswè...nànku eci necinwambùlwishè bikolè mu citùpà cyà diyiisha cidi dishààle bwà mu dindà emu. Ndi mutwìshiibwe ne necì—necinùfikishe

ku didyumvwa bìmpè menemene paanyimà pàà nwénù babalè cyôcì eci ne bamònè eci, bamònè civwà Danyèlè, nshapità wa 7 wa Danyèlè, nènku tòbangilààyi mpindyewu ku...Danyèlè 7, twàngatààyi nshapi...wa 9 mvensà wa 9. Mpindyewu, teèlejààyi ne ntémà yônsò mpindyewu ku bintu ebi:

Nenku... *Ngâkatàngila* too ne *pààkateèkibwa nkwasaya butumbi, ne Mukulumpile matukù kusombaye, mwena bilàmbà bivwà bitòòke bu néjè, ne mwena nsuki yà ku mutù kwèndè yìvwa bu... myósà yà mûkòòkò mikezuke, ne nkwasaya wendè wa butumbi ùvwa bu kapyà kalakuka,* (Nudi numònà kàbidi, kwalukila ku kapyà kàà diikala dyà mâyi à matamba ditambe kutwila.) *ne nkàtà yèndè bu kapyà kàdi kwosha.*

Ne... Musìlù wà kapyà upatuka ne uya kumpàla kwèndè aku: binunu kuvudija ku binunu bivwa bimukwàcila mudimu, ne binunu makumi kuvudija ku binunu dikumi (Ki Bapikula bèènù bâlwalwà àbu's.) *kwimanabo kumpàla kwèndè:* ne cilumbulwidi kutwadija, ne mikàndà (mikàndà, ku bûngì) yâkabuuludiibwa.

²⁸⁴ Mpindyewu, mònàayi, dilumbulwisha edi dyàkabanga. Nwamònù anyì? Mpindyewu, tàngilààyi. Danyèlè, pààkamònàye nkwasaya yà butumbi ku cilumbulwidi, yìvwa munda mutupù, wàkamònà “nkwasaya yà butumbi yènda yàdijiibwa, yipweka yifùmina mu Dyulu, Mukulumpile cikondo upweka úfùmina mu Dyulu.” Kàdi pààkacimònà Yone, Nkwasa wa butumbi awu úkaavwa mumana kusòmbamu kùdì Yesù, ne nkwasaya yà butumbi bwà bayiidi ne bankambwà, bapikula, mimanè kukùmbana. Nwamònù anyì? Danyèlè wàkacimònà bidimu nkàmà yìtaanu kumpàla kwà cikondo cyà Kilistò. Ne pashiishe paanyimà pàà Kilistò, byènza bidimu binunu bibìdì ne nkàmà yìtaanu, ne Yone mwikàle ne mwoyi mu cikondo cìlwalwà, ne yéyè úkaavwa mumane kumònà byônsò ebi byènzekà. Pààbì, Danyèlè kààkacimònà to, (Nwamònù anyì?) yéyè wàkamònà ànu Mukulumpile cikondo ûlwa; wàkamònà ûlwa. Kàdi pààkamònà Yone, Nkwasa wa butumbi ùvwa musòmbamù, nwamònù's, nkwasaya yà butumbi yìvwa myadija kumpàla kwà Mukulumpile cikondo, ne Cilumbulwidi cyàkatwàdijà. Kàdi pààkamònà Yone, bakùlù kabàvvwa banji kwikalà basungùdiibwe mu cikondo cyà Yone to...anyì cikondo cyà Danyèlè, kàdi bôbò bâkaavwa bamanà kupikula ku cikondo cyà nshiikkidilu...?...Kaa ekèlekèle! Kaa, aci kacyèna... Yéyè kí mmulenga wa dikèma anyì?

²⁸⁵ Pa nànkú, Danyèlè 7, yéyè... cyàkenzà Danyèlè ncinyì? Yéyè wàkadyànjila kumònà Cilumbulwidi, kumònà nkwasaya yà butumbi ayi yìvwa munda mutupù. Nwamònù's, yìvwa ne cyà kwikalà munda mutupù. Ànu mùvwà Yone mu cikondo cyèndè,

paanyimà pàà Èkèleeziyà mwambwìbwe, yìvwa basòmbèlamu kùdì bakùlù bapikula. Hmm.

²⁸⁶ *Mukùlù mbwena kwamba cinyi?* Nwénù bangàte mwâkù *mukùlù*, mêmè kupetaku bu...muumvwija wónsò àdì mafunda aa, ndi ànu mpweka ne kwinshi. *Mukùlù mbwena kwamba ne “mfùmù wa cimenga” anyì “mfùmù wa cisàmbà.”* *Mukùlù*, “mfùmù wa cintu kampànda.” Byenze bu ne ndi—ndi mufwànyine kwikalà...Mwanèètù Neville mpindyewu mene mmukùlù mutùmina èkèleeziyà ewu. Yéyè ùdi cinyi? Yéyè ùdi mfùmù wa mubidi wà pa kaaba ewu. Nwamònù anyì? Ne mulombodi wa cimenga ùvwa mwà kwikalà mukùlù wa cimenga eci; nwamònù's, mukùlù wa bimenga. Nudi bavùlùke mu bikondo byà Bible, bakùlù bàà cimenga aci anyì? *Mukùlù mbwena kwamba ne “mfùmù wa cimenga” anyì “mfùmù wa cisàmbà.”*

²⁸⁷ Mpindyewu, bàvwa bûngì kaayì? Makùmi àbìdì ne bànaayi, bakùlù makùmi àbìdì ne bànaayi. Ncyà bushùwà anyì? Mpindyewu...Kaa, ekèlekèle! Ùvwa nganyì? Bàpostòlò dikumi ne bàbìdì ne bisàmbà dikumi ne bibìdì byà Izalèèlè, bankambwa dikumi ne bàbìdì abu. Kùdì...Mpindyewu, netùtùngunukè naaci buludì too ne patwàbwelà mu màleesònà makwàbò awu, ne kujaadika ciine aci ne ncyà bushùwà, pa nànku nwénù, ndi ne disankà bwà munùdì nucìifunda mpindyewu. Nwamònù anyì? Bankambwà dikumi ne bàbìdì ne bisàmbà dikumi ne bibìdì byà Izalèèlè abi! Mpindyewu, tàngilààyi. Yesù ngwâkamba aci...

²⁸⁸ Peetèlò wàkakonka dîngà ditìkù, kwamba ne: “Netùpetè cinyi? Tudi bashiye taatù, maamù, bayeetù, mukàjèètù, bânà, ne bikwàbò byônsò, tudi balekele bintu byônsò.” Peetèlò kwambaye ne: “Tudi bashiye bakàjì bëètù, tudi bashiye bânà bëètù balela, tudi bashiye taatù wetu ne maamù, yëtù nzùbu ne malaba, bwàku Kulonda.”

²⁸⁹ Yéyè ne: “Bulelèlè, bulelèlè Ndi nnwàmbila ne, nwénù nenùsòmbe pa nkwasà yà butùmbi dikumi ne yìbìdì nulumbulwisha bisàmbà dikumi ne bibìdì.” Ki bwalu mbwôbù abu's, ki bapikula mbôbò abu, bakùlù bapikula abu.

²⁹⁰ Tàngilààyi—tàngilààyi Davìdì wàkaleeja cimfwànyì cyà Kilistò. Nwamònù anyì? Pàvvà Davìdì ne cyà kukòòkesha, cintu cyà kumpàla, ùvwa ne cikondo cyà cibì kumpàla kwà kubwelayè mu bukòòkeshi. Nànsha nànku ùvwa ne dilaabiibwa pambidi pèndè, èyowà's, dilaabiibwa adi divwa pambidi pèndè. Ki bantu bàabungi kwelabo meeji ne “Yéyè ùvwa ànu muntu mupidyè diitabuuja ndambù, muntu mukesè uvwa mushììlàngànè, ûteeta kusùnsula cintu kampànda.” Kàdi kùdi bàmwè bantu bàvvwa bamanyè ne yéyè nguvwa ushààla mfùmù, bààkashààla ànu nendè. Mwanèètù, ndi muswè kwamba ne kwêna mufwànyine kubuumusha kùdiye to, pàvvàbo bënda baya apu.

²⁹¹ Dîngà ditùkù kwimanayè pa mukùnà apu, kupwekeshaye mésù pansi ne kumònaye cimenga cyèndè cikesè, cinanga aci cijingila kùdì mwena lukuna. Ki kwimanaye mwaba awu ne kuvùlukayè pàcivwaye mwânà mutekète, ùvwa ne ciibidilu cyà kuya kuntwaku ne mìkòòkò ne kunwa mâyì awu, avwa mmâyì à cyà bushùwà. (Twákùlù pa bwalu abu mwab'ewu kî nkwanji kwenza ntàntà to, *Mâyì a Mwoyi*.) Nènku's ki yêyè awu: “Anji elààyibi meeji, ngàànwatu mâyì à kuntwaku aku's.”

²⁹² Ne dijinga dyèndè dyà ditàmbe bukesè dìvwa ndiyì dituma kùdì muntu kàna yônsò uvwaye nendè awu. Mwanèètù, bàbidi bàà ku bantu abu kupyabo myele yà mvitè ne kulwanganabo mu ntàntà wa kilômèètà makumi àbìdì ne yinaayi yà beena Peleshèète, bàsùnsulangana naabo ku dyàbalùmè ne ku dyàbakajì, bwà kumupetela mâyì à kunwà ku ciinà aci. Bàvwa bamanyè ne ùvwa ne cyà kukòòkesha. Èyowà's, mukalenge. Musangu kampànda, umwe wabò, bwà kumusùngila, kutupika kubwela mu ciina ne kushebeya nyama wa ntambwe, ne byanza byètù ebi. Bàvwa balwanganyi bàà mvitè. Nènku pàà—pààkabwelàye mu bukalenge, nudi bamanyè cyàkenzàye anyì? Yéyè wàkenza muntu ne muntu wa kùdìbo mukòòkeshi pa cimenga kampànda.

²⁹³ Nudi numòna Kilistò mwaba awu anyì? “Ewu udi ucìmuna neàkòòkeshè cimenga.” Bacìmunyi's! Leelù ewu patùdì tumòna ne Yéyè ùdi ùbwela mu bukòòkeshi, Kilistò neàkòòkeshè pa buloba ebu. Allemagne, ne États-Unis, ne bwônsò bâdi ne cyà kukùluka, ditùnga ne ditùnga dyônsò dìdi ne cyà kukùluka. Makalenge à pa buloba ebu mmalwè makalenge à Nzambi wetù ne à Kilistò Wendè, ne Yéyè neàkòòkeshè ne neàbàkòòkesha. Ncyà bushùwà.

²⁹⁴ Tudi bamanye ne Yéyè neàkòòkeshè, pa nànku dijinga Dyèndè dyà ditàmbe bukesè adi ndiyì ditùtùmina! “Yéyè muswè bwà mêmè mMuleje mpàla mu kaaTombokutou kakesè menemene mùvvwàku kamùyì nànscha meeyà makumi ataanu to, mwaba wùdì kawùyì cintu, anyì mu musùmbà wa bantu bapèlè,” ki dijinga ndyôdì adi. Amen!

²⁹⁵ “Kabyèna bìkèngela bwà wêwè kupeta àbûngì menemene to, kabyèna bìkèngela bwà wêwè kwenza *cikampànda* to, mmayisheku ànu cyanàànà ne Yéyè mmuswè kuya.” Amen. Kwàjikì.

²⁹⁶ “Yéyè muswè bwà mêmè kwenza maalu mashììlàngàne, kwenza maalu mùshindù mushììlàngàne,” bu mudi bânà bëètù bàà bakajì aba ne bikwàbò, “piikalaYe muswè bwà mêmè kwenza cintu kampànda, Nzambi àbèneshiibwè, ndyésè bwànyì mêmè bwà kucyènza.” Ki bwalu mbwôbù abu's! Tudi bamanyè ne Yéyè ùlwalwa mu bukolè, nànscha bàà pa buloba bàmبا cinyì. “Byôbì bìkèngela bwà mêmè kutèèka ku luseke bujitu bwônsò ne mpèkaatù yìdi yìnìngila bipeepèlè nùnku, ndekèlèku nyeemèku

ne lutùùlù lubilu lùdì lutèèka kumpàlà kwànyì alu. Enzaku bwà ntapè dísù kùdì Mubangi ne Mujikiji wa Diitabuuja dyètù, Yesù Kilistò.” Ulwàlwa mu bukolè awu’s!

²⁹⁷ “Bakùlù” abu’s, bakùlù makùmi àbìdì ne bânaayi abu. Èyo. Dikùmi ne bâbìdì . . . Mu Bwàkabuulwibwà amu, mmutùdì tusangana eci. Mu Mukàndà wa Bwàkabuulwibwà, nshapìtà wa 21, tudi tusangana ne cimenga cyà Yelusàlèmà cìvwa ne bishimikidi dikùmi ne bìbìdì. Ncyà bushùwà anyi? Ne yéyè ùvvwa ne biibi dikumi ne bìbìdì, bìvwa bisàtu ku luseke ne ku luseke Iwônsò, bisatu kuvudija ku yinaayi’s ndikumi ne bìbìdì. Ànu menemene mùshindù ùvvwa tabernacle musòmbe mu cipèèla, bwalu Yone wàkamba ànu menemene ne wàkamònà cintu ànu cimwècimwè cyàkamònà Môsà pàvwàye kuntu kwàka aci, cintu cimwècimwè cyàkamònà Pôlò aci.

²⁹⁸ Nènku mpindyewu tudi tumònà ne bishimikidi dikumi ne bìbìdì abi bìvwa ménà à bâpostòlò. Ne biibi dikùmi ne bìbìdì abi bìvwa ne dînà dyà cisàmbà cyônsò ku ciibi aci. Mùshindù mwinè wutùdì tutàngila cyôci aci ne tumònà bakùlù dikùmi ne bâbìdì abu, bisàmbà dikùmi ne bìbìdì abi, bâpostòlò dikumi ne bâbìdì, bishimikidi dikumi ne bìbìdì, biibi dikumi ne bìbìdì! Kaa, ekèlekèle! Angataayi nomba yà Nzambì nènku kanwakucipangila mwaba nànsha ûmwè to, nebikumbanagane ànu mu byôbì myaba yônsò ku musangu ne ku musangu.

²⁹⁹ Ki bwà cinyì, nudi numònà’s, tudi ne matùkù àssambòmbò mwàkakwàtà bâà pa buloba mudimu aa, ne tukààdi baseemène pabwípi menemene ne ditùkù dyà mwandamutekète edi mpindyewu. Bidimu binunu bìbìdì byà kumpàla, Nzambì wàkabùtula mâyì . . . bâà pa buloba ne mâyì. Bidimu binunu bìbìdì biibidì, Kilistò kulwa Yé. Eci’s ncidimu cyà 1961, ànu ku ciibi aku mene, ànu katancì kakesè cyanàànà. Kàdi tàngilààyì, Yesù wàkamba ne: “Mpindyewu, kacyàkuya ne ku ndekeelu kwà njila yônsò to,” Yéyè ne: “bwalu nebikèngelè bwà ngìipidijè mudimu. Mémè nciyi mwenzè nàñku to, bômbè bwà mushindà nebùbutulè mubidi wônsò. Uh-huh. Bwà bwalu bwà Basungula, nêngìipidijè mudimu mu bwakàne. Kuwùkosa, citùpà cyà dîbà.” Nwamònù’s, pashiishe ke Bukalenge bwà bidimu cinunu, Ditùkù dinène adi.

³⁰⁰ Pàdì Èkèleeyìyà mukwàte mudimu bwà kulwangana ne mpèkaatù munda mwà bidimu binunu bìsambòmbò apu, ne cinunu cyà mwandamutekète’s m’Bukalenge bwà bidimu cinunu. Bu mwàkenzà Nzambì bidimu binunu bìsambòmbò bwà kwibaka buloba, ne cinunu cyà mwandamutekète Wàkiikisha ku midimu Yèndè yônsò. Nènku Èkèleeyìyà ùdi ùkwata mudimu ulwishangana ne mpèkaatù mu bidimu binunu bisambòmbò, kàdi cinunu cyà mwandamutekète Èkèleeyìyà ùdi wìkisha.

³⁰¹ Mizàbì mitòòke yìvvà pa bakùlù ki bwakànè bwà Bansantu. *Butòòke* mbwena kwamba ne “bwakàne.” Nènku bwalu

bàvwa *bavwàdika mìzàbì* bìvwa bileeja ne bàvwa “mbaakwidi ne balumbulwishi,” bavwàle mìzàbì mitòòke, bansaserdìsè, balumbulwishi, baprófetà, ne bikwàbò; nwamònù’s, ki cìvwàbo aci. Bàvwa bavwàdika mìzàbì mitòòke, bakùlù makùmi àbìdì ne bànaayi. Nekwikalè bakùlù makùmi àbìdì ne bànaayi. Nekwikalè dikùmi ne bàbìdì bàà kùdìbo bwà bisàmbà dikùmi ne bibìdì byà Izàlèèlà; bàpostòlò dikùmi ne bàbìdì bwà Èkèleeyìyà.

³⁰² Nènku mbasòmbe mu bulà bwà Mfùmù munène. Nwavùlukaayi ne, mbasòmbèlè pambèlu apu, *bôbò* abu’s. Nènku ki Mukàjì-musela *ewu* ne Kilistò basòmbe pa Nkwasa Wendè wa butùmbi, ne Mukàjèndè musòmbe ku luseke Lwèndè, Èkèleeyìyà. Bakùlù makùmi àbìdì ne bànaayi... Batungu binunu lukàmà ne makùmi ànaayi ne bànaayi bàà mu ntempèlù abu munkaci mwà kuMukwàcila mudimu. KùyaayeYi kwônsò, Mukaj’Èndè ùyaaya Nendè. Kaa, kaa, ekèlekèle! Mu Cikondo cinène cilwalwà aci, piìkalà mpékaatù yônsò ne difwànàngana dyà mpékaatù dyônsò...

³⁰³ Nzùbu yônsò minène, ne milenga yìdì bantu batàmbe kunanga leelù ewu eyi, mfrangà yônsò ne lukùka ne mpékaatù yônsò ne bakàjì balenga ne balùme, ne cyônsò cìdìbò bâteeta kwenza mubidi wàbò aci, cintu kampànda anyì kansanga, bwà kwikalabò butèyì bwà dyabùlù kutùmayè misùnkà yàbò mu iferno, newùbutukè ne wùbola, ne misàndà yà mu dikòbà neyiwùdyè. Nènku cintu cyà kumpàla, misàndà yà dikobà... cyônsò cìvwàbo bôbò aci necibwelè ànu mu mudilu wà volcan bwà kwalukila cyônsò ànu ku butù bwà bômbè ne—ne bwà volcan.

³⁰⁴ Kàdi dìmwè dyà ku maadìndà aa, mulunda wanyì, dìmwè dyà ku dìndà edi, pààjikà byônsò abi, buloba nebùsample cyàkàbìdì bu bilòngò. Mpàta mitòòkesha kùdì bilòngò ne dipembu dyà—dyà ku cilòngò cyà rose nebisambakane ne bilòngò byà ku Muci wà Mwoyi, ne Kilistò neàpingane mu dìndà kampànda. Piìkalà nyuunyi minène, nkuci, yisòmbela mu micì ne yìdila yìtèndakanà, ne kakwàkwikala kàbìdì lufù ne tunyinganyinga to. Kilistò ne Bapikula Bèndè nebàlukile pa buloba; kabàyì bantu bakùlákàjì to, kàdi bânà bàà bitende bwà kashidi. Netwimanè bafwànangane Nendè, katuyì tufwà to, dîbà ne mìtootò netùbitambè ku dikênkà.

Ndi mu njila mutàngile ku Cimenga cilenga aci
Cidi Mukalenge wanyì mulongòlwèle Bèndè
Sungasunga;
Mwikalà bapikula bwônsò bàà bikondo byônsò
Mwà kwimba “Butùmbi!” banyùngulukile
Nkwasa Mutòòke.
Mìngà misangu ntu mpeta majiyà à Dyulu,
Ne butùmbi kuulu bwà kutàngila:
Disànska kaayì dìíkalàku dîbà dingààmònà
Musùngidi wanyì,

Mu Cimenga cilenga cyà ngôlò aci!

Mùshindù mwine wûndì njinga kuMumònà's wè! Kaa, ndi muswè kuMumònà!

Ndi mu njila mutàngìle ku Cimenga cilenga aci.

³⁰⁵ Yone wàkacìmònà, mu cisanga cyà Paatémò, wènda ùpweka bu Mukàjì-musèla mulengejila bayéndè. Butùmbi bwàcì mbûndì muswè kubandila, díngà ditùkù.

Ndi muswè kuMumònà, ne kutàngila mpàla
Wendè,
Kwôkù aku bwà kwimba bwà kashidi ngâsà
Wendè musùngidi;
Mu mìsèèsù yà Butùmbi mbandishe díyì
dyànyì;
Ntatu yônsò yàjiki, ndekeelu wa byônsò
kumbèlu, bwà kusànka kashidi.

³⁰⁶ Diselemuka dikesè ne difinunuka mu nêjè, luyà lukesè ne midimu mikolè yà ditùkù; ndi njinga ne mukajàànyì ne Mabel babandeku kuneeku bwà kungiimbila musambu awu, bu mêmè-mêmè ne mùshindù ne: "Midimu mikolè yà mu njila kayààkwikala ne cìdìyi yùmwija to, pângààfikà ku ndekeelu wa lwendo." Ncyà bushùwà.

³⁰⁷ Ndi mvùluka dilòòlò díngààkuumukà mu èkèleeyiyà bwà kubanga mudimu wà butangadiki, panùvwà nwénù bwônsò nudila myadi apu; muntu nànsha umwe wa ku bôbò abu kacyènapu to, pàmwè ne bwônsò, pàmwäpa ndambù wà ku nwénù abu kaaba aka. Mwanèètù wa bakàjì ne Mwanèètù wa balùme Spencer, ne pàmwäpa ba—bakesè menemene bâà bikondo byà kale bishààle, pàvvàbo badila myadi mwab'ewu. Kàdi pààkamba Nyumà Mwîmpè ne: "Udi ne cyà kuya!"

³⁰⁸ Nènku ndi mvùluka disangisha dyànyì dyà kumpàla paanyimà pàà mêmè mumane kuya munda mwà ngondo, Meda kupwekaye ku Jonesboro kwàka, Becky ûvwa kânà kakesè menemene kàà mu dibòko, kupwekaye kuntwaku mu kàwulù kàà kale kàà Cottonbelt aku, kubàngatabi matùkù bwà kufika kuntwaku. Nènku mvwa mwimane pambèlu apu dîbà dyàkalwaye dilòòlò adi. Twêtù kuteeta bwà kufika ku dîbàlaasà, bitùpà bisàtù kule, bampulushi bâvva balame mìsèèsù ayi mùshindù awu. Misèèsù mene yìvva mipâtè patapata. Kwenzekabì ne, kúpicilabò nàànyì mu mìsèèsù amu ne kunyùnguluka bwà kufika pa mwaba awu. Meda kwambayè ne: "Mbalwè bwà kukuumvwa uyiisha anyì, Bill?"

³⁰⁹ Mêmè ne: "To." Pashiìshe twêtù kwimba ne:

Mbafümìne ku Esètè ne ku Wesètè,
Mbafümìne ku buloba bwà kulekùlè,

Bwà kwenza difestò ne wetù Mfùmù, bwà
 kudyà bu babìikidìibwè Bèndè;
 Mùshindù mwine ùdi beena lwendu aba
 babènèshìibwe's wè!
 Bàbandila mpàla Wendè mujidila
 Ùkenka ne dinanga dyà Nzambì;
 Baabanyanganyi babènèsha bàà ngâsà
 Wendè,
 Bwà kubàlakanabò bu mabwe à mushinga
 mukolà à ku cifulu Cyèndè cyà butùmbi.
 Kaa, Yesù ûlwalwa katààtaka,
 Dîbà adi mateeta ètè neàjike.
 Kaa, kàdi bu byôbì bìkèngela bwà Mukalenge
 wetù kulwa pa dîbà edi
 Ùlwila aba bâdi basùùludiibwe ku bupika bwà
 mpèkaatù?
 Kaa, dîbà adi ncifwànyìne kukutwàdila
 disànska,
 Anyì tunyinganyinga ne diteketa dikolè dyà mu
 mabòko anyì?
 Pààlwà Mukalenge wetù mu butùmbi,
 Netùtuutakeene Nendè muulu mu mpeepèlè.

³¹⁰ Amen! Kaa, ndi muMunange! Ncifwànyìne kunutwàdila tunyinganyinga ne dikènga dikolè, anyì ncifwànyìne kunutwàdila disànska? Pààlwà Mukalenge wetù mu butùmbi, netùtuutakeenà Nendè muulu mu mpeepèlè. Ne meeji awu mu mitù yètù, twinyikààyi mitù yètù. Bu Mukalenge mwà kwanyisha, nênjikijè disangisha edi musangu mukwàbò kampànda.

³¹¹ Taatù wetù wa mu Dyulu, kaa, nebàfùmine ku Esètè ne ku Wesètè, nebàfùmine ku malaba à kulekùlè. Ndi ngeela meeji ku Dyambwibwa dinène adi. Bantu bândì muyishe mu Àfrikè, mu Inde, ne mu buloba bujimà, mùshindù wûngààmònà cyàkàbìdì mpalà yàbò. Bààbûngì bààbò badila, bâlwa pabwîpi ne ndèkè, ne bëeyemena ku mpangu ne bëèla mbila badila. Ndi ngeela meeji dîbà dyàkapàtukàbo ne Pôlò musangu kampànda, kutwàbo binù e kusambilabò. Yéyè ne: “Ndi mutwishiibwe ne muntu nànsha umwe wa kunùdì... bààbûngì bëènù mwab’ewu kabàkumònakù mpàla wanyì kàbìdì to.”

Kàdi nebàfùmine ku Esètè ne ku Wesètè,
 Nebàfùmine ku malaba à kulekùlè,
 Bwà kwenza difestò ne wetù Mfùmù, bwà
 kudyà bu babìikidìibwè Bèndè;
 Mùshindù mwine ùdi beena lwendu aba
 babènèshìibwe's wè!
 Bàbandila mpàla Wendè mujidila (mu butùmbi
 bwà diikala ditàmbe kutwila dyà mâyì à
 matàmbà,)

Ùkenka ne Bukénkè bwà Nzambì;

Kaciyi ànu bukénkè bwà mwéndù anyì bukénkè bwà kandeyi to, kàdi-kàdi Bukénkè bwà Nzambì.

Ùkenka ne Bukénkè bwà Nzambì;
 Baabanyanganyi babèènesha bàà ngâsà
 Wendè,
 Bwà kubàlakanabò bu mabwe à mushinga
 mukolè à ku cifulu Cyèndè cyà butumbi.

Éyì Nzambì!

Dikàlà dyà kapyà pààkalengàdi mupròfetà,
 Dìmuvwija mukezuke ne mwéndè mwônsò,
 Pààkamba Dìyì dyà Nzambì ne: "Watùyiila ke
 nganyi?"
 Dîbà adi kwandamunayè ne: "Mmêmè ewu,
 ntùmaaku."

³¹² Kaa, tûmakù Mwanjèlò mu dindà emu, Bakèlùbà biikàle ne mapwâpwà àsambòmbò, mwàkabàmònà Yeshààyì amu, bâpaapala mu nzùbu, bêela mbila ne: "Wa cijila, wa cijila, wa cijila, kùdì Mukalenge." Ki Yeshààyì mupròfetà wa citende awu kwambayè ne: "Mêmè ndi ne mishikù mibiìpe, ne munkaci mwà bantu bakooyìke, ne mêsù àànyì mmamòne Butùmbì bwà Mukalenge." Makunji kunyukukawù mu ntempèlù. Ki Mwanjèlò kwangata nkàlà yà ku cyoshelu, ne kwangatayè dikàlà dyà kapyà ne kumutèèkadì pa mishiku yèndè, kwambaye ne: "Ndi nkusukula mishikù yèbè. Mpindyewu amba cipròfetà, wéwè mwânà wa muntu." Tumaaku Mwanjèlò mu dindà emu, Mukalenge, sukulaku mishikù yètù ku bintu bibì byônsò. Sukùlaku myoyi yètù, ne bwelàmu, Mukalenge. Sunsulakajaku diswa dyètù dyà nkààyetù. Bwà...diswa dyànyì (mu Wéwè) diikale Diswa Dyèbè, Mukalenge. Kaa, enzaku Diswà Dyèbè mu mêmè, Éyì Nzambì. Nènku enzaku ne mêmè ne èkèleезiyà wanyì ne cisambà cyànyì twikale bëèbè, Éyì Mukalenge. Nyéwù tuditàmbula kùdì Wéwè.

³¹³ Nènku ànu mwàkamba mwedi wa kasàlà ne: Taatù:

Mpindyewu mìlìyô nyéyì yìpùnga ne lufù mu
 mpèkaatù ne bundù,

Mu Àfrikè mwàmwa, mu Inde mwàmwa, mu nyùngùlukilu wa buloba bujimà, binunu ku dîbà, ne yìlwa kutwilangana Neebè kayìyì miKumanye to.

Mpindyewu mìlìyô nyéyì yìpùnga ne lufù mu
 mpèkaatù ne bundù,

Kàdi, Nzambì, cidi cyàmba kutaayisha musùùkà wànyì mu tupese pândì ngeelaku meeji.

Tèèlejà mwadi wàbò wà dibungama ne
 kànjabàla;

Lwijàkàjà, mwanèètù, lwijàkàjà uye
kabàkwacishaku;
Andàmùnàku ne lùkàsà lwônsò ne: “Mfùmù,
mmêmè ewu.”

³¹⁴ Enzaku nànku, Mukalenge, enzaku nànku cyàkàbìdì. Ndi mwenze bilema byà mishindù yônsò, Taatù, mu cidimu cyapìci eci, ndi ndòmba bwà Wêwè kubìmfwidilaku luse. Nènku mu Cidimu Cipyaciþà eci, Mukalenge, ùndaabèku cyàkàbìdì maanyì. Nyeku kùdì miliyò yìdì misòmbe mu mpèkaatù ne mu bundù ayi, miikale yipùnga ne lufù, nkayìtwàdile dibuulula dinène dyà Bulelèlà Bwèbè edi, kubàtwàdila dilaabiibwa dyà Nyumà Mwîmpè; mu mùshindù wà ne mu ditùkù adi bâàfwànyina mwà kufumina ku Esètè ne ku Wesètè, bâbàlakana bu mabwe à mushinga mukolè ku Cifulu Cyèbè cyà butùmbi. Nkwàcishèku, Mukalenge, bwà kupweka ne kukebulula ne kubàjoomona mu buloba, mu manyaanu à pa buloba, manyaanu ne bukooya mùdìbo basòmbèle amu. Nènku bàmonèku Nzambì wa Cijila udi ubafikisha ku dikezuka ne ku diikala ne nsòmbelu wa bwena Kilistò, mujidièbwe ne mukezuke kumpàla Kwèbè awu; bakoma nyima ku bubì, ku bisànkasanka byà mishindù yônsò byà pa buloba, ne batàngila kùdì Nzambì wa mwoyi, ne übàvvija mìnyàmpalà yà Bukalenge Bwèbè bwà ditùkù dinène adi.

³¹⁵ Jidilàku kaèkèleeziyà kakesè aka mu dìndà emu, Mukalenge. Jidilàku muntu yônsò kaaba aka ne Nyumà Webè, ne Nyumà Mwîmpè àbwelèku munda mwà myoyi yàbò, muntu ne muntu wa kutùdì. Fila cyashima kùdì Nyumà munda mwà aba bakàadi ba-...bunzùlule myoyi yàbò ku budiswile bwàbò, bavile diswa dyàbò bôbò biine ne balwè bwà kumanya Diswa Dyèbè.

³¹⁶ Bânà batekète abu, Mukalenge, bààbûngì bàà kùdìbo bàvwa ànu bânà bakesè bàà mu mabòko. Mùshindù mwine údì Wêwè ubengeleka mu mabòko Èbè's wè! Mùshindù ùtu maamù ucyùka mwanèndè mutekète, umukupula binsonji kwísù ne—ne umupèèsha bintu byà pabwàbi bwalu mmumunange. Ki mùshindù Údì munange bânà Bèèbè bakesè baledìbwé cyàkàbidi abu, Mukalenge. Kî mbanji kukumbana mwà kwenda to, kabèèna mene banji kukumbana mwà kwakula to. Cintu cìmwèpelè cìdibo mwà kwenza cìdi ànu kudila myadi ne kutàngila Maman. Éyi Nzambì, balameku mu mabòko Èbè, ne dinanga dyônsò, bu twâna twà mìkòòkò, ne ubàlomboleku too ne mwàkòlào ne kukumbana mwà kwenda. Pashiishe ubàlombòle, Mukalenge, mu tujila twà mudimu. Enzaku nànku.

³¹⁷ Tùfwilèku luse ku mpèkaatù yètù, bu mutùdì tufwìla aba bàdi bâtwènzela mpèkaatù abu luse. Kùtùlombòdiku mu diteeciibwa to, kàdi ùtùsùngilèku ku bubì. Bwalu Bukalenge m'Bwèbè, ne bukolè, ne butùmbi, kashidi, mu Dînà dyà Yesù Kilistò. Amen.

³¹⁸ Nzambì ànùbènèshè! Ndi mutwìshìibwe ne Mukalenge mmunwenzeleku cintu kampànda mu dìndà emu bwà kunufikisha ku dibangila Cidimu Cipyacìpyà pa cintu cìmwèpelè eci, cyà ne nudi banange Yesù Kilistò, ne díngà ditùkù nudi baswè kuMumònà ne kuMunanga ne kusòmba Nendè kashidi. Ndijinga dyànyì bwà ne nànsha umwe wa kunùdì kàjiminyiku to, bwà ne yônsò wa kunùdì asùngidiibwe ne ûjiibwe tèntè ne Nyumà Mwímpè, ne àlamiiibwe mu ditùkù dyà Dilwa Dyèndè adi, bwalu ndi ngiitabuuja ne dikaadi pabwípì menemene.

Mpindyewu ndi ngààlujila Mwanèètù Neville bulombodi bwà disangisha. 

61-0101 Bwàkabuulwibwà, Nshapità Mwinâyì Citùpà II
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabéji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndala, kulamiibwa mu cikalwîlè, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org